



МОЛИТВОСЛОВ



ОГЛАВЛЕНИЕ

Заповеди Божии	3
Молитвы утреннія.	7
Молитвы въ продолженіи дня	35
Молитвы на сонъ грядущимъ	39
Канонъ умиленный ко Господу нашему Іисусу Христу	61
Акафистъ сладчайшему Господу нашему Іисусу Христу	72
Канонъ покаянный ко Господу нашему Іисусу Христу	90
Другій Канонъ покаянный ко Господу нашему Іисусу Христу	97
Канонъ молебный ко Пресвятей Богородице	108
Акафистъ ко Пресвятей Богородице	119
Канонъ покаянный ко Пресвятей Богородице	137
Канонъ Ангелу Хранителю	147
Послѣдованіе ко св. Причащенію	159
Послѣдованіе ко св. Причащенію	194
Акафистъ Святителю Николаю	203
Молитвы на разные случаи	223
Служба о въ темницахъ и въ заточеніи сущихъ (многихъ или о еди- немъ)	236
Канонъ молебенъ на исходъ души	241

Отпечатано в АПП ЦИТП
Заказ 4119. Тираж 100 000 экз.

Заповѣди Божіи.

Первая и большая заповѣдь:

Возлюбиши Господа Бога твоего всѣмъ сердцемъ твоимъ, и всею душею твоею, и всею мыслію твоею.

Вторая же подобна ей:

Возлюбиши ближняго твоего, яко самъ себе.

Десять заповѣдей Божіихъ:

1. Азъ есмь Господь Богъ твой. Да не будутъ тебѣ бози иніи развѣ Мене.

2. Не сотвори себѣ кумира, и всякаго подобія, елика на небеси горѣ, и елика на земли низу, и елика въ водахъ подъ землею, да не поклонишися имъ, ни послужиши имъ.

3. Не возмещи имени Господа Бога твоего всуе.

4. Помни день субботній, еже святити его: шесть дней дѣлай, и сотвориши (въ нихъ) вся дѣла твоя. Въ день же седьмый — суббота Господу Богу твоему.

5. Чти отца твоего и мать твою, да благо ти будетъ, и да долготѣнь будеши на земли.

6. Не убій.

7. Не прелюбы сотвори.

8. Не укради.

9. Не послушествуй на друга твоего свидѣтельства ложна.

10. Не пожелай жены искренняго твоего, не пожелай дому ближняго твоего, ни села его, ни раба его, ни рабыни его, ни вола его, ни осла его, ни всякаго скота его, ни всего елика суть ближняго твоего.

Три добродѣтели:

Вѣра, надежда, любовь.

Седмь святыхъ таинствъ:

1. Крещеніе.

2. Мүропомазаніе.

3. Причащеніе.

4. Покаяніе.

5. Священство.

6. Бракъ.

7. Елеосвященіе.

Седмь грѣховъ смертныхъ:

1. Гордость.

2. Сребролюбіе.

3. Блудъ.

4. Гнѣвъ.

5. Чревоугодіе.

6. Зависть.

7. Уныніе.

Четыре послѣдняя и достопамятная:

1. Смерть.

2. Судъ Божій.

3. Царство небесное.

4. Геенна.

Молитвы утреннія .

Воставъ отъ сна, прежде всякаго другаго дѣла, стани благоговѣйно, представляя себе предъ Всевидящимъ Богомъ, и, сотворивъ крестное знаменіе, глаголи:

Во имя Отца, и Сына, и Святаго Духа.
Аминь.

Посемъ мало помедли, дондеже вся чувствія твоя утишатся и мысли твоя оставятъ вся земная: и тогда сотвори три поклоны, глаголя:

Молитва мытаря:

Боже, милостивъ буди мнѣ грѣшному.

Молитва начинательная:

Господи Іисусе Христе, Сыне Божій, молитвъ ради Пречистыя Твоея Матере и всѣхъ святыхъ, помилуй насъ. Аминь.

Слава Тебѣ, Боже нашъ, слава Тебѣ.

Царю Небесный, Утѣшителю, Душе истины, Иже вездѣ сый и вся исполняй, Сокровище благихъ и жизни Подателю, прииди и вселися въ ны, и очисти ны отъ всякія скверны, и спаси, Блаже, души наша *).

Святыи Боже, Святыи крѣпкій, Святыи безсмертный, помилуй насъ (*трижды*).

Слава Отцу, и Сыну, и Святому Духу, и нынѣ и присно, и во вѣки вѣковъ. Аминь.

Пресвятая Троице, помилуй насъ: Господи, очисти грѣхи наша: Владыко,

*) Отъ начала Св. Пасхи и до Вознесенія, вмѣсто Царю Небесный читается Христосъ воскре, трижды. Отъ Вознесенія до Троицы, начало молитвъ бываетъ отъ Святыи Боже..

прости беззаконія наша: Святый, посѣ-
ти и исцѣли немощи наша, имене Тво-
его ради.

Господи, помилуй (*трижды*).

Слава Отцу, и Сыну, и Святому Духу,
и нынѣ и присно, и во вѣки вѣковъ.
Аминь.

Отче нашъ, Иже еси на небесѣхъ! да
святится имя Твое, да приидетъ Цар-
ствіе Твое: да будетъ воля Твоя, яко на
небеси и на земли. Хлѣбъ нашъ насущ-
ный даждь намъ днесь: и остави намъ
долги наша, якоже и мы оставляемъ
должникомъ нашимъ: и не введи насъ
во искушеніе, но избави насъ отъ лу-
каваго.

Тропари Троичны:

Воставше отъ сна, припадаемъ Ти,
Блаже, и ангельскую пѣснь вопіемъ Ти,
Сильне: святъ, святъ, святъ еси, Боже,
Богородицею помилуй насъ.

Слава Отцу, и Сыну, и Святому Духу:

Отъ одра и сна воздвигль мя еси, Господи, умъ мой просвѣти и сердце, и устнѣ мои отверзи, во еже пѣти Тя, Святая Троице: святъ, святъ, святъ еси, Боже, Богородицею помилуй насъ.

И нынѣ и присно и во вѣки вѣковъ, аминь.

Внезапу Судія приидеть, и коегождо дѣянiя обнажатся, но страхомъ зовемъ въ полунощи: святъ, святъ, святъ еси, Боже, Богородицею помилуй насъ.

Господи, помилуй (12).

Молитва:

Отъ сна воставъ, благодарю Тя, Святая Троице, яко многiя ради Твоея благи и долготерпѣнiя не прогнѣвался еси на мя лѣниваго и грѣшнаго, ниже погубилъ мя еси со беззаконными моими: но человѣколюбовствовалъ еси обычно, и въ нечаянiи лежащаго воздвигль мя еси, во еже утреневати и славословити державу Твою. И нынѣ просвѣти мои очи мысленныя, отверзи моя уста поучатися

словесемъ Твоимъ, и разумѣти заповѣди Твоя, и творити волю Твою, и пѣти Тя во исповѣданіи сердечнѣмъ, и воспѣвати всесвятое имя Твое, Отца, и Сына, и Святаго Духа, нынѣ и присно, и во вѣки вѣковъ, аминь.

Приидите, поклонимся Царевѣ нашему Богу.

Приидите, поклонимся и припадемъ Христу, Царевѣ нашему Богу.

Приидите, поклонимся и припадемъ Самому Христу, Царевѣ и Богу нашему.

Псаломъ 50.

Помилуй мя, Боже, по величѣй милости Твоей и по множеству щедротъ Твоихъ очисти беззаконіе мое. Наипаче омый мя отъ беззаконія моего, и отъ грѣха моего очисти мя: яко беззаконіе мое азъ знаю, и грѣхъ мой предо мною есть выну. Тебѣ единому согрѣшихъ и лукавое предъ Тобою сотворихъ: яко да оправдишися во словесѣхъ Твоихъ, и побѣдиши всегда судити Ти. Се бо, въ

беззаконіихъ зачатъ есмь и во грѣсѣхъ
 роди мя мати моя. Се бо, истину воз-
 любилъ еси: безвѣстная и тайная про-
 мудрости Твоя явилъ ми еси. Окропи-
 ши мя воспомъ, и очищуся: омыеши
 мя, и паче снѣга убѣлюся. Слуху мое-
 му даси радость и веселіе: возрадуются
 кости смиренныя. Отврати лице Твое
 отъ грѣхъ моихъ и вся беззаконія моя
 очисти. Сердце чисто созижди во мнѣ,
 Боже, и духъ правъ обнови во утробѣ
 моей. Не отвержи мене отъ лица Тво-
 его, и Духа Твоего Святаго не отыми
 отъ мене. Воздаждь ми радость спасенія
 Твоего и Духомъ Владычнимъ утверди
 мя. Научу беззаконныя путемъ Твоимъ,
 и нечестивіи къ Тебѣ обратятся. Изба-
 ви мя отъ кровей, Боже, Боже спасе-
 нія моего: возрадуется языкъ мой прав-
 дѣ Твоей. Господи, устнѣ мои отверзе-
 ши, и уста моя возвѣстятъ хвалу Твою.
 Яко аще бы восхотѣлъ еси жертвы,
 далъ быхъ убо: всесожженія не благо-
 волиши. Жертва Богу духъ сокрушенъ:

сердце сокрушенно и смиренно Богъ не уничижить. Ублажи, Господи, благоволеніемъ Твоимъ Сіона, и да созиждутся стѣны Іерусалимскія. Тогда благоволиши жертву правды, возношенія и все-сожгаемая: тогда возложатъ на олтарь Твой тельцы.

Символь Православной Вѣры.

Вѣрую во единого Бога Отца, Вседержителя, Творца небу и земли, видимымъ же всѣмъ и невидимымъ. И во единого Господа Іисуса Христа, Сына Божія, Единородного, Иже отъ Отца рожденнаго прежде всѣхъ вѣкъ: Свѣта отъ Свѣта, Бога истинна отъ Бога истинна, рожденна, несотворенна, единосущна Отцу, Имже вся быша. Насъ ради чловѣкъ и нашего ради спасенія сшедшаго съ небесъ и воплотившагося отъ Духа Свята и Маріи Дѣвы, и вочловѣчшася. Распятаго же за ны при Понтійстѣмъ Пилатѣ, и страдавша, и погребенна. И воскресшаго въ третій день, по писанію

емъ. И возшедшаго на небеса, и сѣдяща одесную Отца. И паки грядущаго со славою судити живымъ и мертвымъ, Егоже Царствію не будетъ конца. И въ Духа Святаго, Господа, животворящаго, Иже отъ Отца исходящаго, Иже со Отцемъ и Сыномъ спокланяема и сслави́ма, глаголаваго пророки. Во едину святу, соборную и Апостольскую Церковь. Исповѣдую едино крещеніе во оставленіе грѣховъ. Чаю воскресенія мертвыхъ: И жизни будущаго вѣка. Аминь

Молитва 1-я, св. Макарія Великаго:

Боже, очисти мя грѣшнаго, яко николиже сотворихъ благое предъ Тобою: но избави мя отъ лукаваго и да будетъ во мнѣ воля Твоя: да неосужденно отверзу уста моя недостойная и восхвалю имя Твое Святое, Отца, и Сына, и Святаго Духа, нынѣ и присно, и во вѣки вѣковъ, аминь.

Молитва 2-я, тогожде святаго:

Отъ сна воставъ, полунощную пѣснь приношу Ти, Спасе, и припадая вопію

Ти: не даждь ми уснути во грѣховнѣй смерти, но ущедри мя, распныйся волею, и лежащаго мя въ лѣности ускори въ возстави и спаси мя въ предстояніи и молитвѣ: и по снѣ нощнѣмъ возсіяй ми день безгрѣшенъ, Христе Боже, и спаси мя.

Молитва 3-я, тогожде святаго:

Къ Тебѣ, Владыко Человѣколюбче, отъ сна вставъ прибѣгаю, и на дѣла Твоя подвизаюся милосердіемъ Твоимъ, молюся Тебѣ: помози мнѣ на всякое время, во всякой вещи, и избави мя отъ всякія мірскія злыя вещи и діавольскаго поспѣшенія, и спаси мя, и введи въ Царство Твое вѣчное. Ты бо еси мой Сотворитель и всякому благу Промысленикъ и Податель, о Тебѣ же все упованіе мое, и Тебѣ славу возсылаю, нынѣ и присно, и во вѣки вѣковъ, аминь.

Молитва 4-я, тогожде святаго:

Господи, иже многою Твоею благодію и великими щедротами Твоими

далъ еси мнѣ рабу Твоему мимошедшее
время нощи сея безъ напасти прейти
отъ всякаго зла противна: Ты Самъ,
Владыко, всяческихъ Творче, сподоби
мя истиннымъ Твоимъ свѣтомъ и про-
свѣщеннымъ сердцемъ творити волю
Твою, нынѣ и присно и во вѣки вѣковъ,
аминь.

Молитва 5-я, святаго Василия Великаго:

Господи Вседержителю, Боже силъ и
всякія плоти, въ вышнихъ живый и на
смиренныя призираай, сердца же и
утробы испытуй и сокровенная человѣ-
ковъ явѣ предвѣдый, Безначальный и
Присносущный Свѣте, у Негоже нѣсть
премѣненіе, или преложенія осѣненіе:
Самъ, Безсмертный Царю, приими моле-
нія наша, яже въ настоящее время, на
множество Твоихъ щедротъ дерзающе,
отъ скверныхъ къ Тебѣ устенъ творимъ,
и остави намъ прегрѣшенія наша, яже
дѣломъ, и словомъ и мыслію, вѣдѣніемъ,
или невѣдѣніемъ согрѣшенная нами: и

очисти ны отъ всякія скверны плоти и духа. И даруй намъ бодреннымъ сердцемъ и трезвенною мыслию всю настоящаго житія ночь прейти, ожидающимъ пришествія свѣтлаго и явленнаго дне Единороднаго Твоего Сына, Господа и Бога и Спаса нашего Іисуса Христа, въ онъже со славою Судія всѣхъ придетъ, комуждо воздати по дѣломъ его: да не падше и облѣнившеся, но бодрствующе и воздвижени въ дѣланіе, обращаемся готови, въ радость и Божественный чертогъ славы Его совнидемъ, идѣже празднующихъ гласъ непрестанный и неизреченная сладость зрящихъ Твоего лица доброту неизреченную. Ты бо еси истинный Свѣтъ, просвѣщаяй и освящаяй всяческая, и Тя поетъ вся тварь во вѣки вѣковъ, аминь.

Молитва 6-я, тогожде святаго Василия:

Тя благословимъ, вышній Боже, и Господи милости, творящаго присно съ нами великая же и неизслѣдованная,

славная же и ужасная, ихже нѣсть чистла, подавшаго намъ сонъ во упокое-
ніе немощи нашея, и ослабленіе трудовъ
многотрудныя плоти. Благодаримъ Тя,
яко не погубилъ еси насъ со беззакон-
ными нашими, но челоуѣколюбствовалъ
еси обычно, и въ нечаяніи лежащыя
ны воздвиглъ еси, во еже славословити
державу Твою. Тѣмже молимъ безмѣр-
ную Твою благодать: просвѣти наша мы-
сли и очеса, и умъ нашъ отъ тяжкаго
сна лѣности возстави, отверзи наша
уста, и исполни я твоего хваленія, яко
да возможемъ непоколеблемо пѣти же
и исповѣдаться Тебѣ, во всѣхъ и отъ
всѣхъ славимому Богу, безначальному
Отцу, со едиnorodнымъ Твоимъ Сыномъ,
и всесвятымъ, и благимъ и животворя-
щимъ Твоимъ Духомъ, нынѣ и присно,
и во вѣки вѣковъ. Аминь.

Молитва 7-я, ко Пресвятѣй Богородицѣ:

Воспѣваю благодать Твою, Владычице,
молю Тя, умъ мой облагодати. Ступа-

ти право мя настави, путю Христо-
выхъ заповѣдей. Бдѣти къ пѣсни укрѣ-
пи, унынія сонъ отгоняючи. Связана пле-
ницами грѣхопадений мольбами Твоими
разрѣши, Богоневѣсто. Въ нощи мя и
во дни сохраняй, борющихся врагъ из-
бавляючи мя. Жизнодателя Бога рожд-
шая, умерщвлена мя страстьми оживи.
Яже Свѣтъ невечерній рождшая, душу
мою ослѣпшую просвѣти. О дивная Вла-
дычня палато, домъ Духа Божественна
мене сотвори. Врача рождшая, уврачуй
души моя многолѣтныя страсти. Вол-
нующаяся житейскою бурей, ко стези
мя покаянія направи. Избави мя огня
вѣчнующаго, и червія же злаго, и тар-
тара. Да мя не явиши бѣсомъ радованіе,
иже многимъ грѣхомъ повинника. Нова
сотвори мя обетшавшаго нечувственны-
ми, Пренепорочная, согрѣшеніи. Стран-
на муки всякія покажи мя, и всѣхъ
Владыку умоли. Небесная ми улучшить
веселія со всѣми святыми сподоби. Пре-
святая Дѣво, услыши гласъ непотреб-

наго раба твоего. Струю давай мнѣ слезамъ, Пречистая, души моя скверну очищаючи. Стенанія отъ сердца приношу Ти непрестанно, усердствуй Владычице. Молебную службу мою приими, и Богу благоутробному принеси. Превышшая ангель, мірскаго мя превышша слитія сотвори. Свѣтоносная сѣне небесная, духовную благодать во мнѣ направи. Руцѣ воздѣю и устнѣ къ похваленію осквернены скверною, Всенепорочная. Душетлѣнныхъ мя пакостей избави, Христа прилѣжно умоляючи: Ему же честь и поклоненіе подобаетъ, нынѣ и присно, и во вѣки вѣковъ, аминь.

Молитва 8-я, ко Господу нашему Іисусу Христу:

Многомилостиве и всемилостиве Боже мой, Господи Іисусе Христе, многія ради любви сшелъ и воплотился еси, яко да спасеши всѣхъ: и паки, Спасе, спаси мя по благодати, молю Тя. Аще бо отъ дѣлъ спасеши мя, нѣсть се благодать и даръ, но долгъ паче. Ей, многій въ

щедротахъ, и неизреченный въ милости! Вѣруй бо въ Мя, рекль еси, о Христе мой, живъ будетъ, и не узритъ смерти во вѣки. Аще убо вѣра, яже въ Тя, спасаетъ отчаянныя, се вѣрую, спаси мя, яко Богъ мой еси Ты и Создатель. Вѣра же вмѣсто дѣлъ да вмѣнится мнѣ, Боже мой: не обрящещи бо дѣлъ отнюдъ оправдающихъ мя. Но та вѣра моя да довлѣетъ вмѣсто всѣхъ, та да отвѣщаетъ, та да оправдитъ мя, та да покажетъ мя причастника славы Твоея вѣчная, да не убо похититъ мя сатана, и похвалится, Слове, еже отторгнуть мя отъ Твоея руки и ограды. Но или хочу, спаси мя, или не хочу, Христе Спасе мой, предвари скоро, скоро, погибохъ: Ты бо еси Богъ мой отъ чрева матере моея. Сподоби мя, Господи, нынѣ возлюбити Тя, якоже возлюбихъ иногда той самый грѣхъ, и паки поработати Тебѣ безъ лѣности тощю, якоже поработахъ прежде сатанѣ льстивому. Наипаче же поработаю Тебѣ, Господу и Богу

моему Иисусу Христу, во вся дни живота моего, нынѣ и присно, и во вѣки вѣковъ, аминь.

Молитва 9-я, ко св. Ангелу Хранителю:

Святый Ангеле, предстояй окаяннѣйшей моей души и страстнѣйшей моей жизни, не остави мене грѣшнаго, ниже отступи отъ мене за невозддержаніе мое: не даждь мѣста лукавому демону обладати мною насильствомъ смертнаго сего тѣлесе: укрѣпи бѣдствующую и худую мою руку и настави мя на путь спасенія. Ей, святой Ангеле Божій, хранителю и покровителю окаянныхъ моя души и тѣла, вся мнѣ прости, елики мя оскорбихъ во вся дни живота моего, и аще что согрѣшихъ въ прешедшую нощь сію, покрый мя въ настоящій день, и сохрани мя отъ всякаго искушенія противнаго, да ни въ коемъ грѣсѣ прогнѣваю Бога: и молися за мя ко Господу, да утвердитъ мя въ страсти Своемъ, и достойна покажетъ мя раба Своея благости, аминь.

Молитва 10-я, ко Пресвятѣй Богородицѣ:

Пресвятая Владычице моя Богородице, святыми Твоими и всесильными мольбами отжени отъ мене смиреннаго и окаяннаго раба Твоего уныніе, забвѣніе, неразуміе, нерадѣніе, и вся скверная, лукавая и хульная помышленія отъ окаяннаго моего сердца и отъ помраченнаго ума моего: и погаси пламень страстей моихъ, яко нищъ есмь и окаяненъ, и избави мя отъ многихъ и лютыхъ воспоминаній и предпріятій, и отъ всѣхъ дѣйствъ злыхъ свободи мя: яко благоденствую еси отъ всѣхъ родовъ, и славится пречестное имя Твое во вѣки вѣковъ, аминь.

**Призываніе молитвенное Святаго, егоже имя
носиши:**

Моли Бога о мнѣ, святыи угодниче
Божій (*имя*), яко азъ усердно къ тебѣ
прибѣгаю, скорому помощнику и молит-
веннику о душѣ моей.

Пѣснь Пресвятѣй Богородицѣ:

Богородице Дѣво, радуйся, Благодат-
ная Маріе, Господь съ Тобою: благосло-
венна Ты въ женахъ и благословенъ
Плодъ чрева Твоего, яко Спаса родила
еси душъ нашихъ.

Тропарь креста и молитва за отечество:

Спаси, Господи, люди Твоя и благо-
слови достояніе Твое, побѣды право-
славнымъ христіаномъ на сопротивныя
даруя, и Твое сохраняя крестомъ Тво-
имъ жительство.

Молитва послѣднихъ Оптинскихъ старцевъ *):

Господи, дай мнѣ съ душевнымъ

*) Нижеслѣдующія двѣ молитвы не входятъ
въ составъ утреннихъ молитвъ но помѣщаются
здѣсь для благочестиваго употребленія произ-
воляющихъ.

спокойствіемъ встрѣтить все, что принесетъ мнѣ наступающій день. Дай мнѣ всецѣло предаться волѣ Твоей святой. На всякій часъ сего дня во всемъ наставь и поддержи меня. Какія бы я ни получалъ извѣстія въ теченіе дня, научи меня принять ихъ со спокойной душой и твердымъ убѣжденіемъ, что на все святая воля Твоя.

Во всѣхъ словахъ и дѣлахъ моихъ руководи моими мыслями и чувствами. Во всѣхъ непредвидѣнныхъ случаяхъ не дай мнѣ забыть, что все ниспослано Тобой.

Научи меня прямо и разумно дѣйствовать съ каждымъ членомъ семьи моей, никого не смущая и не огорчая.

Господи, дай мнѣ силу перенести утомленіе наступающаго дня и всѣ событія въ теченіе дня. Руководи моею волею и научи меня молиться, вѣрить, надѣяться, терпѣть, прощать и любить. Аминь.

Молитва іеросхимонаха Парвонія Кіевскаго:

Господи Ісусе Христе, Сыне Божій, не попусти, чтобы суетность, самолюбіе, чувственность, нерадѣніе, гнѣвъ господствовали надо мною и похищали меня у любви Твоей... О, Господи, Создатель мой, все Упованіе мое! не остави меня безъ удѣла въ блаженной вѣчности; содѣлай, да и я послѣдую святому примѣру Твоему, буду покоренъ властямъ, надо мною поставленнымъ; даруй мнѣ сію чистоту духа, сію простоту сердца, которыя дѣлають насъ достойными любви Твоей.

Къ Тебѣ, о, Боже мой, возношу душу и сердце мое: не попусти погибнуть созданію Твоему, но избавь меня отъ единственнаго и величайшаго зла: грѣха. Содѣлай, Господи, да переносу съ такимъ же терпѣніемъ безпокойства и скорби душевныя, съ какою радостію приѣмлю удовольствія сердечныя. Если Ты хочешь, Господи, — можешь

очистить и освятить меня. Се предаю себя Твоей благодати, прося истребить изъ меня все противное Тебѣ и присоединить къ сонму избранныхъ Твоихъ.

Господи! отыми отъ меня праздность духа, погубляющую время; суетность мыслей, мѣшающую Твоему присутствію и развлекающую вниманіе мое въ молитвѣ; если же, молясь, я уклоняюсь отъ Тебя моими помыслами, то помоги мнѣ, дабы сіе развлеченіе было не произвольно, и, отвращая умъ, да не отвращу сердце отъ Тебя.

Исповѣдую Тебѣ, Господу Богу моему, всѣ грѣхи моего беззаконія, нынѣ и прежде содѣланные предъ Тобою: отпусти мнѣ ихъ ради имени Твоего святаго и спаси душу мою, которую Ты искупилъ драгоценною Кровію Твоею. Вручаю себя милосердію Твоему, предаюсь въ волю Твою, твори со мною по благодати Твоей, а не по злобѣ и беззаконію моему. Научи меня, Господи, располагать дѣла свои такъ, чтобы они

споспѣшествовали къ прославленію имени Твоего Святаго.

Умилосердись, Господи, о всѣхъ христіанахъ; услыши желаніе всѣхъ вопіющихъ къ Тебѣ, избави отъ всякаго зла, спаси рабовъ Твоихъ (*имена*) пошли имъ отраду, утѣшеніе въ скорбяхъ и милость Твою святую. Господи! молю Тебя особенно о тѣхъ, которые меня чѣмъ либо обидѣли и опечалили или какое либо зло сдѣлали: не наказывай ихъ меня-ради грѣшнаго, но пролей на нихъ благодать Твою...

Господи, молю Тебя о всѣхъ, которыхъ я, грѣшный, опечалилъ, обидѣлъ или соблазнилъ словомъ, дѣломъ, помышленіемъ, вѣдѣніемъ и невѣдѣніемъ. Господи Боже! отпусти намъ наши взаимныя оскорбленія; изжени, Господи, изъ сердець нашихъ всякое негодованіе, подозрѣніе, гнѣвъ, памятозлобіе, ссоры и все то, что можетъ препятствовать любви и уменьшать братолюбіе.

Помилуй, Господи, тѣхъ, которые поручили мнѣ, грѣшному, недостойному, молиться о нихъ! — Помилуй, Господи, всякаго просящаго Твоей помощи. Господи! сотвори сей день днемъ милосердія Твоего, подай каждому по прошенію его; буди пастыремъ заблудшихъ, вождемъ и свѣтомъ невѣдущихъ, наставникомъ немудрыхъ, отцомъ сирыхъ, помощникомъ угнетенныхъ, врачомъ больныхъ, утѣшителемъ умирающихъ, и приведи насъ всѣхъ къ желанному концу — къ Тебѣ, Пристанищу нашему и блаженному Упокоенію.

Аминь.

Посемъ кратко принеси молитву о здравіи и спасеніи отца твоего духовнаго, родителей твоихъ, сродниковъ, начальниковъ, благодѣтелей, знаемыхъ тебѣ, болящихъ, или находящихся въ печали.

Аще же можешь, читай сей помянникъ:

О живыхъ:

Помяни, Господи Иисусе Христе, Боже нашъ, милости и щедроты Твоя отъ вѣка сущія, ихже ради и вочеловѣчился еси и распятіе и смерть, спасенія ради право въ Тя вѣрующихъ, претерпѣти изволилъ еси: и воскресъ изъ мертвыхъ, вознеслся еси на небеса и сѣдиши одесную Бога Отца, и призирaeши на смиренныя мольбы всѣмъ сердцемъ призывающихъ Тя: приклони ухо Твое, и услыши смиренное моленіе мене, непотребнаго раба Твоего, въ воню благоуханія духовнаго, Тебѣ за вся люди Твоя приносящаго. И въ первыхъ помяни Церковь Твою Святую, Соборную и Апостольскую, юже снабдѣлъ еси честною Твоею Кровію, и утверди, и укрѣпи, и разшири, умножи, умири, и непреобориму адовыми враты во вѣки сохрани: раздиранія церквей утиши, шатанія языческая угаси, и ересей востаніе скоро разори и искорени, и

въ ничтоже силою Святаго Твоего Духа обрати. *Поклонъ.*

Спаси, Господи, и помилуй страну нашу Россійскую и православныя люди ея. *Поклонъ.* Спаси, Господи, и помилуй Великого Господина и Отца нашего Святейшего Патриарха Алексія II, пресвященныя митрополиты, архіепископы и епископы православныя, и весь священническій и монашескій чинъ и весь причетъ церковный, яже поставилъ еси пасти словесное Твое стадо, и молитвами ихъ помилуй и спаси мя грѣшнаго.

Поклонъ.

Спаси, Господи, и помилуй отца моего духовнаго (*имя его*), и святыми его молитвами прости моя согрѣшенія.

Поклонъ.

Спаси, Господи, и помилуй родители моя (*имена ихъ*), братію и сестры, и сродники моя по плоти, и вся ближнія рода моего, и други, и даруй имъ мирная Твоя и премірная благая. *Поклонъ*

Спаси, Господи, и помилуй старцы и юныя, нищыя и сироты и вдовицы, и сущія въ болѣзни и въ печалехъ, бѣдахъ же и скорбехъ, обстояніихъ и плѣненіихъ, темницахъ же и заточеніихъ, изряднѣе же въ гоненіихъ, Тебе ради и Вѣры Православныя, отъ языкъ безбожныхъ, отъ отступникъ и отъ еретиковъ, сущыя рабы Твоя: и помяни я, посѣти, укрѣпи, утѣши, и вскорѣ силою Твоею ослабу, свободу и избаву имъ подаждь. *Поклонъ.*

Спаси, Господи, и помилуй ненавидящыя и обидящыя мя, и творящыя ми напасти, и не остави ихъ погибнути мене ради грѣшнаго. *Поклонъ.*

Отступившыя отъ Православныя Вѣры и погибельными ересьми ослѣпленныя, свѣтомъ Твоего познанія просвѣти и Святѣй Твоей Апостольстѣй Соборнѣй Церкви причти. *Поклонъ.*

О усопшихъ:

Помяни, Господи, отъ житія сего от-

шедшыя правовѣрныя цари и царицы, благовѣрныя князи и княгини, святѣйшыя патріархи, преосвященныя митрополиты, архіепископы и епископы православныя, во іерействѣмъ же и въ причтѣ церковнѣмъ, и монашествѣмъ чинѣ Тебѣ послужившыя, и въ вѣчныхъ Твоихъ селеніихъ со святыми упокой. *Поклонѣ.*

Помяни, Господи, души усопшихъ рабовъ Твоихъ, родителей моихъ (*имена ихъ*) и всѣхъ сродниковъ по плоти: и прости ихъ вся согрѣшенія вольная и невольная, даруя имъ Царствіе и причастіе вѣчныхъ Твоихъ благъ и Твоея безконечныя и блаженныя жизни наслажденіе. *Поклонѣ.*

Помяни, Господи, и вся въ надежди воскресенія и жизни вѣчныя усопшыя отцы и братію нашу, и сестры, и здѣ лежащія, и повсюду православныя христіаны, и со святыми Твоими, идѣже присѣщаетъ свѣтъ лица Твоего, всели, и насъ помилуй, яко благъ и Человѣколюбець. Аминь. *Поклонѣ.*

Подаждь, Господи, оставленіе грѣховъ всѣмъ прежде отшедшымъ въ вѣрѣ и надежди воскресенія, отцемъ, братіямъ и сестрамъ нашимъ, и сотвори имъ вѣчную память (*трижды*).

Окончаніе молитвъ.

Достойно есть, яко воистину, блажити Тя Богородицу, присноблаженную и пренепорочную и Матерь Бога нашего. Честнѣйшую херувимъ и славнѣйшую безъ сравненія серафимъ, безъ ислѣнія Бога Слова рождшую, сущую Богородицу Тя величаемъ.

Слава Отцу, и Сыну, и Святому Духу, и нынѣ и присно, и во вѣки вѣковъ. Аминь.

Господи, помилуй (*трижды*).

Господи, благослови. И отпустъ.

Господи Іисусе Христе, Сыне Божій, молитвъ ради Пречистыя Твоея Матере, преподобныхъ и Богоносныхъ отецъ нашихъ и всѣхъ святыхъ, помилуй насъ. Аминь.

МОЛИТВЫ ВЪ ПРОДОЛЖЕНІИ ДНЯ.

Предъ началомъ всякаго дѣла:

Господи, благослови. *Или:*

Господи Иисусе Христе, Сыне Единородный Безначальнаго Твоего Отца, Ты реклъ еси пречистыми усты Твоими: яко безъ Мене не можете творити ничесоже. Господи мой, Господи, вѣрою объемъ въ души моей и сердцѣ Тобою реченная, припадаю Твоей благодати: помози ми грѣшному сіе дѣло, мною начинаемо, о Тебѣ Самѣмъ совершити, во имя Отца и Сына и Святаго Духа. Аминь.

По окончаніи всякаго дѣла:

Слава Тебѣ, Господи. *Или:*

Исполненіе всѣхъ благихъ Ты еси,

Христе мой, исполни радости и веселія душу мою и спаси мя, яко единъ многомилостивъ.

Предъ ученіемъ:

Царю Небесный, Утѣшителю, Душе истины, Иже вездѣ сый и вся исполняй, Сокровище благихъ и жизни Подателю, прииди и вселися въ ны, и очисти ны отъ всякія скверны, и спаси, Блаже, души наша.

Или:

Преблагій Господи ! низпосли намъ благодать Духа Твоего Святаго, дарствующаго намъ смыслъ и укрѣпляющаго душевныя наши силы, дабы внимая преподаваемому намъ ученію, возрасли мы Тебѣ, нашему Создателю, во славу, родителямъ же нашимъ на утѣшеніе, церкви и отечеству на пользу.

Послѣ ученія:

Достойно есть, яко воистину, блажити Тя Богородицу, присноблаженную и пренепорочную и Матерь Бога нашего.

Честнѣйшую херувимъ и славнѣйшую
безъ сравненія серафимъ, безъ истлѣ-
нія Бога Слова рождшую, сущую Бого-
родицу Тя величаемъ.

Или:

Благодаримъ Тебе, Создателю, яко
сподобилъ еси насъ благодати Твоея,
во еже внимати ученію. Благослови на-
шихъ начальниковъ, родителей и учите-
лей, ведущихъ насъ къ познанію блага,
и подаждь намъ силу и крѣпость къ
продолженію ученія сего.

Предъ обѣдомъ и ужиномъ:

Отче нашъ, Иже еси на небесѣхъ! да
святится имя Твое, да прійдетъ Цар-
ствіе Твое: да будетъ воля Твоя, яко на
небеси, и на земли. Хлѣбъ нашъ насущ-
ный даждь намъ днесь: и остави намъ
долги наша, якоже и мы оставляемъ
должникомъ нашимъ: и не введи насъ
во искушеніе, но избави насъ отъ лу-
каваго.

Или:

Очи всѣхъ на Тя, Господи, уповаютъ,
и Ты даеши имъ пищу во благовреме-
ніи, отверзаеши Ты щедрую руку Твою
и исполняеши всякое животное благо-
воленія.

Послѣ обѣда и ужина:

Благодаримъ Тя, Христе Боже нашъ,
яко насытилъ еси насъ земныхъ Тво-
ихъ благъ: не лиши насъ и Небеснаго
Твоего Царствія.

Молитвы на сонъ грядущимъ.

Во имя Отца и Сына и Святаго Духа.
Аминь.

Господи Иисусе Христе, Сыне Божій,
молитвъ ради Пречистыя Твоея Матере,
преподобныхъ и Богоносныхъ отецъ на-
шихъ и всѣхъ святыхъ, помилуй насъ.
Аминь.

Слава Тебѣ, Боже нашъ, слава Тебѣ.

Царю Небесный, Утѣшителю, Душе
истины, Иже вездѣ сый и вся исполняяй,
Сокровище благихъ и жизни Подателю,
прииди и вселися въ ны, и очисти ны
отъ всякія скверны, и спаси, Блаже,
душы наша.

Святый Боже, Святый крѣпкій, Свя-
тый безсмертный, помилуй насъ (*три-
жды*).

Слава Отцу, и Сыну, и Святому Духу,
и нынѣ и присно, и во вѣки вѣковъ.
Аминь.

Пресвятая Троице, помилуй насъ: Господи, очисти грѣхи наша: Владыко, прости беззаконія наша: Святый, посѣти и исцѣли немощи наша, имене Твоего ради.

Господи, помилуй (*трижды*).

Слава Отцу, и Сыну, и Святому Духу,
и нынѣ и присно, и во вѣки вѣковъ.
Аминь.

Отче нашъ, Иже еси на небесѣхъ! да святится имя Твое, да приидеть Царствіе Твое: да будетъ воля Твоя, яко на небеси, и на земли. Хлѣбъ нашъ насущный даждь намъ днесь: и остави намъ долги наша, якоже и мы оставляемъ должникомъ нашимъ: и не введи насъ во искушеніе, но избави насъ отъ лукаваго.

Тропари:

Помилуй насъ, Господи, помилуй насъ: всякаго бо отвѣта недоумѣюще,

сію Ти молитву яко Владыцѣ грѣшніи приносимъ: помилуй насъ.

Слава Отцу, и Сыну, и Святому Духу:

Господи, помилуй насъ, на Тя бо упо-
вахомъ: не прогнѣвайся на ны зѣло,
ниже помяни беззаконій нашихъ: но
призри и нынѣ яко благоутробенъ, и
избави ны отъ врагъ нашихъ: Ты бо
еси Богъ нашъ, и мы людіе Твои, вси
дѣла руку Твоею, и имя Твое призы-
ваемъ.

И нынѣ и присно и во вѣки вѣковъ.
Аминь.

Милосердія двери отверзи намъ, бла-
гословенная Богородице, надѣющіися на
Тя да не погибнемъ, но да избавимся
Тобою отъ бѣдъ: Ты бо еси спасеніе
рода христіанскаго.

Господи, помилуй (12).

Молитва 1-я, святаго Макарія Великаго:

Боже вѣчный и Царю всякаго созда-
нія, сподобивый мя даже въ часъ сей
доспѣти, прости ми грѣхи, яже сотво-

рихъ въ сей день дѣломъ, словомъ и помышленіемъ, и очисти, Господи, смиренную мою душу отъ всякія скверны плоти и духа. И даждь ми, Господи, въ нощи сей сонъ прейти въ мирѣ, да воставъ отъ смиреннаго ми ложа, благоугожду пресвятому имени Твоему, во вся дни живота моего, и поперу борющія мя враги плотскія и безплотныя. И избави мя, Господи, отъ помышленій суетныхъ, оскверняющихъ мя, и похотей лукавыхъ. Яко Твое есть царство, и сила и слава, Отца, и Сына, и Святаго Духа, нынѣ и присно, и во вѣки вѣковъ. Аминь.

Молитва 2-я, святаго Антіоха:

Вседержителю, Слово Отчее, Самъ совершенъ сый, Іисусе Христе, многаго ради милосердія Твоего никогдаже отлучайся мене раба Твоего, но всегда во мнѣ почивай. Іисусе, добрый Пастырю Твоихъ овецъ, не предаждь мене крамолѣ змійнѣ и желанію сатанину не остави мене: яко сѣмя тли во мнѣ есть.

Ты убо, Господи Боже покланяемый, Царю Святыи, Иисусе Христе, спяща мя сохрани немерцающимъ свѣтомъ, Духомъ Твоимъ Святымъ, Имже освятилъ еси Твоя ученики. Дажь, Господи, и мнѣ, недостойному рабу Твоему, спасеніе Твое на ложи моемъ: просвѣти умъ мой свѣтомъ разума святаго евангелія Твоего, душу любовію креста Твоего, сердце чистотою словесе Твоего, тѣло мое Твоею страстію безстрастною, мысль мою Твоимъ смиреніемъ сохрани, и воздвигни мя во время подобно на Твое славословіе. Яко препрославленъ еси со безначальнымъ Твоимъ Отцемъ и съ Пресвятымъ Духомъ во вѣки. Аминь.

Молитва 3-я, Святому Духу:

Господи, Царю небесный, Утѣшителю, Душе истины, умиласердися и помилуй мя грѣшнаго раба Твоего, и отпусти ми недостойному, и прости вся, елика Ти согрѣшихъ днесъ, яко человекъ, паче же и не яко человекъ, но

и горѣ скота: вольныя моя грѣхи и невольныя, вѣдомыя и невѣдомыя: яже отъ юности и отъ науки злы, и яже суть отъ нагльства и унынія. Аще именемъ Твоимъ кляхся, или похулихъ е въ помышленіи моемъ: или кого укорихъ, или оклеветахъ кого гнѣвомъ моимъ, или опечалихъ, или о чемъ прогнѣвахся, или солгахъ, или безгодно спяхъ: или нищъ пріиде ко мнѣ, и презрѣхъ его: или брата моего опечалихъ, или свадихъ, или кого осудихъ: или развеличахся, или разгордѣхся, или разгнѣвахся: или стоящу ми на молитвѣ, умъ мой о лукавствіи міра сего подвижеся: или развращеніе помыслихъ: или объядохся, или опихся, или безъ ума смѣяхся: или лукавое помыслихъ, или доброту чуждую видѣвъ, и тою уязвенъ быхъ сердцемъ: или неподобная глаголахъ: или грѣху брата моего посмѣяхся, моя же суть безчисленная согрѣшенія: или о молитвѣ нерадихъ: или ино что содѣлавъ лукавое, не помню:

та бо вся и больша сихъ содѣяхъ. Помилуй мя, Творче мой, Владыко, унылаго и недостойнаго раба Твоего: и остави ми, и отпусти, и прости мя, яко благъ и человеколюбецъ: да съ миромъ лягу, усну и почію, блудный, грѣшный и окаянный азъ, и поклонюся, и воспою, и прославлю пречестное имя Твое, со Отцемъ, и едиnorodнымъ Его Сыномъ, нынѣ и присно и во вѣки. Аминь.

Молитва 4-я, святаго Макарія Великаго:

Что Ти принесу? или что Ти воздамъ, великодаровитый безсмертный Царю, щедре и человеколюбче Господи? яко лѣнящася мене на Твое угожденіе, и ничтоже благо сотворша, привелъ еси на конецъ мимошедшаго дне сего, обращеніе и спасеніе души моей строя. Милостивъ ми буди грѣшному и обнаженному всякаго дѣла блага, возстави падшую мою душу, осквернившуюся въ безмѣрныхъ согрѣшеніихъ: и отыми отъ мене весь помысль лукавый видимаго

сего житія. Прости моя согрѣшенія, едине безгрѣшне, яже Ти согрѣшихъ въ сей день, вѣдѣніемъ и невѣдѣніемъ, словомъ, и дѣломъ, и помышленіемъ, и всѣми моими чувствами. Ты самъ, покрывая, сохрани мя отъ всякаго сопротивнаго обстоянія Божественною Твоею властію и неизреченнымъ человеколюбіемъ и силою. Очисти, Боже, очисти множество грѣховъ моихъ. Благоволи, Господи, избавити мя отъ сѣти лукаваго, и спаси страстную мою душу, и осѣни мя свѣтомъ лица Твоего, егда приидеши во славу, и неосужденна нынѣ сномъ уснути сотвори, и безъ мечтанія, и несмущенъ помысль раба Твоего соблюди, и всю сатанину дѣтель отжечи отъ мене, и просвѣти ми разумныя очи сердечныя, да не усну въ смерть. И послѣ ми Ангела мирна, хранителя и наставника души и тѣлу моему, да избавитъ мя отъ врагъ моихъ: да воставъ со одра моего, принесу Ти благодарственныя мольбы. Ей, Господи, услыши мя грѣш-

наго и убогаго раба Твоего, изволені-
емъ и совѣстію: даруй ми воставшу
словесемъ твоимъ поучитися, и уныніе
бѣсовское далече отъ мене отгнано быти
сотвори Твоими ангелы: да благословлю
имя Твое святое, и прославлю, и слав-
лю пречистую Богородицу Марію, Юже
далъ еси намъ грѣшнымъ заступленіе,
и приими Сію, молящуюся за ны. Вѣмъ
бо, яко подражаетъ Твое человѣколюбіе,
и молящися не престааетъ. Тоя засту-
пленіемъ и честнаго Креста знаменіемъ,
и всѣхъ святыхъ Твоихъ ради, убогую
душу мою соблюди, Іисусе Христе, Бо-
же нашъ: яко святъ еси, и препросла-
вленъ во вѣки. Аминь.

Молитва 5-я:

Господи Боже нашъ, еже согрѣшихъ
во дни семъ словомъ, дѣломъ и помы-
шленіемъ, яко благъ и Человѣколюбецъ
прости ми. Миренъ сонъ и безмятеженъ
даруй ми: Ангела Твоего хранителя по-
сли, покрывающа и соблюдающа мя отъ

всякаго зла; яко Ты еси хранитель душамъ и тѣлесемъ нашимъ, и Тебѣ славу возсылаемъ, Отцу, и Сыну, и Святому Духу, нынѣ и присно, и во вѣки вѣковъ. Аминь.

Молитва 6-я:

Господи Боже нашъ, въ Негоже вѣровахомъ, и Егоже имя паче всякаго имени призываемъ, даждь намъ, ко сну отходящимъ, ослабу души и тѣлу, и соблюди насъ отъ всякаго мечтанія, и темныя сласти кромѣ: устави стремленіе страстей, угаси разжженія востанія тѣлеснаго: даждь намъ цѣломудреннѣ пожити дѣлы и словесы: да, добродѣтельное жителство воспріемлюще, обѣтованныхъ не отпадемъ благихъ Твоихъ, яко благословенъ еси во вѣки. Аминь.

**Молитва 7-я, святаго Іоанна Златоуста,
по числу часовъ дня и ночи:**

Господи, не лиши мене небесныхъ Твоихъ благъ. Господи, избави мя вѣч-

ныхъ мукъ. Господи, умою ли или помышленіемъ, словомъ или дѣломъ согрѣшихъ, прости мя. Господи, избави мя всякаго невѣдѣнія и забвенія, и малодушія и окамененнаго нечувствія. Господи, избави мя отъ всякаго искушенія. Господи, просвѣти мое сердце, еже помрачи лукавое похотѣніе. Господи, азъ яко человѣкъ согрѣшихъ, Ты же, яко Богъ щедръ, помилуй мя, видя немощь души моя. Господи, посли благодать Твою въ помощь мнѣ, да прослаблю имя Твое Святое. Господи Іисусе Христе, напиши мя раба Твоего въ книзѣ животнѣй и даруй ми конецъ благій. Господи Боже мой, аще и ничтоже благо сотворихъ предъ Тобою, но даждь ми по благодати Твоей положити начало благое. Господи, окропи въ сердца моемъ росу благодати Твоея. Господи небесе и земли, помани мя грѣшнаго раба Твоего, студнаго и нечистаго, во Царствіи Твоемъ. Аминь.

Господи, въ покаяніи пріими мя. Го-

споди, не остави мене. Господи, не введи мене въ напасть. Господи, даждь ми мысль благу. Господи, даждь ми слезы и память смертную и умиленіе. Господи, даждь ми помысль исповѣданія грѣховъ моихъ. Господи, даждь ми смиреніе, цѣломудріе и послушаніе. Господи, даждь ми терпѣніе, великодушіе и кротость. Господи, всели въ мя корень благихъ, страхъ Твой въ сердце мое. Господи, сподоби мя любити Тя отъ всея души моя и помышленія и творити во всемъ волю Твою. Господи, покрый мя отъ человѣкъ нѣкоторыхъ, и бѣсовъ, и страстей, и отъ всякія иныя неподобныя вещи. Господи, вѣси, яко твориши, якоже Ты волиши, да будетъ воля Твоя и во мнѣ грѣшнѣмъ, яко благословенъ еси во вѣки. Аминь.

Молитва 8-я, ко Господу нашему Іисусу Христу:

Господи Іисусе Христе, Сыне Божій, ради честнѣйшія Матере Твоея, и безплотныхъ Твоихъ ангелъ, пророка же и

Предтечи и Крестителя Твоего, Богоглаголивыхъ же Апостолъ, свѣтлыхъ и добропобѣдныхъ мученикъ, преподобныхъ и Богоносныхъ отецъ, и всѣхъ святыхъ молитвами, избави мя настоящаго обстоянія бѣсовскаго. Ей, Господи мой и Творче, не хотѣй смерти грѣшнаго, но якоже обратится и живу быти ему, даждь и мнѣ обращеніе окаянному и недостойному; изми мя отъ устъ пагубнаго змія, зіяющаго пожрети мя ивести во адъ жива. Ей, Господи мой, утѣшеніе мое, Иже мене ради окаяннаго, въ тлѣнную плоть оболкійся, исторгни мя отъ окаянства, и утѣшеніе подаждь души моей окаяннѣй. Всади въ сердце мое творити Твоя повелѣнія, и оставити лукавая дѣянія, и получитьи блаженства Твоя: на Тя бо, Господи, уповахъ, спаси мя.

Молитва 9-я, ко Пресвятѣй Богородицѣ:

Благаго Царя благая Мати, Пречистая и Благословенная Богородице Ма-

ріе, милость Сына Твоего и Бога нашего излей на страстную мою душу и Твоими молитвами настави мя на дѣянія благая, да прочее время живота моего безъ порока преїду и Тобою рай да обрящу, Богородице Дѣво, едина чистая и благословенная.

Молитва 10-я, ко святому Ангелу Хранителю:

Ангеле Христовъ, хранителю мой свя-
тый и покровителю души и тѣла моего, вся ми прости, елика согрѣшихъ во
днешній день: и отъ всякаго лукавствія
противнаго ми врага избави мя, да ни
въ коемже грѣсѣ прогнѣваю Бога моего: но моли за мя грѣшнаго и недостойнаго раба, яко да достойна мя покажеша благодати и милости Всесвятыя
Троицы и Матере Господа моего Іисуса Христа и всѣхъ святыхъ. Аминь.

Кондакъ Богородицѣ:

Взбранной Воеводѣ побѣдительная,
яко избавльшеся отъ злыхъ, благодар-
ственная восписуемъ Ти раби Твои,

Богородице: но яко имущая державу непобѣдимую, отъ всякихъ насъ бѣдь свободы, да зовемъ Ти: радуйся, Невѣсто Невѣстная.

Преславная Приснодѣво, Мати Христа Бога, принеси нашу молитву Сыну Твоему и Богу нашему, да спасеть Тобою души наша.

Все упованіе мое на Тя возлагаю, Мати Божія, сохрани мя подъ кровомъ Твоимъ.

Богородице Дѣво, не презри мене грѣшнаго, требующа Твоея помощи и Твоего заступленія: на Тя бо упова душа моя, и помилуй мя.

Упованіе мое Отець, прибѣжище мое Сынъ, покровъ мой Духъ Святый, Троице Святая, слава Тебѣ.

Достойно есть, яко воистину, блажити Тя Богородицу, присноблаженную и пренепорочную и Матерь Бога нашего. Честнѣйшую херувимъ и славнѣйшую безъ сравненія серафимъ, безъ истлѣнія

Бога Слова рождшую, сущую Богородицу Тя величаемъ.

Слава Отцу, и Сыну, и Святому Духу, и нынѣ и присно, и во вѣки вѣковъ. Аминь.

Господи, помилуй (*трижды*).

Господи, благослови. *И отпусти:*

Господи Іисусе Христе, Сыне Божій, молитвъ ради Пречистыя Твоея Матере, преподобныхъ и Богоносныхъ отецъ нашихъ и всѣхъ святыхъ, помилуй насъ. Аминь.

Молитва святаго Іоанна Дамаскина,
юже, указуя на одръ твой, глаголи:

Владыко Человѣколюбче, не ужели мнѣ одръ сей гробъ будетъ; или еще окаянную мою душу просвѣтиши днемъ? се ми гробъ предлежитъ, се ми смерть предстоитъ. Суда Твоего, Господи, боюся, и муки безконечныя, злое же твоя не престаю: Тебе Господа Бога моего всегда прогнѣвляю, и Пречистую Твою Матерь, и вся небесныя Силы, и святаго Ангела хранителя моего. Вѣмъ убо, Го-

споди, яко недостойнъ есмь чловѣколюбія Твоего, но достоинъ есмь всякаго осужденія и муки. Но, Господи, или хочу, или не хочу, спаси мя. Аще бо праведника спасеши, ничтоже веліе: и аще чистаго помилуеши, ничтоже дивно: достойни бо суть милости Твоя. Но на мнѣ грѣшнѣмъ удиви милость Твою: о семъ яви чловѣколюбіе Твое, да не одолѣетъ моя злоба Твоей неизглаголаннѣй благодати и милосердію: и якоже хочеши, устрой о мнѣ вещь.

И тако хотяй возлещи на одрѣ, глаголи сіе:

Просвѣти очи мои, Христе Боже, да не когда усну въ смерть, да не когда речетъ врагъ мой: укрѣпихся на него.

Заступникъ души моя буди, Боже, яко посредѣ хожду сѣтей многихъ; избави мя отъ нихъ, и спаси мя, Блаже, яко Чловѣколюбецъ.

Преславную Божию Матерь, и святыхъ ангелъ святѣйшую немолчно воспоймъ, сердцемъ и усты Богородицу

сію исповѣдающе, яко воистинну рождающую намъ Бога воплощенна, и молящуюся непрестанно о душахъ нашихъ.

Таже цѣлуй крестъ твой, и знаменай крестомъ мѣсто твое отъ главы и до ногъ, такожде и отъ всѣхъ странъ, глаголя молитву Честному Кресту:

Да воскреснетъ Богъ, и расточатся врази Его, и да бѣжатъ отъ лица Его ненавидящій Его: яко исчезаетъ дымъ, да исчезнутъ, яко таетъ воскъ отъ лица огня, тако да погибнутъ бѣси отъ лица любящихъ Бога, и знаменующихся крестнымъ знаменіемъ, и въ веселіи глаголющихъ: радуйся, пречестный и животворящій Кресте Господень, прогоняяй бѣсы силою на тебѣ пропятаго Господа нашего Іисуса Христа, во адъ сшедшаго, и поправшаго силу діаволу, и даровавшаго намъ тебе Крестъ Свой честный, на прогнаніе всякаго супостата. О пречестный и животворящій Кресте Господень, помогай ми со Святою Госпожею Дѣвою Богородицею, и со всѣми святыми во вѣки, аминь.

Или:

Огради мя, Господи, силою честнаго и животворящаго Твоего Креста и сохрани мя отъ всякаго зла.

Таже, вмѣсто прощенія:

Ослаби, остави, прости, Боже, прегрѣшенія наша вольная, и невольная, яже въ словѣ и въ дѣлѣ, яже въ вѣдѣніи и не въ вѣдѣніи, яже во дни и въ нощи, яже въ умѣ и въ помышленіи: вся намъ прости яко Благъ и Человѣколюбецъ.

Молитва:

Ненавидящихъ и обидящихъ насъ прости, Господи Человѣколюбче. Благоутворящимъ благосотвори. Братіямъ и сродникомъ нашимъ даруй яже ко спасенію прошенія и жизнь вѣчную: въ немощехъ сущія посѣти, и исцѣленіе даруй. Иже на мори управи. Путешествующимъ спутешествуй. Православнымъ христіаномъ споборствуй. Служащимъ и милующимъ насъ грѣховъ

оставленіе даруй. Заповѣдавшихъ намъ недостойнымъ молитися о нихъ помилуй по величѣй Твоей милости. Помяни, Господи, прежде усопшихъ отецъ и братій нашихъ, и упокой ихъ идѣже присѣщаетъ свѣтъ лица Твоего. Помяни, Господи, братій нашихъ плѣнныхъ, и избави я отъ всякаго обстоянія. Помяни, Господи, плодоносящихъ и добродѣлающихъ во святыхъ Твоихъ церквахъ, и даждь имъ яже ко спасенію прошенія и жизнь вѣчную. Помяни, Господи, и насъ смиренныхъ и грѣшныхъ и недостойныхъ рабъ Твоихъ, и просвѣти нашъ умъ свѣтомъ разума Твоего, и настави насъ на стезю заповѣдей Твоихъ: молитвами Пречистыя Владычицы нашея Богородицы и Приснодѣвы Маріи, и всѣхъ Твоихъ святыхъ, яко благословенъ еси во вѣки вѣковъ, аминь.

Исповѣданіе грѣховъ повседневное:

Исповѣдаю Тебѣ Господу Богу моему и Творцу, во Святѣй Троицѣ еди-

ному, славимому и покланяемому Отцу, и Сыну, и Святому Духу, вся моя грѣхи, яже содѣяхъ во вся дни живота моего, и на всякій часъ, и въ настоящее время, и въ прешедшія дни и ноци, дѣломъ, словомъ, помышленіемъ, объяденіемъ, пїянствомъ, тайнояденіемъ, празднословіемъ, уныніемъ, лѣнностію, прекословіемъ, непослушаніемъ, оклеветаніемъ, осужденіемъ, небреженіемъ, самолюбіемъ, многостяжаніемъ, хищеніемъ, неправдоглаголаніемъ, сквернопробытчествомъ, мшелоимствомъ, ревнованіемъ, завистію, гнѣвомъ, памятозлобіемъ, ненавистію, лихоимствомъ и всѣми моими чувствами: зрѣніемъ, слухомъ, обоняніемъ, вкусомъ, осязаніемъ и прочими моими грѣхи, душевными вкупѣ и тѣлесными, имиже Тебе Бога моего и Творца прогнѣвахъ, и ближняго моего онеправдовахъ: о сихъ жалѣя, вина себе Тебѣ Богу моему представляю и имѣю волю каятися: точію Господи Боже мой, помози ми, со слезами сми-

ренно молю Тя: прешедшая же согрѣшенія моя милосердіемъ Твоимъ прости ми, и разрѣши отъ всѣхъ сихъ, яже изглаголахъ предъ Тобою, яко Благъ и Человѣколюбецъ.

Егда предаешися сну, глаголи:

Въ руцѣ Твои, Господи Іисусе Христе, Боже мой, предаю духъ мой. Ты же мя благослови, Ты мя помилуй и животъ вѣчный даруй ми. Аминь.

Канонъ умиленный ко Господу нашему Иисусу Христу.

Гласъ 2-й. Пѣснь 1.

И р м о с ь : Во глубинѣ постла иногда фараонитское всевоинство преоруженная сила, воплощенное же Слово всезлбный грѣхъ потребило есть: препрославленный Господь, славно бо прославился.

Припѣвъ: Иисусе сладчайшій, спаси мя.

Иисусе сладчайшій Христе, Иисусе долготерпѣливѣ, души моея язвы исцѣли, Иисусе, и улади сердце мое многими-лостивѣ, молюся, Иисусе Спасе мой, да величаю Тя спасаемый.

Иисусе сладчайшій Христе, Иисусе, отверзи покаянія ми дверь, человѣко-любче Иисусе, и приими мя, Тебѣ припадающа, и теплѣ просяща, Иисусе Спасе мой, согрѣшеній прощенія.

Слава: Ісусе сладчайшій Христе, Ісусе, исхити мя изъ руки льстиваго веліара, Ісусе, и сотвори деснаго предстоятеля славы Твоея, Ісусе Спасе мой, части шуїя мя избавляяй.

И нынѣ: Ісуса рождшая Бога, Владычице, моли о непотребныхъ рабѣхъ, Пречистая, яко да муки молитвами Твоими избавимся, Нескверная, оскверненіи, славы присносущныя наслаждающеса.

Пѣснь 3.

Ирмосъ: На камени мя вѣры утвердивъ, разширилъ еси уста моя на враги моя, возвесели бо ся духъ мой, внегда пѣти: нѣсть святъ, якоже Богъ нашъ, и нѣсть праведенъ паче Тебе, Господи.

Услыши, Человѣколюбче Ісусе мой, раба Твоего, вопіюща во умиленіи, и избави мя, Ісусе, осужденія и муки, едине Долготерпѣливѣ, Ісусе сладчайшій Многомилостивѣ.

Подъими раба Твоего, Ісусе мой, припадающа со слезами, Ісусе мой, и

спаси, Иисусе мой, кающагося мя и геенны, Владыко, избави, Иисусе сладчайшій Многомилостиве.

Слава: Время, Иисусе мой, еже далъ ми еси, въ страсти иждихъ, Иисусе мой; тѣмже, Иисусе мой, не отвержи мя, но воззови, молюся, Владыко, Иисусе сладчайшій, и спаси.

И нынѣ: Дѣво рождшая Иисуса моего, моли избавити мя геенны, едино предстательство оскорбляемыхъ Богоблагодатная, и сподоби мя жизни, Всенепорочная, нестарѣющіяся.

Сѣдалень, гласъ 1-й.

Спасе мой Иисусе, блуднаго спасый, Спасе мой Иисусе, пріемый блудницу, и мене нынѣ помилуй, Иисусе Многомилостиве: спаси, ущедри, о Иисусе Благодѣтелю, якоже, Благоутробне, Манассію, Иисусе мой, яко единъ Человѣколюбецъ.

Пѣснь 4.

И р м о с ъ : Пришелъ еси отъ Дѣвы, не ходатай, ни Ангелъ, но Самъ Господи воплощся, и спаслъ еси всего мя человѣка. Тѣмъ зову Ти: слава силѣ Твоей, Господи.

Исцѣли, Іисусе мой, души моея язвы, Іисусе мой, молюся, и руки мя исхити, Іисусе мой Благоутробне, душеплѣннаго велиара, и спаси.

Согрѣшихъ, Іисусе мой сладчайшій, Благоутробне: Іисусе мой, спаси мя прибѣгающаго къ покрову Твоему, Іисусе Долготерпѣливе, и царствія Твоего мя сподоби.

Слава: Никтоже согрѣши, Іисусе мой, якоже согрѣшихъ азъ окаянный: но припадаю моляся, Іисусе мой, спаси мя, и жизни, Іисусе мой, послѣдіе ми даруй.

И нынѣ: Всепѣтая Іисуса рождшая Господа, Того моли избавити муки вся поющыя Тя, и Богородицу воистинну именующыя.

П ѣ с н ь 5.

И р м о с ь : Просвѣщеніе во тмѣ лежащихъ, спасеніе отчаянныхъ, Христе Спасе мой, къ Тебѣ утренюю Царю мира, просвѣти мя сіяніемъ Твоимъ: иного бо развѣ Тебе Бога не знаю.

Ты просвѣщеніе, Іисусе мой, ума моего, Ты спасеніе отчаянныя души моея, Спасе, Ты, Іисусе мой, муки избави, и геенны мя зовуща: спаси, Іисусе мой Христе, мя окаяннаго.

Всеконечно, Іисусе мой, ко страсти безчестія низверженъ нынѣ зову: Ты, Іисусе мой, помощи ми руку низполавъ, исторгни зовуща: спаси, Іисусе мой, Христе, мя окаяннаго.

Слава: Оскверненъ умъ, Іисусе мой, обнося взываю Ти: очисти мя отъ скверны прегрѣшеній, и избави мя во глубины злобы отъ невѣдѣнія низпоползшагося, Спасе Іисусе мой, и спаси мя, молюся.

И нынѣ: Іисуса рождная, Отроковице Богородительнице, Того умоли спасти вся православныя, монахи и мірскія, и геенны избавити зовущыя: развѣ Тебе предстательства твердаго не знаемъ.

Пѣснь 6.

Ирмосъ : Въ безднѣ грѣховнѣй валяяся, неизслѣдную милосердія Твоего призываю бездну: отъ тли, Боже, мя возведи.

Иисусе мой Христе многомилостиве, исповѣдающаяся пріими мя, Владыко, о Иисусе, и спаси мя, и отъ тли, Иисусе, мя исхити.

Иисусе мой, никтоже бысть инѣ блудникъ, якоже азъ страстный, о Иисусе челоувѣколюбче: но Ты Иисусе, мя спаси.

Слава: Иисусе мой, блудницу и блуднаго, и Манассію и мытаря преидохъ, о Иисусе мой, страстьми, и разбойника, Иисусе, и ниневитяны.

И нынѣ: Иисуса Христа моего рождшая, пречистая Дѣво, едина нескверная, осквернена суща мя, молитвъ твоихъ вссопомъ нынѣ очисти.

Пѣснь 7.

Ирмосъ : Образу златому, на полѣ Деирѣ служиму, тріе Твои отроцы небрегоша безбожнаго велѣнія: посредѣ же огня ввержени, орошаеми пояху: благословенъ еси, Боже отецъ нашихъ.

Христе Іисусе, никтоже согрѣши на земли отъ вѣка, о Іисусе мой, якоже согрѣшихъ азъ окаянный и блудный. Тѣмже, Іисусе мой, вопію Ти: поюща мя ущедри, благословенъ еси, Боже отецъ нашихъ.

Христе Іисусе, ко страху Твоему, вопію, пригвозди мя, о Іисусе мой, и окорми нынѣ ко пристанищу благоотитному, яко да, Іисусе мой щедре, пою Ти спасаемый: благословенъ еси, Боже отецъ нашихъ.

Слава: Христе Іисусе, тмами обѣщахъ Тебѣ страстный, о Іисусе мой, покаяніе, но солгахъ окаянный. Тѣмже, Іисусе мой, вопію Ти: нечувствениѣ пребывающую душу мою просвѣти, Христе, отцевъ Боже, благословенъ еси.

И нынѣ: Христа Іисуса рождшая странно и паче естества, Того моли Всенепорочная, яже чрезъ естество моя прегрѣшенія вся прости ми, Отроковице, да зову спасаемый: благословенна еси, Бога плотію рождшая.

Пѣснь 8.

Ирмосъ: Въ пещь огненную ко отрокомъ Еврейскимъ снишедшаго, и пламень въ росу преложшаго Бога, пойте дѣла яко Господа, и превозносите во вся вѣки.

Тя, Иисусе мой, молю: якоже блудницу, Иисусе мой, избавилъ еси многихъ согрѣшеній, тако и мене, Иисусе Христе мой, избави и очисти оскверненную душу мою, Иисусе мой.

Преклонився, Иисусе, безсловесными сластями, безсловесенъ явихся, и скотомъ воистинну, о Иисусе мой, страстно окаянный уподобихся, Спасе: тѣмже, Иисусе, безсловесія мя избави.

Слава: Впадъ, о Иисусе, въ душегубительныя разбойники, обнажился одежды, Иисусе мой, боготканная нынѣ, и лежу ранами уязвенъ: елей, Христе мой, возлей на мя и вино.

И нынѣ: Иисуса моего и Бога носившая Христа несказанно, Богородице Маріе, Того моли присно, отъ бѣдъ спастися рабомъ Твоимъ, и пѣвцемъ Твоимъ, неискусомужная Дѣво.

ПѢСНЬ 9.

И р м о с ь : Отъ Бога Бога Слова, неизреченною мудростію пришедшаго обновити Адама, ядію въ тлѣніе падшаго лютѣ, отъ Святыя Дѣвы неизреченно воплотившагося насъ ради, вѣрніи единомудренно пѣснями величаемъ.

Манассію, Іисусе мой, мытаря, блудницу, блуднаго, щедре Іисусе, и разбойника преидохъ, Іисусе мой, въ дѣлѣхъ студныхъ и безмѣстныхъ, Іисусе: но Ты, Іисусе мой, предваривъ мя, спаси.

Отъ Адама, Іисусе мой, согрѣшившійся вся, прежде закона и въ законѣ, Іисусе, и по законѣ, окаянный, и благодати, Іисусе мой, побѣдихъ страстьми окаянно: но Ты, Іисусе мой, судьбами Твоими спаси мя.

Слава: Да не отлученъ буду, Іисусе мой, неизреченныя Твоя славы, да не улучу части, Іисусе, шуіа, сладчайшій Іисусе: но Ты мя деснымъ овцамъ Твоимъ, Христе Іисусе мой, сочетаваъ, упокой, яко благоутробенъ.

И нынѣ: Іисуса, Богородице, Егоже носила еси, едина неискусомужная Дѣ-

во Маріе, Того, Чистая, умилостави, яко Сына Твоего и Зиждителя, избавити притекающыя къ Тебѣ искушеній и бѣдъ и огня будущаго.

Молитва ко Господу нашему Иисусу Христу.

Владыко Господи Иисусе Христе Боже мой, Иже неизреченнаго ради Твоего человеколюбія, на конецъ вѣковъ въ плоть оболкѣйся отъ Приснодѣвы Маріи, славлю о мнѣ Твое спасительное промышленіе рабъ Твой, Владыко: пѣснословлю Тя, яко Тебе ради Отца познахъ: благословляю Тя, Егоже ради и Духъ Святый въ міръ прииде: покланяюся Твоей по плоти Пречистѣй Матери, таковѣй страшнѣй тайнѣ послужившей: восхваляю Твоя ангельская ликостоянія, яко воспѣватели и служители Твоего величества; ублажаю предтечу Іоанна, Тебе крестившаго, Господи: почитаю и провозвѣстившыя Тя пророки, прославляю апостолы Твоя святыя: торжествую же и мученики, священники же

Твоя славлю: поклоняюся преподобнымъ
Твоимъ, и вся Твоя праведники пѣстун-
ствую. Таковаго и толикаго многаго и
неизреченнаго лика божественнаго въ
молитву привожу Тебѣ всещедрому Бо-
гу рабъ Твой, и сего ради прошу мо-
имъ согрѣшеніемъ прощенія, еже да-
руй ми всѣхъ Твоихъ ради святыхъ, из-
рядиже же святыхъ Твоихъ щедротъ, яко
благословенъ еси во вѣки, аминь.

**Акаѳистъ сладчайшему Господу
нашему Иисусу Христу.**

Кондакъ 1.

Возбранный Воеводо и Господи, ада побѣдителю, яко избавлься отъ вѣчныя смерти, похвальная восписую Ти, создание и рабъ Твой: но яко имѣяй милосердіе неизреченное, отъ всякихъ мя бѣдь свободи, зовуща: Иисусе Сыне Божій, помилуй мя.

Икосъ 1.

Ангеловъ Творче, и Господи силъ, отверзи ми недоумѣнный умъ и языкъ, на похвалу Пречистаго Твоего имени,

якоже глухому и гугнивому древле
слухъ и языкъ стверзлъ еси, и глаго-
лаше зовый таковая: Иисусе пречудный,
ангеловъ удивленіе: Иисусе пресильный,
прародителей избавленіе. Иисусе пре-
сладкій, патріарховъ величаніе: Иисусе
преславный, царей укрѣпленіе. Иисусе
прелюбимый, пророковъ исполненіе:
Иисусе предивный, мучениковъ крѣпо-
сте. Иисусе претихій, монаховъ радости:
Иисусе премилостивый, пресвитеровъ сла-
доте. Иисусе премилосердый, постни-
ковъ воздержаніе: Иисусе пресладостный,
преподобныхъ радованіе. Иисусе прече-
стный, дѣвственныхъ цѣломудріе: Иису-
се предвѣчный, грѣшниковъ спасеніе.
Иисусе Сыне Божій, помилуй мя.

Кондакъ 2.

Видя вдовицу зѣльнѣ плачущу, Гос-
поди, якоже бо тогда умилосердився, сы-
на ея на погребеніе несомъ воскресилъ
еси: сице и о мнѣ умилосердися Человѣ-
колюбче, и грѣхми умерщвленную мою
душу воскреси, зовущу: Аллилуіа.

Икосъ 2.

Разумъ неурзумѣнный разумѣти Филиппъ ища, Господи, покажи намъ Отца, глаголаше, Ты же къ нему: толикое время сый со Мною, не позналъ ли еси, яко Отецъ во Мнѣ, и Азъ во Отцѣ есмь? Тѣмже, Неизслѣдованне, со страхомъ зову Ти: Иисусе, Боже предвѣчный: Иисусе, Царю пресильный. Иисусе, Владыко долготерпѣливый: Иисусе, Спасе премилостивый. Иисусе, хранителю мой преблагій: Иисусе, очисти грѣхи моя. Иисусе, отъими беззаконія моя: Иисусе, отпусти неправды моя. Иисусе, надеждо моя, не остави мене: Иисусе, помощниче мой, не отрини мене. Иисусе, Создателю мой, не забуди мене: Иисусе, Пастырю мой, не погуби мене. Иисусе Сыне Божій, помилуй мя.

Кондакъ 3.

Силою свыше апостолы облекій Иисусе, во Іерусалимѣ сѣдящия, облацы и мене обнаженнаго отъ всякаго благоотво-

ренія, теплотою Духа Святаго Твоего, и даждь ми съ любовію пѣти Тебѣ: Аллилуіа.

Икосъ 3.

Имѣяй богатство милосердія, мытари и грѣшники, и невѣрныя призвалъ еси Иисусе: не презри и мене нынѣ, подобнаго имъ, но яко многоцѣнное мѣро, приими пѣснь сію: Иисусе, сило непобѣдимая: Иисусе, милосте безконечная. Иисусе, красото пресвѣтлая: Иисусе, любви неизреченная. Иисусе, Сыне Бога живаго: Иисусе, помилуй мя грѣшнаго. Иисусе, услыши мя въ беззаконіихъ зачатого: Иисусе, очисти мя во грѣсѣхъ рожденнаго. Иисусе, научи мя непотребнаго: Иисусе, освѣти мя темнаго. Иисусе, очисти мя сквернаго: Иисусе, возведи мя блуднаго. Иисусе Сыне Божій, помилуй мя.

Кондакъ 4.

Бурю внутрь имѣяй помышлений сумнительныхъ Петръ, утопаше: узрѣвъ

же во плоти Тя суща, Иисусе, и по
водамъ ходяща, позна Тя Бога истин-
наго, и руку спасенія получивъ, рече:
Аллилуіа.

Икосъ 4.

Слыша слѣпый мимоходяща Тя, Го-
споди, путемъ, вопіаще: Иисусе Сыне
Давидовъ, помилуй мя: и призвавъ,
отверзль еси очи его. Просвѣти убо ми-
лостію Твоею очи мысленныя сердца и
мене, вопіюща Ти и глаголюща: Иисусе,
вышнихъ Создателю: Иисусе, нижнихъ
Искупителю. Иисусе, преисподнихъ по-
требителю: Иисусе, всея твари украси-
телю. Иисусе, души моя утѣшителю:
Иисусе, ума моего просвѣтителю. Иисусе,
сердца моего веселіе: Иисусе, тѣла мое-
го здравіе. Иисусе, Спасе мой, спаси
мя: Иисусе, свѣте мой, просвѣти мя.
Иисусе, муки всякія избави мя: Иисусе,
спаси мя недостойнаго. Иисусе Сыне Бо-
жій, помилуй мя.

Кондакъ 5.

Боготочною кровію, якоже искупилъ

еси насъ древле отъ законныя клятвы, Иисусе: сице изми насъ отъ сѣти, еюже змій запяты ны страстьми плотскими, и блуднымъ наважденіемъ, и злымъ уныніемъ, вопіющыя Ти: Аллилуіа.

Икосъ 5.

Видѣвше отроцы Еврейстїи во образѣ человѣчествѣмъ Создавшаго рукою человѣка, и Владыку разумѣвше Его, потщашася вѣтвymi угодити Ему, осанна вопіюще. Мы же пѣснь приносимъ Ти, глаголюще: Иисусе, Боже истинный: Иисусе, Сыне Давидовъ. Иисусе, Царю преславный: Иисусе, Агнче непорочный. Иисусе, Пастырю предивный: Иисусе, хранителю во младости моей. Иисусе, кормителю во юности моей: Иисусе, похвало въ старости моей. Иисусе, надеждо въ смерти моей: Иисусе, животе по смерти моей. Иисусе, утѣшеніе мое на судѣ Твоемъ: Иисусе, желаніе мое, не посрами мене тогда. Иисусе Сыне Божій, помилуй мя.

Кондакъ 6.

Проповѣдникъ Богоносныхъ вѣщаніе
и глаголы исполняя, Иисусе, на земли
явлься, и съ человѣки Невмѣстимый по-
жилъ еси: и болѣзни наша подъялъ еси:
отнюдуже ранами Твоими мы исцѣлѣв-
ше, пѣти навыхомъ: Аллилуіа.

Икосъ 6.

Воссія вселеннѣй просвѣщеніе исти-
ны Твоея, и отгнася леть бѣсовская:
идоли бо, Спасе нашъ, не терпяще Твоея
крѣпости, падоша: мы же, спасеніе по-
лучивше, вопіемъ Ти: Иисусе, истинно,
леть отгоняющая: Иисусе, свѣте, пре-
вышій всѣхъ свѣтлостей. Иисусе Ца-
рю, премогай всѣхъ крѣпости: Иисусе
Боже, пребывай въ милости. Иисусе,
хлѣбе животный, насыти мя алчущаго:
Иисусе, источниче разума, напой мя жа-
ждущаго. Иисусе, одеждо веселія, одѣй
мя тлѣннаго: Иисусе, покрове радости,
покрый мя недостойнаго. Иисусе, подате-
лю просящимъ, даждь ми плачь за грѣ-

хи моя: Иисусе, обрѣтеніе ищущихъ, обрящи душу мою. Иисусе, отверзителию толкущимъ, отверзи сердце мое окаянное: Иисусе, искупителю грѣшныхъ, очисти беззаконія моя. Иисусе Сыне Божій, помилуй мя.

Кондакъ 7.

Хотя сокровенную тайну отъ вѣка открыти, яко овча на заклєніе веденъ былъ еси, Иисусе, и яко агнецъ прямо стригущаго его безгласенъ, и яко Богъ изъ мертвыхъ воскреслъ еси, и со славою на небеса вознеслся еси, и насъ совоздвиглъ еси, зовущихъ: Аллилуіа.

Икосъ 7.

Дивную показа тварь явлейся Творецъ намъ: безъ сѣмене отъ Дѣвы воплотися, изъ гроба, печати не рушивъ, воскресе, и ко Апостоломъ дверемъ затвореннымъ съ плотію вниде. Тѣмже чудящєся, воспоймъ: Иисусе, Слове не обѣименный: Иисусе, Слове несоглюдаемый. Иисусе, сило непостижимая: Иисусе,

мудросте недомыслимая. Иисусе, Божество неописанное: Иисусе, господство неизчетное. Иисусе, царство непобѣдимое: Иисусе, владычество безконечное. Иисусе, крѣпосте высочайшая: Иисусе, власти вѣчная. Иисусе, Творче мой, ущедри мя: Иисусе, Спасе мой, спаси мя. Иисусе Сыне Божій, помилуй мя.

Кондакъ 8.

Странно Бога вочеловѣчшася видяще, устранимся суетнаго міра, и умъ на Божественная возложимъ: сего бо ради Богъ на землю сниде, да насъ на небеса возведетъ, вопіющихъ Ему: Аллилуіа.

Икосъ 8.

Весь бѣ въ нижнихъ, и вышнихъ никакже отступи Неизчетный, егда волею насъ ради пострада, и смертію Своею нашу смерть умертви, и воскресеніемъ животь дарова, поющимъ: Иисусе, сладосте сердечная: Иисусе, крѣпосте тѣлесная. Иисусе, свѣтлосте душевная: Иисусе, быстро умная. Иисусе, радости совѣст-

ная: Иисусе, надеждо извѣстная. Иисусе, памяти предвѣчная: Иисусе похвало высокая. Иисусе, славо моя превознесенная: Иисусе, желаніе мое, не отрини мене. Иисусе, Пастырю мой, взыщи мене: Иисусе, Спасе мой, спаси мене. Иисусе Сыне Божій, помилуй мя.

Кондакъ 9.

Все естество Ангельское безпрестанно славить Пресвятое имя Твое, Иисусе, на небеси, Святъ, Святъ, Святъ вопіюще: мы же грѣшніи на земли, бренными устнами вопіемъ: Аллилуіа.

Икосъ 9.

Вѣтіа многовѣщанныя, якоже рыбы безгласныя видимъ о Тебѣ, Иисусе Спасе нашъ: недоумѣють бо глаголати, како Богъ непреложный, и человекъ совершенный пребываеши: мы же таинству дивящися, вопіемъ вѣрно: Иисусе, Боже предвѣчный: Иисусе, Царю царствующихъ. Иисусе, Владыко владѣющихъ: Иисусе, Судіе живыхъ и мертвыхъ. Иису-

се, надеждо ненадежныхъ: Иисусе, утѣшеніе плачущихъ. Иисусе, славо нищихъ: Иисусе, не осуди мя по дѣломъ моимъ. Иисусе, очисти мя по милости Твоей: Иисусе, отжени отъ мене уныніе. Иисусе, просвѣти моя мысли сердечныя: Иисусе, даждь ми память смертную. Иисусе Сыне Божій, помилуй мя.

Кондакъ 10.

Спасти хотя міръ, Восточе востоковъ, къ темному западу, естеству нашему пришедъ, смирился еси до смерти: тѣмъ же превознесся имя Твое паче всякаго имене, и отъ всѣхъ колѣнъ небесныхъ и земныхъ слышиши: Аллилуіа.

Икосъ 10.

Царю превѣчный, Утѣшителю Христе истинный, очисти ны отъ всякія скверны, якоже очистилъ еси десять прокаженныхъ: и исцѣли ны, якоже исцѣлилъ еси сребролюбивую душу Закхеа мытаря, да вопіемъ Ти во умиленіи, зовуще: Иисусе, сокровище не-

тлѣнное: Иисусе, богатство неистощимое. Иисусе, пище крѣпкая: Иисусе, питіе неисчерпаемое. Иисусе, нищихъ одѣяніе: Иисусе, вдовъ заступленіе. Иисусе, сирыхъ защитниче: Иисусе, труждающихся помощи. Иисусе, странныхъ наставниче: Иисусе, плавающихъ кормчій. Иисусе, бурныхъ отишіе: Иисусе Боже, воздвигни мя падшаго. Иисусе Сыне Божій, помилуй мя.

Кондакъ 11.

Пѣніе всеумилненное приношу Ти недостойный, вопію Ти яко Хананеа: Иисусе, помилуй мя: не дочь бо, но плоть имамъ страстьми лютѣ бѣсящуюся, и яростію палимую, и исцѣленіе даждь вопіюще Ти: Аллилуіа.

Икосъ 11.

Свѣтоподательна свѣтильника сущымъ во тмѣ неразумія, прежде гоняй Тя Павелъ, Богоразумнаго гласа силу внуши, и душевную быстроту уясни: сице и мене темныя зѣницы душевныя

просвѣти, зовуща: Іисусе, Царю мой прекрѣпкій: Іисусе, Боже мой пресильный. Іисусе, Господи мой пребезсмертный: Іисусе, Создателю мой преславный. Іисусе, наставниче мой предобрый: Іисусе, пастырю мой прещедрый. Іисусе, Владыко мой премилостивый: Іисусе, Спасе мой премилосердый. Іисусе, просвѣти моя чувствія, потемненныя страстями: Іисусе, исцѣли мое тѣло, острупленное грѣхми. Іисусе, очисти мой умъ отъ помысловъ суетныхъ: Іисусе, сохрани сердце мое отъ похотей лукавыхъ. Іисусе Сыне Божій, помилуй мя.

Кондакъ 12.

Благодать подаждь ми, всѣхъ долговъ рѣшителю Іисусе, и пріими мя кающаяся, якоже пріялъ еси Петра отвергшагося Тебе, и призови мя унывающего, якоже древле Павла гоняща Тя, и услыши мя вопіюща Ти: Аллилуіа.

Икосъ 12.

Поюще Твое вочеловѣченіе, восхваля-

емъ Тя вси, и вѣруемъ со Ѡмою, яко
Господь и Богъ еси, сѣдѣй со Отцемъ,
и хотяй судити живымъ и мертвымъ.
Тогда убо сподоби мя деснаго стоянія,
вопіющаго: Иисусе, Царю предвѣчный,
помилуй мя: Иисусе, цвѣте благовонный,
облагоухай мя. Иисусе, теплото любимая,
огрѣй мя: Иисусе, храме предвѣчный,
покрый мя. Иисусе, одеждо свѣтлая,
украси мя: Иисусе, бисере честный, осѣ-
яй мя. Иисусе, каменю драгій, просвѣти
меня: Иисусе, солнце правды, освѣти мя.
Иисусе, свѣте святой, облистай мя:
Иисусе, болѣзни душевныя и тѣлесныя
избави мя. Иисусе, изъ руки сопротив-
ныя изми мя: Иисусе, огня неугасимаго,
и прочихъ вѣчныхъ мукъ свободи мя.
Иисусе Сыне Божій, помилуй мя.

Кондакъ 13.

О пресладкій и всещедрый Иисусе,
пріими нынѣ малое моленіе сіе наше,
якоже пріялъ еси вдовицы двѣ лептѣ:
и сохрани достояніе Твое отъ врагъ ви-

димыхъ и невидимыхъ, отъ пашествія иноплеменникъ, отъ недуга и глада, отъ всякія скорби, и смертоносныя раны и грядущія изми муки всѣхъ, вопіющихъ Ти: Аллилуіа.

Сей кондакъ глаголи трижды.

И паки икосъ 1.

Ангеловъ Творче, и Господи силъ, отверзи ми недоумѣнный умъ и языкъ, на похвалу Пречистаго Твоего имени, якоже глухому и гугнивому древле слухъ и языкъ отверзлъ еси, и глаголаше зовый таковая: Иисусе пречудный, Ангеловъ удивленіе: Иисусе пресильный, прародителей избавленіе. Иисусе пресладкій, патріарховъ величаніе: Иисусе преславный, царей укрѣпленіе. Иисусе прелюбимый, пророковъ исполненіе: Иисусе предивный, мучениковъ крѣпосте. Иисусе претихій, монаховъ радости: Иисусе премилостивый, пресвитеровъ сладосте. Иисусе премилосердый, постниковъ воздержаніе: Иисусе пресладост-

ный, преподобныхъ радование. Иисусе пречестный, дѣвственныхъ цѣломудріе: Иисусе предвѣчный, грѣшниковъ спасеніе. Иисусе Сыне Божій, помилуй мя.

Кондакъ 1.

Возбранный Воеводо и Господи, ада побѣдителю, яко избавлься отъ вѣчныя смерти, похвальная восписую Ти, созданіе и рабъ Твой: но яко имѣяй милосердіе неизреченное, отъ всякихъ мя бѣдъ свободы, зовуща: Иисусе Сыне Божій, помилуй мя.

Молитва ко Господу нашему Иисусу Христу.

Тебѣ, Господи, единому благому и непамятозлобному, исповѣдаю грѣхи моя, Тебѣ припадаю вопія недостойный: согрѣшихъ, Господи, согрѣшихъ, и нѣсмь достоинъ воззрѣти на высоту небесную, отъ множества неправдъ моихъ. Но, Господи мой, Господи, даруй ми слезы умиленія, единый Блаже и милостивый, яко да ими Тя умолю, очисти-

тися ми прежде конца отъ всякаго грѣха: страшно бо и грозно мѣсто имамъ проити, тѣла разлучився, и множество мя мрачное и безчеловѣчное демоновъ срящеть, и никтоже въ помощь спутствуяй, или избавляяй: тѣмъ припадаю Твоей благодати, не предаждь обидящымъ мя, ниже да похвалятся о мнѣ врази мои, благій Господи, ниже да рекуть: въ руки наша пришелъ еси, и намъ преданъ еси. Ни, Господи, не забуди щедротъ Твоихъ, и не воздаждь ми по беззаконіемъ моимъ, и не отврати лица Твоего отъ мене: но Ты, Господи, накажи мя, обаче милостию и щедротами, врагъ же мой да не возрадуется о мнѣ, но угаси его на мя прещенія, и все упраздни его дѣйство. И даждь ми къ Тебѣ путь неукорный, благій Господи, занеже и согрѣшивъ не прибѣгохъ ко иному врачу, и не прострохъ руки моя къ богу чуждему. Не отрини убо моленія моего, но услыши мя Твоею

благостию, и утверди мое сердце страхомъ Твоимъ: и да будетъ благодать Твоя на мнѣ, Господи, яко огонь пополаеи нечистыя во мнѣ помыслы, Ты бо еси, Господи, свѣтъ, паче всякаго свѣта: радость, паче всякія радости: упокоеніе, паче всякаго упокоенія: жизнь истинная, и спасеніе пребывающее во вѣки вѣковъ. Аминь.

Канонъ покаянный ко Господу нашему Іисусу Христу.

Г л а с ь 6-й. П ѣ с н ь 1.

И р м о с ь : Помощникъ и покровитель
бысть мнѣ во спасеніе, сей мой Богъ, и про-
славлю Его, Богъ отца моего, и вознесу Его:
славно бо прославися.

Помилуй мя, Боже, помилуй мя.

Избавителю мой Іисусе, якоже изба-
вилъ еси многихъ прегрѣшній блуд-
ницу, иногда покаывшуюся добрѣ: мо-
люся Ти, и мене избави безчисленныхъ
золь моихъ яко милостивъ.

Помилуй мя, Боже, помилуй мя.

Плавая въ суетнѣмъ помышленіи жи-
тія, Іисусе, лютую сію пучину, во
истопленія впадохъ многая, отъ нихже
избавивъ спаси мя.

Пресвятая Богородице, спаси насъ.

Явилася еси врата Живота, смерти

врата затворши рождествомъ Твоимъ,
Чистая: явилася еси земля избранная,
Еюже вознесся отъ земли на небеса
человѣческое смѣшеніе.

Пѣснь 3.

Ирмосъ : Утверди, Господи, на камени
заповѣдей Твоихъ, подвигшееся сердце мое, яко
единъ святъ еси и Господь.

Милостивнымъ Твоимъ окомъ призри
на мя, егда хочу предъ Тобою пред-
стати, и судитися едине Благопремъ-
нителю Господи.

Воздыхающа мя приими, якоже мы-
таря изъ глубины душевныя, и покая-
ніе ми даруй, Спасе, грѣха всякаго
мя избавляющее.

Богородиченъ: Зачала еси, Пресвя-
тая, Содержащаго весь міръ: сего ра-
ди молюся Ти, избави мя всякаго со-
держащаго мученія.

Пѣснь 4.

Ирмосъ : Услыша пророкъ пришествіе
Твое, Господи, и убояся, яко хочещи отъ Дѣ-
вы родитися, и человѣкомъ явится, и глаго-

лаше: услышахъ слухъ Твой, и убояхся: слава силъ Твоей, Господи.

Токи слезъ даждь ми изсушающыя страстей моихъ источники, и грѣха всякаго тимѣнія отмывающыя, Щедре, Многомилостиве, и угашающыя огня геенскаго вѣчнующій пламень неугасимый.

Непрестанно чешу струпы души моея сластолюбіемъ, и пребываю неисцѣлень, въ чувство самъ пріити не хотя, кто буду? и что сотворю? Христе щедрый, исцѣливъ спаси мя.

Богородиченъ: Седмосвѣтлый Тя свѣщникъ, огонь богоразумія носящъ, Отроковице, пророкъ древле провидѣ, свѣтящъ во тмѣ невѣдѣнія бѣдствуемымъ; тѣмже вопію Ти, Всенепорочная: просвѣти мя, молюся.

Пѣснь 5.

Ирмосъ: Отъ нощи утренююща, Человѣколюбче, просвѣти молюся, и настави и мене на повелѣнія Твоя, и научи мя, Спасе, творити волю Твою.

Се иже талантъ Твой сокрывый,
Христе, лѣнивый рабъ Твой, и упразд-
нившийся лукавыми страстей дѣланіи,
азъ есмь: тѣмже не посли мене во огонь.

Твой сынъ бывъ благодатию, благо-
утробне Христе, поработихся врагу, и
отъ Тебе удалихся живъ блудно; тѣм-
же обративъ мя спаси.

Богородиченъ: Врата непроходимая,
отверзи ми врата, молюся, покаянія
истиннаго: и покажи ми стезю покаянія,
Чистая, всѣхъ Наставнице.

Пѣснь 6.

Ирмосъ: Возопихъ всѣмъ сердцемъ
моимъ къ щедрому Богу, и услыша мя стѣ ала
преисподняго, и возведе отъ тли животъ мой.

Не покажи мене бѣсомъ обрадованіе
въ день страшный, Христе Іисусе: да
не услышу тогда гласа отсылающаго
во огонь геенскій.

Погрузи мя во глубинѣ прегрѣше-
ній, иже праведныхъ врагъ: и къ ще-
ротъ Твоихъ притекаю нучиѣ, Іисусе,

къ пристанищу жизни нынѣ направи
мя.

Богородиченъ: Храмъ Богу явилася
еси, Всенепорочная, въ онѣже вселився
священнѣ, человѣческое существо обо-
жи, сотворилъ есть вѣрныхъ храмы
Себѣ.

Пѣснь 7.

И р м о с ь : Согрешихомъ, беззаконнова-
хомъ, неправдовахомъ предъ Тобою, ниже со-
блюдохомъ, ниже сотворихомъ, якоже заповѣ-
далъ еси намъ: но не предаждь насъ до конца,
отцевъ Боже.

Взираю на милость Твою безмѣр-
ную, безмѣрно согрешивый, вѣмъ Твое
милосердіе, вѣмъ долготерпѣніе и не-
злобіе: покаянія ми даруй плоды, щед-
рый Христе, и спаси мя.

Уврачуй, Щедре, сердца моего не-
исцѣльныя страсти, даруй отсѣченіе
долговъ моихъ, тяжкое бремя облегчи:
да во умиленіи Тя славлю присно от-
цевъ Бога.

Богородиченъ: Прозябла еси безъ
сѣмене, Егоже роди Отецъ нетлѣнно,

пребыла еси по рождествѣ Дѣва, якоже и прежде рождества; тѣмже ублажаема еси, и прославляема, Пречистая, непрестанно, яко Мати сущи Божія.

Пѣснь 8.

Ирмосъ : Егоже воинства небесная славать, и трепещуть херувими и серафими, всяко дыханіе и тварь, пойте, благословите, и перевозите во вся вѣки.

Взираю на великую милость щедротъ Твоихъ, Христе, якоже Давидъ, согрѣшивъ паче онаго, и зову со онѣмъ: единае Милостиве, помилуй мя вскорѣ.

Конецъ благъ быти ми молюся, положить же лукавымъ дѣяніемъ когда конецъ не усердствую, ожесточенное имѣя мое сердце: ущедри мя, Божій Слове.

Богородиченъ: Нова намъ Младенца родила еси Ветхаго деньми, новыя на земли стези показующаго, и обетшавшее естество обновляюща, Безневѣстная Благословенная.

Пѣснь 9.

Ирмосъ : Безѣмннаго зачатія рождество несказанное, Матере безмужныя нетлѣнень Плодь: Божіе бо рожденіе обновляетъ естества; тѣмже Тя вси роди, яко Богоневѣстную Матерь, православно величаемъ.

Исусе Человѣколюбче, едине немощь нашу вѣдый: въ сію бо облеклся еси милосердія ради, хотя сію очистити: тѣмже скверны лукавыя, и гноенія золь моихъ очисти, и спаси мя.

Яко блудница слезы приношу Ти, Человѣколюбче: яко мытарь стена взываю Ти: очисти, и спаси мя, якоже хананеа вопію: помилуй мя, якоже Петра покаявшася, прощенія сподоби.

Богородиченъ: Гласъ Ти приносимъ архангеловъ Всечистая, Благословенная: радуйся, вмѣстившая Бога невмѣстимаго: радуйся, клятвы разрѣшеніе, и благословенія введеніе: радуйся, единая райскую дверь отверзшая.

Другій Канонъ покаянный ко Господу нашему Іисусу Христу.

Гласъ 6. Пѣснь 1.

И р м о с ь : Яко по суху пѣшествовавъ
Израиль, по безднѣ стопами, гонителя фараона
видя потопляема, Богу побѣдную пѣснь поимъ,
вопіяше.

Помилуй мя, Боже, помилуй мя.

Нынѣ приступихъ азъ грѣшный и
обремененный къ Тебѣ Владыцѣ и Богу
моему: не смѣю же взирати на небо,
токмо молюся глаголя: даждь ми, Госпо-
ди, умъ, да плачуся дѣлъ моихъ горько.

Помилуй мя, Боже, помилуй мя

О, горе мнѣ грѣшному! паче всѣхъ
человѣкъ окаянень есмь, покаянія нѣсть

во мнѣ: даждь ми, Господи, слезы, да плачуся дѣлъ моихъ горько.

Слава: Безумне, окаяние человекъ, въ лѣности время губиши: помысли житіе твое, и обратися ко Господу Богу, и плачися о дѣлѣхъ твоихъ горько.

И нынѣ: Мати Божія Пречистая, возри на мя грѣшнаго, и отъ сѣти діаволи избави мя, и на путь покаянія настави мя, да плачуся дѣлъ моихъ горько.

Пѣснь 3.

Ирмосъ: Нѣсть святы, якоже Ты, Господи Боже мой, вознесый рогъ вѣрныхъ Твоихъ, Блаже, и утвердивый насъ на камени исповѣданія Твоего.

Внегда поставлени будутъ престолы на судищи страшнѣмъ, тогда всѣхъ человекъ дѣла обличатся, горе тамо будетъ грѣшнымъ въ муку отсылаемымъ: и то вѣдуши, душе моя, покайся отъ злыхъ дѣлъ твоихъ.

Праведницы возрадуются, а грѣшніи восплачутся, тогда никтоже возможетъ помощи намъ, но дѣла наша осудятъ

насъ: тѣмже прежде конца покайся отъ злыхъ дѣлъ твоихъ.

Слава: Увы мнѣ великогрѣшному, иже дѣлы и мыслями осквернився, ни капли слезъ имѣю отъ жестосердія: нынѣ возникни отъ земли, душе моя, и покайся отъ злыхъ дѣлъ твоихъ.

И нынѣ: Се вызываетъ, Госпоже, Сынъ Твой и поучаетъ насъ на доброе, азъ же грѣшный добра всегда бѣгаю: но Ты, Милостивая, помилуй мя, да покаюся отъ злыхъ моихъ дѣлъ.

Сѣдалень, гласъ 6:

Помышляю день страшный и плачуща дѣяній моихъ лукавыхъ: како отвѣщаю безсмертному Царю? или коимъ дерзновеніемъ воззрю на Судію блудный азъ? благоутробный Отче, Сыне Единородный и Душе Святый, помилуй мя.

Слава, и нынѣ: Богородичень:

Связанъ многими нынѣ пленицами грѣховъ и содержимъ лютыми страстьми и бѣдами, къ Тебѣ прибѣгаю, моему

спасенію, и вопію: помози ми, Дѣво, Мати Божія.

Пѣснь 4.

И р м о с ь : Христось моя сила, Богъ и Господь, честная Церковь боголѣпно поеть взывающи, отъ смысла чиста, о Господѣ празднующи.

Широкъ путь здѣ и угодный сласти творити, но горько будетъ въ послѣдній день, егда душа отъ тѣла разлучатися будетъ: блюдися отъ сихъ, челоувѣче, Царствія ради Божія.

Почто убогаго обидиши, мзду наемничу удержуеши, брата твоего не любиши, блудъ и гордость гониши? остави убо сія, душе моя, и покайся Царствія ради Божія.

Слава: О, безумный челоувѣче! доколѣ углѣбаеши, яко пчела, собиравый богатство твое? вскорѣ бо погибнетъ яко прахъ и пепелъ: но болѣе взыщи Царствія Божія.

И нынѣ: Госпоже Богородице, помилуй мя грѣшнаго и въ добродѣтели укрѣпи и соблюди мя, да наглая смерть

не похитить мя неготоваго, и доведи мя,
Дѣво, Царствія Божія.

Пѣснь 5.

И р м о с ь : Божімъ свѣтомъ Твоимъ,
Блаже, утренюющихъ Ти души любовію озари,
молюся: Тя вѣдѣти, Слове Божій, истиннаго Бо-
га, отъ мрака грѣховнаго вызывающа.

Вспомяни, окаянный человѣче, како
лжамъ, клеветамъ, разбою, немощемъ,
лютымъ звѣремъ, грѣховъ ради порабо-
щенъ еси: душе моя грѣшная, того ли
восхотѣла еси?

Трепещутъ ми уды, всѣми бо сотво-
рихъ вину: очима взираяй, ушима слы-
шай, языкомъ злая глаголяй, всего се-
бе гееннѣ предавай: душе моя грѣшная,
сего ли восхотѣла еси?

Слава: Блудника и разбойника каю-
щихся пріялъ еси, Спасе: азъ же единъ
лѣнностію грѣховною отягчихся и злымъ
дѣломъ поработихся: душе моя грѣш-
ная, сего ли восхотѣла еси?

И нынѣ: Дивная и скорая помощнице
всѣмъ человѣкомъ, Мати Божія, помо-

зи мнѣ недостойному, душа бо моя грѣшная того восхотѣ.

П ѣ с н ь 6.

И р м о с ь : Житейское море воздвигаемое зря напастей бурею, къ тихому пристанищу Твоему притекъ, воію Ти: возведи отъ тли животь мой, Многомилостиве.

Житіе на земли блудно пожихъ и душу во тьму предахъ, нынѣ убо молю Тя, Милостивый Владыко: свободи мя отъ работы сея вражія и даждь ми разумъ творити волю Твою.

Кто творить таковая якоже азъ? якоже бо свинія лежитъ въ калу, тако и азъ грѣху служу: но Ты, Господи, исторгни мя отъ гнуса сего и даждь ми сердце творити заповѣди Твоя.

Слава: Воспрями, окаянный человѣче, къ Богу, вспомнявувъ своя согрѣшенія, припадая ко Творцу, слезя и стения: Той же яко милосердѣ, дастъ ти умъ знати волю Свою.

И нынѣ: Богородице Дѣво, отъ видимаго и невидимаго зла сохрани мя, Пре-

чистая, и приими молитвы моя и донеси я Сыну Твоему, да дастъ ми умъ творити волю Его.

Кондакъ:

Душе моя, почто грѣхами богатѣши? почто волю діаволу твориши? въ чемъ надежду полагаеши? престани отъ сихъ и обратися къ Богу съ плачемъ, зовущи: милосерде Господи, помилуй мя грѣшнаго.

Икосъ:

Помысли, душе моя, горькій часъ смерти и страшный судъ Творца твоего и Бога: Ангели бо грознии поймутъ тя, душе, и въ вѣчный огнь введутъ: убо прежде смерти покайся, вопіющи: Господи, помилуй мя грѣшнаго.

Пѣснь 7.

Ирмосъ: Росодательну убо пещь содѣла Ангель преподобнымъ отрокомъ, Халден же опаляющее велѣніе Божіе, мучителя увѣща вопити: благословенъ еси, Боже отецъ нашихъ.

Не надѣйся, душе моя, на тлѣнное богатство и на неправедное собраніе, вся

бо сія не вѣси, кому оставиши, но возопій: помилуй мя, Христе Боже, недостойнаго.

Не уповай, душе моя, на тѣлесное здравіе и на скоромимоходящую красоту: видиши бо, яко сильніи и младіи умирають, но возопій: помилуй мя, Христе Боже, недостойнаго.

Слава: Воспомяни, душе моя, вѣчное житіе, Царство Небесное, уготованное святымъ, и тьму кромѣшную и гнѣвъ Божій злымъ, и возопій: помилуй мя, Христе Боже, недостойнаго.

И нынѣ: Припади, душе моя, къ Божіей Матери и помолися Той: есть бо скорая помощница кающимся, умолитъ Сына Христа Бога, и помилуетъ мя недостойнаго.

Пѣснь 8.

Ирмосъ: Изъ пламене преподобнымъ росу источилъ еси и праведнаго жертву водою попалилъ еси: вся бо твориши, Христе, токмо еже хотѣти: Тя превозносимъ во вся вѣки.

Како не имамъ плакаться, егда по-

мышляю смерть? видѣхъ бо во гробѣ брата моего, безславна и безобразна, что убо чаю? и на что надѣюся? токмо даждь ми, Господи, прежде конца покаяніе.

Дважды.

Слава: Вѣрую, яко приидеши судити живыхъ и мертвыхъ, и вси во своемъ чину стануть, старіи и младіи, владыки и князи, дѣвы и священницы: гдѣ обрещуся азъ? сего ради вопію: даждь ми, Господи, прежде конца покаяніе.

И нынѣ: Пречистая Богородице, прими недостойную молитву мою и сохрани мя отъ наглыя смерти, и даруй ми прежде конца покаяніе.

Пѣснь 9.

И р м о с ь : Бога человѣкомъ невозможно видѣти, на Негоже не смѣють чини Ангельстии взирати: Тобою же, Всечистая, явися человѣкомъ Слово воплощено, Егоже величающе, съ небесными вои Тя ублажаемъ.

Нынѣ къ вамъ прибѣгаю, Ангели, Архангели и вся небесныя силы, у Престола Божія стоящіи, молитесь ко Твор-

цу своему, да избавить душу мою отъ муки вѣчныя.

Нынѣ плачуся къ вамъ, святіи патріарси, царіе и пророцы, апостоли и святителіе и вси избранніи Христовы: помозите ми на судѣ, да спасеть душу мою отъ силы вражія.

Слава: Нынѣ къ вамъ воздѣжу руцѣ, святіи мученицы, пустынницы, дѣвственницы, праведницы и вси святіи, молящіяся ко Господу за весь міръ, да помилуетъ мя въ часъ смерти моя.

И нынѣ: Мати Божія, помози ми на Тя сильнѣ надѣющемуся, умоли Сына Своего, да поставитъ мя недостойнаго одесную Себе, егда сядеть судяй живыхъ и мертвыхъ. Аминь.

Молитва по канонѣ:

Владыко Христе Боже, Иже страстьми Своими страсти моя исцѣливый и язвами Своими язвы моя уврачевавый, даруй мнѣ, много Тебѣ прегрѣшившему, слезы умиленія: сраствори моему тѣлу

отъ обонянiя животворящаго Тѣла Твоего, и наслади душу мою Твоею честною Кровiю отъ горести, еюже мя сопротивникъ напои: возвыси мой умъ къ Тебѣ, долу поникшiй, и возведи отъ пропасти погибели: яко не имамъ покаянiя, не имамъ умиленiя, не имамъ слезы утѣшительныя, возводящiя чада ко своему наслѣдiю. Омрачихся умомъ въ житейскихъ страстехъ, не могу воззрѣти къ Тебѣ въ болѣзни, не могу согрѣтися слезами яже къ Тебѣ любви. Но, Владыко Господи, Иисусе Христе, Сокровище благихъ, даруй мнѣ покаянiе всецѣлое и сердце люботрудное во взысканiе Твое, даруй мнѣ благодать Твою и обнови во мнѣ зраки Твоего образа. Оставихъ Тя, не остави мене: изыди на взысканiе мое: возведи къ пажити Твоей и сопричти мя овцамъ избраннаго Твоего стада: воспитай мя съ ними отъ злака Божественныхъ Твоихъ Таинствъ, молитвами Пречистыя Твоея Матере и всѣхъ святыхъ Твоихъ. Аминь.

Канонъ молебный ко Пресвятѣй Богородицѣ,

поемый во всякой скорби душевнѣй и обстояніи.
Тропарь, гласъ 4-й.

Къ Богородицѣ прилѣжно нынѣ при-
тецемъ, грѣшніи и смиренніи, и припа-
демъ въ покаяніи зовуще изъ глубины
души: Владычице, помози на ны мило-
сердовавши, потщися, погибаемъ отъ
множества прегрѣшеній: не отврати
Твоя рабы тщи, Тя бо и едину надежду
имамы. (Дважды).

Слава, и нынѣ:

Не умолчимъ никогда, Богородице,
силы Твоя глаголати недостойніи: аще

бо Ты не бы предстояла молящи, кто бы насъ избавилъ отъ толикихъ бѣдъ? кто же бы сохранилъ доннѣ свободны? Не отступимъ, Владычице, отъ Тебе: Твоя бо рабы спасаеши присно отъ всякихъ лютыхъ.

Канонъ, гласъ 8-й. Пѣснь 1.

И р м о с ь : Воду прошедъ яко сушу, и египетскаго зла избѣжавъ, израильтянинъ вопіаше. Избавителю и Богу нашему поимъ.

Пресвятая Богородице, спаси насъ.

Многими содержимъ напастьми, къ Тебѣ прибѣгаю, спасенія искій: о Мати Слова и Дѣво! отъ тяжкихъ и лютыхъ мя спаси.

Страстей мя смущаютъ прилози, много унынія исполнити мою душу: умри, Отроковице, тишиною Сына и Бога Твоего, Всенепорочная.

Слава Отцу, и Сыну, и Святому Духу.

Спаса рождшую Тя и Бога молю, Дѣво, избавитися ми лютыхъ: къ Тебѣ бо нынѣ прибѣгая, простираю и душу и помышленіе.

И нынѣ и присно и во вѣки вѣковъ, аминь.
Недугующа тѣломъ и душею, посѣ-
щенія Божественнаго, и промышленія
отъ Тебе сподоби, едина Богомати, яко
благая, Благаго же Родительница.

П ѣ с н ь 3.

И р м о с ь : Небеснаго круга Верхотворче
Господи, и Церкви Зиждителю, Ты мене утвер-
ди въ любви Твоей, желаній краю, вѣрныхъ
утвержденіе, едина Человѣколюбче.

Предстательство и покровъ жизни мо-
ея полагаю Тя, Богородительнице Дѣ-
во, Ты мя окорми ко пристанищу Тво-
ему, благихъ виновна, вѣрныхъ утвер-
жденіе, едина Всепѣтая.

Молю, Дѣво, душевное смущеніе, и
печали моя бурю разорити: Ты бо,
Богоневѣстная, начальника тишины Хри-
ста родила еси, едина Пречистая.

Слава: Благодѣтеля рождши, добрыхъ
виновнаго, благодѣянія богатство всѣмъ
источи: вся бо можеша, яко сильнаго
въ крѣпости Христа рождши, Богобла-
женная.

И нынѣ: Лютыми недуги и болѣзненными страстьми истязаему, Дѣво, Ты ми помози: исцѣленій бо неоскудное Тя знаю сокровище, Пренепорочная, неизживаемое.

Сѣдалень, гласъ 2-й.

Моленіе теплое, и стѣна необоримая, милости источниче, мірови прибѣжище, прилѣжно вопіемъ Ти: Богородице Владычице, предвари, и отъ бѣдъ избави насъ, едина вскорѣ предстательствующая.

Пѣснь 4.

И р м о с ъ: Услышахъ, Господи, смотре-нія Твоего таинство, разумѣхъ дѣла Твоя, прославихъ Твое Божество.

Страстей моихъ смущеніе, кормчію рождшая Господа, и бурю утиши моихъ прегрѣшеній, Богоневѣстная.

Милосердія Твоего бездну призывающую подаждь ми, яже благосердаго рождшая, и Спаса всѣхъ поющихъ Тя.

Наслаждающаяся, Пречистая, Твоихъ дарованій, благодарственное воспѣваемъ пѣніе, вѣдущее Тя Богоматерь.

Слава: На одрѣ болѣзни моя и немощи низлежащу ми, яко благолюбива, помози Богородице, едина Приснодѣво.

И нынѣ: Надежду и утвержденіе, и спасенія стѣну недвижиму имуще Тя, Всепѣтая, неудобства всякаго избавляемя.

П ѣ с н ь 5.

И р м о с ь : Просвѣти насъ повелѣніи Твоими, Господи, и мышцею Твоею высокою, Твой миръ подаждь намъ, Человѣколюбче.

Исполни, Чистая, веселія сердце мое, Твою нетлѣнную даючи радость, веселія рождшая виновнаго.

Избави насъ отъ бѣдъ, Богородице Чистая, вѣчное рождши избавленіе, и миръ всякъ умъ преимущій.

Слава: Разрѣши мглу прегрѣшеній моихъ, Богоневѣсто, просвѣщеніемъ Твоея свѣтлости, Свѣтъ рождшая Божественный и превѣчный.

И нынѣ: Исцѣли, Чистая, души моя неможеніе, посѣщенія Твоего сподобльшая, и здравіе молитвами Твоими подаждь ми.

Пѣснь 6.

Ирмосъ: Молитву пролію ко Господу и Тому возвѣщу печали моя, яко золь душа моя исполнися, и животъ мой аду приближися, и молюся яко Іона: отъ тли, Боже, возведи мя.

Смерти и тли яко спаслъ есть, Самъ Ся издавъ смерти, тлѣніемъ и смертію мое естество ято бывшее, Дѣво, моли Господа и Сына Твоего, враговъ злодѣйствія мя избавити.

Предстательницу Тя живота вѣмъ, и хранительницу тверду, Дѣво, и напастей рѣшащу молвы, и налоги бѣсовъ отгоняющую: и молюся всегда отъ тли страстей моихъ избавити мя.

Слава: Яко стѣну прибѣжища стяжаромъ, и душъ всесовершенное спасеніе, и пространство въ скорбехъ, Отроковице, и просвѣщеніемъ Твоимъ присно радуемся, о Владычице! и нынѣ насъ отъ страстей и бѣдъ спаси.

И нынѣ: На одрѣ нынѣ немощствующей лежу, и нѣсть исцѣленія плоти моей, но Бога и Спаса міру, и Избавите-

ля недуговъ рождшая, Тебѣ молюся
Благой: отъ тли недугъ возстави мя,

Кондакъ, гласъ 6-й.

Предстательство христіанъ непостыд-
ное, ходатайство ко Творцу непрелож-
ное, не презри грѣшныхъ моленій гла-
сы, но предвари яко Благая на помощь
насъ, вѣрно зовущихъ Ти: ускори на
молитву, и потщися на умоленіе, пред-
стательствующи присно, Богородице,
чтущихъ Тя.

Стихира, гласъ той же.

Не ввѣри мя человѣческому предста-
тельству, Пресвятая Владычице, но прі-
ими моленіе раба Твоего: скорбь бо об-
держитъ мя, терпѣти не могу демон-
скаго стрѣлянія, покрова не имамъ, ни-
же гдѣ прибѣгну окаянный, всегда по-
бѣждаемъ, и утѣшенія не имамъ, развѣ
Тебе, Владычице міра, упованіе и пред-
стательство вѣрныхъ, не презри моленіе
мое, полезно сотвори.

Пѣснь 7.

Ирмосъ: Отъ Іудеи дошедше отроцы,

в. Вавилонѣ иногда вѣрою Троическою пламень
пещный попраша, поюще: отцевъ Боже, бла-
словенъ еси.

Наше спасеніе якоже восхотѣлъ еси,
Спасе, устроить, во утробу Дѣвныя все-
лился еси, Юже міру предстательницу
показалъ еси: отецъ нашихъ Боже, бла-
гословенъ еси.

Волителя милости, Егоже родила
еси, Мати чистая, умоли избавитися отъ
прегрѣшеній, и душевныхъ сквернъ, вѣ-
рою зовущимъ: отецъ нашихъ Боже, бла-
гословенъ еси.

Слава: Сокровище спасенія, и источ-
никъ нетлѣнія, Тя рождшую, и столпъ
утвержденія, и дверь покаянія, зову-
щимъ показалъ еси: отецъ нашихъ Бо-
же, благословенъ еси.

И нынѣ: Тѣлесныя слабости, и ду-
шевные недуги, Богородительнице, лю-
бовію приступающихъ ко крову Твоему,
Дѣво, исцѣлители сподоби, Спаса Христа
намъ рождшая.

П ѣ с н ь 8.

И р м о с ь : Царя Небеснаго, Егоже поють
вои Ангельстїи, хвалите и превозносите во вся
вѣки.

Помощи, яже отъ Тебе, требующыя
не презри, Дѣво, поющыя и превозно-
сящія Тя во вѣки.

Неможеніе души моя исцѣляеши, и
тѣлесныя болѣзни, Дѣво: да Тя про-
славлю, Чистая, во вѣки.

Слава: Исцѣленій богатство излива-
еши, вѣрно поющимъ Тя, Дѣво, и пре-
возносящимъ неизреченное Твое рожде-
ство.

И нынѣ: Напастей Ты прилоги от-
гоняеши, и страстей находы, Дѣво: тѣм-
же Тя поемъ во вся вѣки.

П ѣ с н ь 9.

И р м о с ь : Воистинну Богородицу Тя ис-
повѣдуемъ, спасенніи Тобою, Дѣво Чистая, съ
безплотными лики Тя величающе.

Тока слезъ моихъ не отвратися, Яже
отъ всякаго лица всяку слезу отъемша-
го, Дѣво, Христа рождающая.

Радости мое сердце исполни, Дѣво,

Яже радости пріемшая исполненіе, грѣховную печаль потребляючи.

Пристанище и предстательство къ Тебѣ прибѣгающихъ буди, Дѣво, и стѣна нерушимая, прибѣжище же и покровъ и веселіе.

Слава: Свѣта Твоего зарями просвѣти, Дѣво, мракъ невѣдѣнія отгоняючи, благовѣрно Богородицу Тя исповѣдающихъ.

И нынѣ: На мѣстѣ озлобленія немощи смирившагося, Дѣво, исцѣли, изъ нездравія во здравіе претворяючи.

Молитва ко Пресвятой Богородицѣ.

Царице моя преблагая, надеждо моя Богородице, пріятелище сирыхъ, и странныхъ предстательнице, скорбящихъ радости, обидимыхъ покровительнице, зриши мою бѣду, зриши мою скорбь: помози ми яко немощну, окорми мя яко странна: обиду мою вѣси, разрѣши ту, яко волиши: яко не имамъ иныя помощи развѣ Тебе, ни иныя

предстательницы, ни благія утѣшитель-
ницы, токмо Тебе, о Богомати, яко да
сохраниши мя и покрыеши, во вѣки
вѣковъ, аминь.

Акаѣистъ ко Пресвятѣй Богородицѣ.

Кондакъ 1.

Взбранной Воеводѣ побѣдительная,
яко избавльшеся отъ злыхъ, благодар-
ственная восписуемъ Ти раби Твои, Бо-
городице: но яко имущая державу не-
побѣдимую, отъ всякихъ насъ бѣдъ сво-
боди, да зовемъ Ти: радуйся, Невѣсто
Неневѣстная.

Икосъ 1.

Ангелъ предстатель съ небесе посланъ
бысть рещи Богородицѣ: радуйся, и
со безплотнымъ гласомъ воплощаема Тя
зря, Господи, ужасашеся и стояше, зо-
вый къ Ней таковая: Радуйся, Еюже ра-
дость возсіяетъ: радуйся, Еюже клятва
изчезнетъ. Радуйся, падшаго Адама воз-
званіе: радуйся, слезъ Евиныхъ изба-

вленіе. Радуйся, высоту, неудобовосходима я человѣческими помысли: радуйся, глубоко неудобозрима я и Ангельскими очима. Радуйся, яко еси Царево сѣдалище: радуйся, яко носиши Носащаго вся. Радуйся, звѣздо, являющая Солнце: радуйся, утробо Божественнаго воплощенія. Радуйся, Еюже обновляется тварь: радуйся, Еюже покланяемся Творцу. Радуйся, Невѣсто Невѣстная.

Кондакъ 2.

Видящи Святая Себе въ чистотѣ, глаголетъ Гавріилу дерзостно: преславное твоего гласа, неудобопріятельно души Моей является: безсѣменнаго бо зачатія рождество како глаголеши, зовый: Аллилуіа.

Икосъ 2.

Разумъ недоразумѣваемый разумѣти Дѣва ищущи, возопи къ служащему: изъ боку чисту, Сыну како есть родитися мощно, рцы Ми? Къ Нейже онъ рече со страхомъ, обаче зовый сице:

Радуйся, совѣта неизреченнаго таиннице: радуйся, молчанія просящихъ вѣро. Радуйся, чудесъ Христовыхъ начало: радуйся, вельнѣй Его главизно. Радуйся лѣствице небесная, еюже сниде Богъ: радуйся, мосте, преводяй сущихъ отъ земли на небо. Радуйся, Ангеловъ многословущее чудо: радуйся, бѣсовъ многоплачевное пораженіе. Радуйся, Свѣтъ неизреченно родившая: радуйся, еже како, ни единаго же научившая. Радуйся, премудрыхъ превосходящая разумъ: радуйся, вѣрныхъ озаряющая смыслы. Радуйся, Невѣсто Непевѣстная.

Кондакъ 3.

Сила Вышняго осѣни тогда къ зачатію Браконеискусную, и благодатная Тоя ложесна, яко село показа сладкое, всѣмъ хотящимъ жати спасеніе, внегда пѣти сице: Аллилуіа.

Икосъ 3.

Имущи Богопріятную Дѣва утробу, востече ко Елисавети: младенецъ же

оноя абіе познавъ сея цѣлованіе, радывашесе, и играньми яко пѣсньми вопіаше къ Богородицѣ: Радуйся, отрасли неувядаемыя розго: радуйся, плода безсмертнаго стяжаніе. Радуйся, дѣлателя дѣлающая Человѣколюбца: радуйся, Садителя жизни нашея рождающая. Радуйся, ниво, растящая многоплодіе щедротъ: радуйся, трапезо, носящая обиліе очищенія. Радуйся, яко рай пищный процвѣтаеши: радуйся, яко пристанище душамъ готовиши. Радуйся, пріятное молитвы кадило: радуйся, всего міра очищеніе. Радуйся, Божіе къ смертнымъ благоволеніе: радуйся, смертныхъ къ Богу дерзновеніе. Радуйся, Невѣсто Невѣстная.

Кондакъ 4.

Бурю внутрь имѣя помышленій сумнительныхъ, цѣломудренный Іосифъ смятеся, къ Тебѣ зря небрачнѣй, и бракоокрадованную помышляя, Непорочная: увѣдѣвъ же Твое зачатіе отъ Духа Свята, рече: Аллилуіа.

Икосъ 4.

Слышаша пастыріе Ангеловъ, поющихъ плотское Христово пришествіе, и текше, яко къ Пастырю, видятъ Се-го, яко агнца непорочна, во чревѣ Маріинѣ упасшася, Юже поюще, рѣша: Радуйся, Агнца и Пастыря Мати: радуйся, дворе словесныхъ овецъ. Радуйся, невидимыхъ враговъ мученіе: радуйся, райскихъ дверей отверженіе. Радуйся, яко небесная срадуются земнымъ: радуйся, яко земная сликовствуютъ небеснымъ. Радуйся, Апостоловъ немолчная уста: радуйся, страстотерпцевъ непобѣдимая дерзосте. Радуйся, твердое вѣры утвержденіе: радуйся, свѣтлое благодати познаніе. Радуйся, Еюже обнажися адъ: радуйся, Еюже облекохомся славою. Радуйся, Невѣсто Неневѣстная.

Кондакъ 5.

Боготечную звѣзду узрѣвше волсви, тоя послѣдоваша зари: и яко свѣтильникъ держаще ю, тою испытаху крѣп-

каго Царя: и достигше непостижимаго, возрадовашася, Ему вопіюще: Аллилуіа.

Икосъ 5.

Видѣша отроцы Халдейстїи на руку
Дѣвичу Создавшаго рукама человѣки,
и Владыку разумѣвающе Его, аще и
рабїй прїять зракъ, потщашася дарми
послужити Ему, и возопити Благосло-
веннѣй: Радуйся, звѣзды незаходимыя
Мати: радуйся, заре таинственнаго дне.
Радуйся, прелести пещь угасившая: ра-
дуйся, Троицы таинники просвѣщающая.
Радуйся, мучителя безчеловѣчнаго из-
метающая отъ начальства: радуйся, Го-
спода Человѣколюбца показавшая Хри-
ста. Радуйся, варварскаго избавляющая
служенїя: радуйся, тимѣнїя изымаю-
щая дѣль. Радуйся, огня поклоненїе
угасившая: радуйся, пламене страстей
измѣняющая. Радуйся, вѣрныхъ настав-
нице цѣломудрїя: радуйся, всѣхъ ро-
довъ веселїе. Радуйся, Невѣсто Пене-
вѣстная.

Кондакъ 6.

Проповѣдницы Богоносїи бывше вол-
сви, возвратишася въ Вавилонъ, скон-
чавше Твое пророчество: и проповѣдав-
ше Тя Христа всѣмъ, оставиша Про-
да яко буесловяща, не вѣдуща пѣти:
Аллилуїа.

Икосъ 6.

Возсіявый во Египтѣ просвѣщеніе
истины, отгналъ еси лжи тму: идоли
бо его, Спасе, не терпяще Твоея крѣ-
пости, падоша: сихъ же избавльшіися
вопіяху къ Богородицѣ: Радуйся, ис-
правление чловѣковъ: радуйся, низпа-
деніе бѣсовъ. Радуйся, прелести дер-
жаву поправшая: радуйся, идольскую
лестъ обличившая. Радуйся, море, по-
топившее фараона мысленнаго: радуйся,
каменю, напоившій жаждущія жизни.
Радуйся, огненный столпе, наставляяй
сущія во тмѣ: радуйся, покрове міру,
ширшій облака. Радуйся, пице, манны
пріемнице: радуйся, сладости святыя

служительнице. Радуйся, земле обѣтованія: радуйся, изъ неяже течеть медъ и млеко. Радуйся, Невѣсто Невѣстная.

Кондакъ 7.

Хотящу Симеону отъ нынѣшняго вѣка преставитися прелестнаго, вдался еси яко младенецъ тому, но познался еси ему и Богъ совершенный: тѣмже удивися Твоей неизреченнѣй премудрости, зовый: Аллилуіа.

Икосъ 7.

Новую показа тварь, явлься Зиждитель, намъ отъ Него бывшымъ, изъ безсѣмныя прозябъ утробы, и сохранивъ ю, якоже бѣ нетлѣнну, да чудо видяще, воспоимъ ю, вопіюще: Радуйся, цвѣте нетлѣнія: радуйся, вѣнче воздержанія. Радуйся, воскресенія образъ облистаящая: радуйся, Ангельское житіе являющая. Радуйся, древо свѣтлоплодовитое, отъ негоже питаются вѣрніи: радуйся, древо благосѣннолиственное, имже покрываются мнози. Радуйся, во

чревѣ носящая Избавителя плѣннымъ: радуйся, рождающая Наставника заблуждшимъ. Радуйся, Судии Праведнаго умоленіе: радуйся, многихъ согрѣшеній прощеніе. Радуйся, одеждо нагихъ дерзновенія: радуйся, любы, всякое желаніе побѣждающая. Радуйся, Невѣсто Невѣстная.

Кондакъ 8.

Странное рождество видѣвше, устранимся міра, умъ на небеса преложше: сего бо ради высокій Богъ на земли явился смиренный человѣкъ, хотяи привлеци къ высотѣ, Тому вопіюща: Аллилуіа.

Икосъ 8.

Весь бѣ въ нижнихъ, и вышнихъ никакоже отступи неописанное Слово: снисхожденіе бо Божественное, не прохождение же мѣстное бысть, и рождество отъ Дѣвы Богопріятная, слышаша сия: Радуйся, Бога невмѣстимаго вмѣстилище: радуйся, честнаго таинства двери. Радуйся, невѣрныхъ сумнитель-

ное слышаніе: радуйся, вѣрныхъ извѣстная похвало. Радуйся, колеснице пресвятая Сущаго на херувимѣхъ: радуйся, селеніе преславное Сущаго на серафимѣхъ. Радуйся, противная въ тожде собравшая: радуйся, дѣвство и рождество сочетавшая. Радуйся, Еюже разрѣшился преступленіе: радуйся, Еюже отверзся рай. Радуйся, ключу Царствія Христова: радуйся, надеждо благъ вѣчныхъ. Радуйся, Невѣсто Непевѣстна.

Кондакъ 9.

Всякое естество Ангельское удивися великому Твоего вочеловѣченія дѣлу: неприступнаго бо яко Бога, зряше всѣмъ приступнаго Человѣка, намъ убо спребывающа, слышаща же отъ всѣхъ: Аллилуіа.

Икосъ 9.

Вѣтія многовѣщанная яко рыбы безгласныя видимъ о Тебѣ, Богородице: недоумѣваютъ бо глаголати, еже како и Дѣва пребывавши, и родити возмог-

ла еси? Мы же таинству дивящеся, вѣрно вопіемъ: Радуйся, премудрости Божія пріятелище: радуйся, промышленія Его сокровище. Радуйся, любомудрыя немудрыя являющая: радуйся, хитрословесныя безсловесныя обличающая. Радуйся, яко обуяша лютии взыскателе: радуйся, яко увядоша баснотворицы. Радуйся, Авинейская плетенія растерзающая: радуйся, рыбарскія мрежи исполняющая. Радуйся, изъ глубины невѣдѣнія извлекающая: радуйся, многи въ разумъ просвѣщающая. Радуйся, кораблю хотящихъ спастися: радуйся, пристанище житейскихъ плаваній. Радуйся, Невѣсто Невѣстная.

Кондакъ 10.

Спасти хотя міръ, Иже всѣхъ Укра-
ситель, къ сему самообѣтованъ пріиде,
и Пастырь сый яко Богъ, насъ ради
явился по намъ человѣкъ: подобнымъ бо
подобное призвавъ, яко Богъ слышитъ:
Аллилуіа.

Икосъ 10.

Стѣна еси дѣвамъ, Богородице Дѣво, и всѣмъ къ Тебѣ прибѣгающимъ: ибо небесе и земли Творецъ устрои Тя, Пречистая, вселься во утробѣ Твоей, и вся приглашати Тебѣ научивъ: Радуйся, столпе дѣвства: радуйся, дверь спасенія. Радуйся, начальнице мысленнаго назданія: радуйся, подательнице Божественныя благодати. Радуйся, Ты бо обновила еси зачатая студно: радуйся, Ты бо наказала еси окраденныя умомъ. Радуйся, тлителя смысловъ упражняющая: радуйся, Святеля чистоты рождшая. Радуйся, чертоже безсѣменнаго уневѣщенія: радуйся, вѣрныхъ Господеви сочетавшая. Радуйся, добрая младопитательнице дѣвамъ: радуйся, невѣстократительнице душъ святыхъ. Радуйся, Невѣсто Невѣстная.

Кондакъ 11.

Пѣніе всякое побѣждается, прострется тѣщающееся ко множеству многихъ

щедротъ Твоихъ: равночисленные бо
песка пѣсни аще приносимъ Ти, Царю
Святый, ничтоже совершаемъ достойно,
яже даль еси намъ, Тебѣ вопіющимъ:
Аллилуіа.

Икосъ 11.

Свѣтопріемную свѣщу, сущымъ во
тмѣ явльшуюся, зримъ Святую Дѣву:
невещественный бо вжигающи огонь, на-
ставляетъ къ разуму Божественному вся,
зарю умъ просвѣщающая, званіемъ же
почитаемая, сими: Радуйся, луче умна-
го Солнца: радуйся, свѣтило незаходи-
маго Свѣта. Радуйся, молніе, души
просвѣщающая: радуйся, яко громъ,
враги устрашающая. Радуйся, яко мно-
госвѣтлое возсіяваеши просвѣщеніе: ра-
дуйся, яко многотекущую источаеши
рѣку. Радуйся, купѣли живописующая
образъ: радуйся, грѣховную отъемлю-
щая скверну. Радуйся, бане, омываю-
щая совѣсть: радуйся, чаше, черплющая
радость. Радуйся, обоняніе Христова

благоуханія: радуйся, животе тайнаго веселія. Радуйся, Невѣсто Неневѣстная.

Кондакъ 12.

Благодать дати восхотѣвъ, долговъ древнихъ, всѣхъ долговъ Іѣшителъ челоукомъ, прииде Собою ко отпеднымъ Того благодати: и раздранъ рукописа-ніе, слышитъ отъ всѣхъ сице: Аллилуіа.

Икосъ 12.

Поюще Твое рождество, хвалимъ Тя вси, яко одушевленный храмъ, Богородице: во Твоей бо вселився утробѣ, содержи вся рукою Господы, освяти, прослави и научи вопити Тебѣ всѣхъ: Радуйся, селеніе Бога и Слова: радуйся, Святая святыхъ большая. Радуйся, ковчеже позлащенный Духомъ: радуйся, сокровище живота неистощимое. Радуйся, честный вѣнче царей благочестивыхъ: радуйся, честная похвало іереевъ благоговѣйныхъ. Радуйся, Церкви непоколебимый столпе: радуйся, царствія не-

рушимая стѣно. Радуйся, Еюже воз-
движутся побѣды: радуйся, Еюже низ-
падаютъ врази. Радуйся, тѣла моего
врачеваніе: радуйся, души моего спасе-
ніе. Радуйся, Невѣсто Непевѣстная.

Кондакъ 13.

О, всепѣтая Мати, рождающая всѣхъ
святыхъ Святѣйшее Слово! нынѣшнее
пріемши приношеніе, отъ всякія избави
напасти всѣхъ, и будущія изми муки,
о Тебѣ вопіющихъ: Аллилуіа.

Сей кондакъ глаголи трижды.

И паки икосъ 1.

Ангелъ предстатель съ небесе посланъ
бысть рещи Богородицѣ: радуйся, и со
безплотнымъ гласомъ воплощаема Ты
зря, Господи, ужасашеся и стояше, зо-
вый къ Ней таковал: Радуйся, Еюже
радость возсіяетъ: радуйся, Еюже клят-
ва исчезнетъ. Радуйся, падшаго Адама
воззваніе: радуйся, слезъ Евиныхъ из-
бавленіе. Радуйся, высоту, неудобовосхо-
димая человѣческими помысли: радуй-

ся, глубоко, неудобозримая и Ангельска очима. Радуйся, яко еси Царево сѣдалище: радуйся, яко носиши Носящаго вся. Радуйся, звѣздо, являющая Солнце: радуйся, утробо Божественнаго воплощенія. Радуйся, Еюже обновляется тварь: радуйся, Еюже покланяемся Творцу. Радуйся, Невѣсто Невѣстная.

Кондакъ 1.

Взбранной Воеводѣ побѣдительная, яко избавльшеся отъ злыхъ, благодарственная восписуемъ Ти раби Твои, Богородице: но яко имущая державу непобѣдимую, отъ всякихъ насъ бѣдь свободы, да зовемъ Ти: радуйся, Невѣсто Невѣстная.

Молитва ко Пресвятѣй Богородицѣ.

О Пресвятая Госпоже Владычице Богородице! выши еси всѣхъ Ангелъ и Архангелъ, и всея твари честнѣйши, помощнице еси обидимыхъ, ненадѣющихся надѣяніе, убогихъ заступнице,

печальныхъ утѣшеніе, алчущихъ корми-
тельнице, нагихъ одѣяніе, больныхъ ис-
цѣленіе, грѣшныхъ спасеніе, христіанъ
всѣхъ поможеніе и заступленіе. О все-
милостивая Госпоже, Дѣво Богородице
Владычице! милостію Твоею спаси и
помилуй святѣйшія патріархи правосла-
вныя, преосвященныя митрополиты, ар-
хіепископы и епископы, и весь священ-
ническій и иноческій чинъ, военачаль-
никовъ, градоначальниковъ и христолю-
бное воинство, и dobroхоты, и вся пра-
вославныя христіаны ризою Твоею чест-
ною защиты: и умоли, Госпоже, изъ
Тебе безъ сѣмене воплотившагося Хри-
ста Бога нашего, да препояшетъ насъ
силою Своею свыше, на невидимыя и
видимыя враги наша. О Всемилостивая
Госпоже Владычице Богородице! воз-
двигни насъ изъ глубины грѣховныя, и
избави насъ отъ глада, губительства, отъ
труса и потопа, отъ огня и меча, отъ
нахожденія иноплемennыхъ и междо-

усобныя брани, и отъ напрасныя смерти, и отъ нападенія вражія, и отъ тлѣтворныхъ вѣтръ, и отъ смертоносныя язвы, и отъ всякаго зла. Подаждь, Госпоже, миръ и здравіе рабомъ Твоимъ всѣмъ православнымъ христіаномъ, и просвѣти имъ умъ, и очи сердечніи, еже ко спасенію: и сподоби ны грѣшныя рабы Твоя Царствія Сына Твоего, Христа Бога нашего: яко держава Его благословена и препрославлена, со безначальнымъ Его Отцемъ, и съ Пресвятымъ, и благимъ, и животворящимъ Его Духомъ, нынѣ и присно и во вѣки вѣковъ. Аминь.

Канонъ покаянный ко Пресвятѣй Богородицѣ.

Гласъ 6-й. Пѣснь 1.

И р м о с ь : Яко по суху пѣшешествовавъ
Израиль, по безднѣ стопами, гонителя фараона
вида потопляема, Богу побѣдную пѣснь поимъ,
вопіаше.

Пресвятая Богородице, спаси насъ.

Пріими, Дѣво, мольбу мою изъ устъ
недостойныхъ, отъ скверныхъ устенъ,
дерзновенно приносить устремившагося:
и свѣтъ умиленія, Чистая, озари рабу
Твоему.

Пресвятая Богородице, спаси насъ.

Тучи слезъ ми подаждь Твоими мо-
литвами, Дѣво, Мати Чистая: яко да

плачу теплѣ, о ихже содѣлахъ на земли,
и убѣгну Тобою муки всякія.

Слава Отцу, и Сыну, и Святому Духу.

Моего рыданія не отрини, яже Источ-
никъ милосердія рождшая: но мило-
стивно, Благая, Твоимъ милостивнымъ
окомъ, Богородице, души моя страсти
исцѣли.

И нынѣ, и присно, и во вѣки вѣковъ, аминь.

Стенаніемъ плачися, душе моя, и се-
бе отнюдъ рыдай, покланяющися Мате-
ри Божіи, и глаголющи: мене повин-
наго избави муки страшныя.

Пѣснь 3.

И р м о с ъ : Нѣсть святъ, якоже Ты, Го-
споди Боже мой, вознесый рогъ вѣрныхъ Тво-
ихъ, Блаже, и утвердивый насъ на камени ис-
повѣданія Твоего.

Нѣсть инъ, якоже азъ, прегрѣшивъ,
Пресвятая Чистая, порабоцся злобами
безмѣрныхъ помышленій: но, на Тя на-
дѣявся, молю, сихъ мя исхити.

Се наидоша на мя, яко раны, вся
вражія злобы, отяготѣвше и зѣло воз-

смердѣша, и душу ведутъ на всяко паденіе.

Слава: Многое множество моихъ прегрѣшеній, сего ради, Пресвятая, вѣрою припадая, вошю Ти смиренный: въ часъ страшный умолити, Егоже воплотила еси.

И нынѣ: Святая Богородице, мене, повиннаго всякому осужденію, изми, дерзновение къ Богу яко имущи матернее, и чертогу Сего учини мя.

Пѣснь 4.

Ирмосъ: Христосъ моя сила, Богъ и Господь, честная Церковь боголѣпно поетъ зывающи, отъ смысла чиста, о Господѣ празднующи.

Источникъ ми слезъ даруй, Владычице, яко да отмыю скверну смиренныя души моя, и обрящу доброту, юже погубихъ совѣтомъ зминымъ.

Боже мой милосерде, Боже человеколюбче, волителю милости, нынѣ на мя излій Твою милость: молить Тя надежда и заступница моя, Мати Твоя.

Слава: Мене блуднаго, мене ужаснаго, безъ ума и безстыдно много согрѣшша къ Тебѣ, Пренепорочная, ущедривши спаси и геенны свободы.

И нынѣ: Пажить потреби смерти, рождши Жизнь всяческихъ; тѣмже и азъ зову Ти: согрѣшихъ, спаси мя, Чистая, матерними Твоими мольбами.

Пѣснь 5.

И р м о с ь : Божимъ свѣтомъ Твоимъ, Блаже, утренюющихъ Ти души любовію озари, молюся, Тя вѣдѣти, Слове Божій, истиннаго Бога, отъ мрака грѣховнаго взывающа.

Помилуй мя, Чистая, на Тя всю надежду мою возложивнаго: и ущедри, вѣрою взываю Ти, презрѣвши души моя вся страсти лютыя.

Спаси мя отъ страстей, скорби, и вреда, лукавыхъ сопротивныхъ, и избави сихъ лаянія смиренную мою душу, да не рекутъ, Дѣво: укрѣпихомся на ны.

Слава: Чиста тѣломъ и душею, Пречистая, явльшися, душу мою отъ скверны свободы, дая ми чисто жити, и на-

стави творити ми Господню Божественную волю.

И нынѣ: Тя едину имамъ прибѣжище, и къ Богу премѣненіе, иже во многихъ прегрѣшеніихъ все житіе мое издихъ; тѣмже мя, Богородице, Ты ущедри.

Пѣснь 6.

И р м о с ь : Житейское море воздвизаетъ мое зря напастей бурей, къ тихому пристанищу Твоему притекъ, вопію Ти: возведи отъ тли животъ мой, Многомилостиве.

Исправи, Владычице, малое мое стѣнаніе и рукама воздѣланіе, якоже благовонну жертву, и Твой сподоби зракъ чистою совѣстію узрѣти.

Глаголь моихъ, Владычице благая, не презри моленіе, родительнице милостиваго Бога, отъ Твоея утробы возсіяваго: но даждь ми прежде конца Божественное оставленіе.

Слава: Преклонихся страстьми блудно преокаанный, и удалихся отъ Бога: Егоже моли спасти мя, Благая, къ Те-

бѣ бо прибѣгохъ, и одеждами мя предними украси.

И нынѣ: Не опали ложеснѣ Твоихъ огнь сый Иисусъ, изъ Тебе плотію приходитъ: Сего, Чистая, моли, огня и всякія муки избавити вѣрою воспѣвающихъ Тя.

Господи, помилуй, *трижды.*

Слава Отцу, и Сыну, и Святому Духу, и нынѣ, и присно, и во вѣки вѣковъ. Аминь.

Сѣдалень, гласъ 6-й:

Чистая Дѣво и славная, Ангеловъ славо, егда предстала еси кресту Сына и Бога Твоего, не терпящи озлобленія врагъ, взывала еси, рыдаючи стенаньи, едина благословенная: како терпитъ Человѣколюбецъ, сихъ всѣхъ наносимая?

Пѣснь 7.

Ирмосъ: Отроцы въ Вавилонѣ пещнаго пламене не убояшася: но посредѣ пламене ввержени, орошаеми, пояху: благословенъ еси, Господи Боже отецъ нашихъ.

Возникни, о душе моя, отъ злыхъ,

яже содѣяла еси: что спиши прочее? что сномъ уныніа низлежиши? Богородицѣ возопій: Пресвятая, помози ми.

Образъ вида Твоего чту, и не смѣю воззрѣти къ Тебѣ, Пресвятая: молю пріяти долговъ прощеніе, и чисто видѣти Твою пречистую икону.

Слава: Въ Твое прибѣгаю, Богородительнице, заступленіе, и припадаю пріяти прощеніе: не презри мене, Владычице, но, ущедривъ, спаси мя.

И нынѣ: Многообразными злобами душегубнаго осквернихъ душу и умъ, молю Тя, Пречистая: не презри, и того искушеній исхити раба Твоего.

Пѣснь 8.

Ирмосъ: За законы отеческія блаженіи въ Вавилонѣ юноши предбѣдствуютъ, царюющаго оплеваша повелѣніе безумное: и совокуплены имже не сварившася огнемъ, Державствующему достойно воспѣваху пѣснь: Господа пойте дѣла и превозносите во вся вѣки.

Безмѣрно согрѣшивъ, и осквернивъ мое во грѣсѣхъ тѣло, неразумный, помышляю необыменнаго суда день, и, не-

доумѣвся, убохся, и ужасаюся, и трепещу: ко благоутробію Твоему, Владычице, припадаю: не отрини мене, но виждь мою скорбь, и избави всякаго осужденія, мукъ многообразныхъ.

Законъ Божественный презрѣвъ, въ лѣности весь слежу оканный: призрѣвши, Пречистая, возстави вскорѣ, и спасенныхъ сотвори мя части получитьи, да, радуясь, зову Ти: радуйся, радости міру, едина предстательнице вѣрою призывающимъ Твой твердый покровъ.

Слава: Увы мнѣ, душе моя, како предстанемъ тогда во страхъ и трепетъ судищу страшному, егда Ангели предстанутъ во страхъ и трепетъ? Богородицу имущи благу заступницу, преклони колѣно, и воздѣжи руцѣ къ высотѣ, вопіючи: призри и пощади Твоимъ милостивнымъ тогда взоромъ, Дѣво.

И нынѣ: Покажи крѣпость Твою непостыдну заступленіе нынѣ: яко должникъ бо, матерними мольбами прекло-

нится Твой Сынъ, Дѣво. Предвари убо нынѣ въ нужный часъ, да не отъиду неготовъ, но поживу и еще, препѣтая Богородице Чистая.

Пѣснь 9.

Ирмосъ : Не рыдай Мене, Мати, зрящи во гробъ, Егоже во чревѣ безъ сѣмене зачала еси Сына: встану бо и прославлюся, и вознесу со славою непрестанно, яко Богъ, вѣрою и любовію Тя величающыя.

Да вышнія славы получу, Дѣво, молюся Тебѣ: ослаби ми и избави долговѣтмы, вся презрѣвши, Пречистая, яже въ невѣдѣніи и разумѣ, вкупѣ дневная и ночная: яко да благодарственную пѣснь, радуясь, принесу Ти.

Отъ всякихъ мя скорбей исхити, Отроковице, и на камени постави нозѣ мои божественнаго спасенія: Тя бо предстательницу небориму нынѣ стяжавъ, уповаю прейти стѣну и преграду, юже преслушаніемъ древа создахъ.

Слава: Тя молю, рождшую милосердаго Судію и Владыку: пріими дерзость

скверныхъ устенъ и убогое пѣніе мое, и не омерзи мене паче всѣхъ человѣкъ грѣшнѣйшаго: Тя бо по Божѣ заступнику имѣю рабъ Твой.

И нынѣ: Яко вышши сущи созданийъ всяческихъ, во утробѣ Твоей имѣла еси, Богородице, Бога воплощенна: Сего прилѣжно моли, Чистая, разрѣшити всякаго настоящія раба Твоего, да свободнымъ гласомъ Тя славословлю и азъ.

Канонъ Ангелу Хранителю.

Тропарь, гласъ 6-й.

Ангеле Божій, хранителю мой свя-
тый, животъ мой соблюди во страсть
Христа Бога: умъ мой утверди во ис-
тинѣмъ пути, и къ любви горнѣй уяз-
ви душу мою, да тобою направляемъ,
получу отъ Христа Бога велию милость.

Богородичень:

Святая Владычице, Христа Бога на-
шего Мати, яко всѣхъ Творца недоумѣн-
но рождающая: моли благость Его всегда,
со хранителемъ моимъ Ангеломъ, спа-
сти душу мою, страстьми одержимую,
и оставленіе грѣховъ даровати ми.

Канонъ, гласъ 8-й. Пѣснь 1.

И р м о с ь : Поимъ Господеви, проведен-
му люди Своя сквозъ Чермное море яко единъ
славно прославися.

Господи Іисусе Христе Боже мой, помилуй мя.

Исусу: Пѣснь воспѣти, и восхвалити
Спасе, Твоего раба достойно сподоби,
безплотному Ангелу, наставнику и хра-
нителю моему.

Святый Ангеле Божій, хранителю мой, моли
Бога о мнѣ грѣшнѣмъ.

Единъ азъ въ неразуміи и въ лѣпно-
сти нынѣ лежу, Наставниче мой и хра-
нителю, не остави мене погибающа.

Слава: Умъ мой твоею молитвою на-
прави, творити ми Божіа повелѣнія, да
получу отъ Бога отданіе грѣховъ. и не-
навидѣти ми злыхъ настави мя, молюся
ти.

И нынѣ: Молися, Дѣвице, о мнѣ, ра-
бѣ Твоемъ, ко Благодателю, со храни-
телемъ моимъ Ангеломъ, и настави мя
творити заповѣди Сына Твоего и Твор-
ца моего.

Пѣснь 3.

И р м о с ь: Ты еси утвержденіе притека-
ющихъ къ Тебѣ, Господи, Ты еси свѣтъ омра-
ченныхъ, и поетъ Тя духъ мой.

Все помышленіе мое, и душу мою къ

тебѣ возложихъ, хранителю мой: ты отъ всякія мя напасти вражія избави.

Врагъ попираетъ мя и озлобляетъ, и поучаетъ всегда творити своя хотѣнія: но ты, наставниче мой, не остави мене погибающа.

Слава: Пѣти пѣснь со благодареніемъ и усердіемъ Творцу и Богу даждь ми, и тебѣ благому Ангелу хранителю моему: избавителю мой, изми мя отъ врагъ озлобляющихъ мя.

И нынѣ: Исцѣли, Пречистая, моя многонедужныя струпы, яже въ души, прожени враги, иже присно борются со мною.

Сѣдалень, гласъ 2-й.

Отъ любви душевныя вопію ти, хранителю моя души, всесвятый мой Ангеле, покрый мя и соблюди отъ лукаваго ловленія всегда, и къ жизни настави небеснѣй, вразумляя и просвѣщая и укрѣпляя мя.

Слава, и нынѣ: Богородиченъ:

Богородице безневѣстная, Пречистая,

Яже безъ сѣмене рождши всѣхъ Владыку, Того со Ангеломъ хранителемъ моимъ моли: избавитимися всякаго недоумѣнія, и дати умиленіе и свѣтъ души моей, и согрѣшеніемъ очищеніе, Яже едина вскорѣ заступающи.

П ѣ с н ь 4.

И р м о с ь : Услышахъ, Господи, смотре-нія Твоего таинство, разумѣхъ дѣла Твоя, и прославихъ Твое Божество.

Моли Человѣколюбца Бога ты, хранителю мой, и не остави мене: но присно въ мирѣ житіе мое соблюди, и подаждь ми спасеніе неоторимое.

Яко заступника и хранителя животу моему, приѣмъ тя отъ Бога, Ангеле, молю тя святой, отъ всякихъ мя бѣдъ свободы.

Слава: Мою скверность твоею святынею очисти, хранителю мой, и отъ части шуія да отлученъ буду молитвами твоими, и причастникъ славы явлюся.

И нынѣ: Недоумѣніе предлежитъ ми отъ обышедшихъ мя золь, Пречистая,

но избави мя отъ нихъ скоро: къ Тебѣ
бо единѣй прибѣгохъ.

П ѣ с н ь 5.

И р м о с ь : Утренююще вопіемъ Ти: Господи, спаси ны: Ты бо еси Богъ нашъ, развѣ Тебе иного не вѣмы.

Яко имѣя дерзновение къ Богу, хранителю мой святой, Сего умоли, отъ оскорбляющихъ мя золь избавити.

Свѣте свѣтлый, свѣтло просвѣти душу мою, наставниче мой и хранителю, отъ Бога данный ми Ангеле.

Слава: Спяща мя злѣ тяготою грѣховною, яко бдяща сохрани, Ангеле Божій, и возстави мя на славословіе моленіемъ твоимъ.

И нынѣ: Маріе, Госпоже Богородице безневѣстная, надеждо вѣрныхъ, вражія возношенія низложи, а поющія Тя возвесели.

П ѣ с н ь 6.

И р м о с ь : Ризу мнѣ подаждь свѣтлу одѣяйся свѣтомъ яко ризою, многомилостиве Христе Боже нашъ.

Всякихъ мя напастей свободы, и отъ

печалей спаси, молюся ти, святыи Ангеле, данный ми отъ Бога, хранителю мой добрый.

Освѣти умъ мой, блаже, и просвѣти мя, молюся ти, святыи Ангеле, и мысли ти полезная всегда настави мя.

Слава: Устави сердце мое отъ настоящаго мятежа, и бдѣти укрѣпи мя во благихъ, хранителю мой, и настави мя чудно къ тишинѣ животнѣй.

И нынѣ: Слово Божіе въ Тя вселися, Богородице, и человѣкомъ Тя показа небесную лѣствицу: Тобою бо къ намъ Вышній сошелъ есть.

Кондакъ, гласъ 4-й.

Явися мнѣ милосердѣ, святыи Ангеле Господень, хранителю мой, и не отлучайся отъ мене сквернаго: но просвѣти мя свѣтомъ неприкосновеннымъ, и сотвори мя достойна Царствія Небеснаго.

Икосъ:

Уничужденную душу мою многими соблазны, ты, святыи предстателю, неизреченныя славы небесныя сподоби, и пѣ-

вещь съ лики безплотныхъ силъ Божіихъ, помилуй мя и сохрани, и помыслы добрыми душу мою просвѣти, да твоею славою, Ангеле мой, обогащуся, и низложи зломыслящія мнѣ враги, и сотвори мя достойна Царствія Небеснаго.

П ѣ с н ь 7.

И р м о с ь : Отъ Іудеи дошедше отроки въ Вавилонѣ иногда, вѣрою Троицескою пламень пещный попраша, поюще: отцевъ Боже, благословенъ еси.

Милостивъ буди ми, и умоли Бога, Господень Ангеле: имѣю бо тя заступника во всемъ животѣ моемъ, наставника же и хранителя, отъ Бога дарованнаго ми во вѣки.

Не остави въ путь шествующія души моя окаянныя убити разбойникомъ, святой Ангеле, яже ти отъ Бога предана бысть непорочнѣ, но пастави ю на путь покаянія.

Слава: Всю посрамлену душу мою привожду отъ лукавыхъ ми помыслъ и дѣлъ, предвари, наставниче мой, и ис-

цѣленіе ми подаждь благихъ помыслъ,
уклоняти ми ся всегда на правыя стези.

И нынѣ: Премудрости исполни всѣхъ
и крѣпости Божественныя, Упостасная
премудросте Вышняго, Богородицы ра-
ди, вѣрою вопіющихъ: отецъ нашихъ
Боже, благословенъ еси.

П ѣ с н ь 8.

И р м о с ь : Царя Небеснаго, Егоже поють
рои Ангельстїи, хвалите и превозносите во вся
вѣки.

Отъ Бога посланный, утверди животъ
мой, раба твоего, преблагій Ангеле, и не
остави мене во вѣки.

Ангела тя суща блага, души моя
наставника и хранителя, преблаженне,
воспѣваю во вѣки.

Слава: Буди ми покровъ и забрало,
въ день испытанія всѣхъ человѣкъ, въ
онѣже огнемъ искушаются дѣла благая
же и злая.

И нынѣ: Буди ми помощница и ти-
шина, Богородице Приснодѣво, рабу

Твоему, и не остави мене лишена быти Твоего владычества.

П ѣ с н ь 9.

И р м о с ь : Воистинну Богородицу Тя исповѣдуемъ, спасенніи Тобою, Дѣво Чистая, съ безплотными лики Тя величающе.

Иисусу: Помилуй мя, едине Спасе мой, яко милостивъ еси и милосердъ, и праведныхъ ликовъ сотвори мя причастника.

Мыслити ми присно и творити, Господень Ангеле, благая и полезная даруй, яко сильна яви въ немощи и непорочна.

Слава: Яко имѣя дерзновение къ Царю Небесному, Того моли и съ прочими безплотными, помиловати мя окайннаго.

И нынѣ: Много дерзновение имущи, Дѣво, къ Воплощшемуся изъ Тебе, преложи мя отъ узъ, и разрѣшеніе ми подаждь и спасеніе молитвами Твоими.

Молитва ко Ангелу Хранителю.

О святыи Ангеле, хранителю и покровителю мой благии! съ сокрушен-

нымъ сердцемъ и болѣзненною душею
предстою ти, моляся: услыши мя грѣш-
наго раба своего (*имя рекъ*), съ воплемъ
крѣпкимъ и плачемъ горькимъ вопію-
щаго: не помяни моихъ беззаконій и не-
правдъ, имиже азъ окаянный прогнѣ-
вляю тя по вся дни и часы, и мерзостна
себе творю предъ Создателемъ нашимъ
Господемъ: явился миѣ милосердъ и не
отлучайся мене сквернаго даже до кон-
чины моя: возбуди мя отъ сна грѣ-
ховнаго и пособствуй твоими молитва-
ми прочее время живота моего безъ по-
рока прейти и сотворити плоды достой-
ны покаянія, паче же отъ смертныхъ
падений грѣховныхъ соблюди мя, да не
погибну во отчаяніи, и да не порадует-
ся врагъ о погибели моей. Вѣмъ воистин-
ну и усты исповѣдую, яко никтоже та-
ковъ другъ и предстатель, защититель
и поборникъ, якоже ты, святыи Ангеле:
предстоя бо престолу Господню, моли-
шися о миѣ непотребѣмъ и паче всѣхъ

грѣшнѣйшемъ, да не изыметь Преблагій души моея въ день печалія моего и въ день творенія злобы. Не престаю убо умилоствляя премилосердаго Господа и Бога моего, да отпуститъ согрѣшенія моя, яже сотворихъ во всемъ житіи моемъ, дѣломъ, словомъ и всѣми моими чувствами, и имиже вѣсть судьбами, да спасетъ мя: да накажетъ мя здѣ по Своей неизреченнѣй милости, но да не обличитъ и не истязетъ мя онамо по своему нелицепріятному правосудію: да сподобитъ мя покаяніе принести, съ покаяніемъ же Божественное причащеніе достойнѣ пріяти, о семъ наче молю и таковаго дара всеусердно желаю. Въ страшный же часъ смерти, неотступень буди ми, благій хранителю мой, прогоняя мрачныя демоны, имущія устрашити притрепетную душу мою: защити мя отъ тѣхъ ловленія, егда имамъ преходити воздушная мытарства, да хранимъ тобою, безбѣдно достигну райа ми

вожделеннаго, идѣже лица святыхъ и
горнихъ силъ непрестанно восхваляютъ
всечестное и великолѣпное имя въ Троицѣ
славимаго Бога, Отца, и Сына, и Свя-
таго Духа, Емуже подобаетъ честь и по-
клоненіе, во вѣки вѣковъ. Аминь.

Послѣдованіе ко Св. Причащенію.

Молитвами святыхъ отецъ нашихъ,
Господи Іисусе Христе Боже нашъ,
помилуй насъ. Аминь.

Царю Небесный: *Трисвятое*. Пресвя-
тая Троице: Отче нашъ: Господи, поми-
луй, 12. Прїидите, поклонимся: *трижды*.

И настоящыя псалмы:

Псаломъ 22.

Господь пасеть мя, и ничтоже мя ли-
шить. На мѣстѣ злачнѣ, тамо всели мя,
на водѣ покойнѣ воспита мя. Душу мою
обрати, настави мя на стези правды,
имене ради Своего. Аще бо и пойду
посредѣ сѣни смертныя, не убоюся зла,

яко Ты со мною еси: жезлъ Твой и палица Твоя, та мя утѣшиста. Уготовалъ еси предо мною трапезу сопротивъ стужающимъ мнѣ: умастилъ еси елеомъ главу мою, и чаша Твоя упоявающи мя, яко державна. И милость Твоя поженеть мя вся дни живота моего: и еже вселитимся въ домъ Господень въ долготу дній.

Псаломъ 23.

Господня земля, и исполненіе ея, вселенная, и вси живушіи на ней. Той на моряхъ основалъ ю есть, и на рѣкахъ уготовалъ ю есть. Кто взыдетъ на гору Господню? или кто станетъ на мѣстѣ святѣмъ Его? не повиненъ рукама, и чистъ сердцемъ: иже не пріять всуе душу свою, и не клянется лестію искреннему своему. Сей пріиметь благословеніе отъ Господа, и милостыню отъ Бога Спаса своего. Сей родъ ищущихъ Господа, ищущихъ лице Бога Іаковля. Возмите врата князи ваша, и возмיתесь вра-

та вѣчная: и увидеть Царь славы. Кто есть сей Царь славы? Господь крѣпокъ и силенъ, Господь силенъ въ брани. Возмите врата князи ваша, и возмיתесь врата вѣчная: и увидеть Царь славы. Кто есть сей Царь славы? Господь силъ, Той есть Царь славы.

Псаломъ 115.

Вѣровахъ, тѣмже возглаголахъ: азъ же смирихся зѣло. Азъ же рѣхъ во изступленіи моемъ: всякъ человѣкъ ложь. Что воздамъ Господеву о всѣхъ, яже воздаде ми? Чашу спасенія прииму, и имя Господне призову: молитвы моя Господеву воздамъ предъ всѣми людьми Его. Честна предъ Господемъ смерть преподобныхъ Его. О Господи, азъ рабъ Твой, азъ рабъ Твой, и сынъ рабыни Твоея: растерзалъ еси узы моя. Тебѣ пожру жертву хвалы, и во имя Господне призову: молитвы моя Господеву воздамъ предъ всѣми людьми Его: во дворѣхъ дому Господня, посреде тебѣ, Іерусалиме.

Слава, и нынѣ: Аллилуіа, трижды.

Поклоны три.

Тропарі, гласъ 8-й.

Беззаконія моя презри, Господи, отъ Дѣвы рождейся, и сердце мое очисти, храмъ то творя пречистому Твоему тѣлу и крови: ниже отрини мене отъ Твоего лица, безъ числа имѣяй велию милость.

Слава: Во причастіе святынь Твоихъ како дерзну недостойный? Аще бо дерзну къ Тебѣ приступити съ достойными, хитонъ мя обличаетъ, яко нѣсть вечерній: и осужденіе исходатайствую многогрѣшной души моея. Очисти, Господи, скверну души моея, и спаси мя, яко Человѣколюбецъ.

И нынѣ: Многая множества моихъ, Богородице, прегрѣшеній, къ Тебѣ прибѣгохъ, Чистая, спасенія требую: посѣти немощствующую мою душу, и моли Сына Твоего и Бога нашего, дати ми оставленіе, яже содѣяхъ лютыхъ, едина благословенная.

Во святую же Четыредесятницу сіе:

Егда славніи ученицы на умовеніи вечери просвѣщахуся, тогда Іуда злостивый сребролюбіемъ недоговавъ омрачашеся, и беззаконнымъ судіямъ Тебе праведнаго Судію предаеть. Вижь, имѣній рачителю, сихъ ради удавленіе употребивша: бѣжи несытыя души, Учителю таковая дерзнувшія. Иже о всѣхъ благій Господи, слава Тебѣ.

Псаломъ 50.

Помилуй мя, Боже, по велицѣй милости Твоей, и по множеству щедротъ Твоихъ очисти беззаконіе мое. Наипаче омый мя отъ беззаконія моего, и отъ грѣха моего очисти мя. Яко беззаконіе мое азъ знаю, и грѣхъ мой предо мною есть выну. Тебѣ единому согрѣшихъ, и лукавое предъ Тобою сотворихъ: яко да оправдишися во словесѣхъ Твоихъ, и побѣдиши вьегда судити Ти. Се бо въ беззаконіихъ зачатъ есмь, и во грѣсѣхъ роди мя мати моя. Се бо истину возлю-

билъ еси: безвѣстная и тайная премудрости Твоя явилъ ми еси. Окропиши мя иссопомъ, и очищуся: омыеши мя, и паче снѣга убѣлюся. Слуху моему даси радость и веселіе: возрадуются кости смиренныя. Отврати лице Твое отъ грѣхъ моихъ, и вся беззаконія моя очисти. Сердце чисто созижди во мнѣ, Боже, и духъ правъ обнови во утробѣ моей. Не отвержи мене отъ лица Твоего, и Духа Твоего Святаго не отъими отъ мене. Воздаждь ми радость спасенія Твоего, и Духомъ Владычнимъ утверди мя. Научу беззаконныя путемъ Твоимъ, и нечестивіи къ Тебѣ обратятся. Избави мя отъ кровей, Боже, Боже спасенія моего: возрадуется языкъ мой правдѣ Твоей. Господи, устигъ мои отверзеши, и уста моя возвѣстятъ хвалу Твою. Яко аще бы восхотѣлъ еси жертвы, далъ быхъ убо: всесожженія не благоволиши. Жертва Богу духъ сокрушенъ, сердце сокрушенно и смиренно Богъ не уничижить. Ублажи, Господи, благоволеніемъ

Твоимъ Сіона, и да созиждутся стѣны Іерусалимскія. Тогда благоволиши жертву правды, возношенія и всесожегаемая: тогда возложатъ на олтарь Твой тельцы.

И абіе: Канонъ, гласъ 2-й. Пѣснь 1.

И р м о с ь : Грядите людіе, поимъ пѣснь Христу Богу, раздѣльшему море, и наставльшему люди, яже изведе изъ работы египетскія, яко прославися.

Сердце чисто созижди во мнѣ, Боже, и духъ правъ обнови во утробѣ моей.

Хлѣбъ живота вѣчнующаго да будетъ ми Тѣло Твое Святое, благоутробне Господи, и Честная Кровь, и недугъ многообразныхъ исцѣленіе.

Не отвержи мене отъ лица Твоего, и Духа Твоего святаго не отъими отъ мене.

Оскверненъ дѣлы безмѣстными окаянный, Твоего Пречистаго Тѣла и Божественныя Крове недостоинъ есмь, Христе, причащенія, егоже мя сподоби.

Пресвятая Богородице, спаси насъ.

Богородиченъ: Земле благая, благословенная Богоневѣсто, класъ прозяб-

шая неоранный и спасительный міру,
сподоби мя сей ядуща спастися.

П ъ с н ь 3.

И р м о с ь : На камени мя вѣры утвердивъ,
разширилъ еси уста моя на враги моя. Воз-
веселибоя духъ мой, внегда пѣти: нѣсть святъ
якоже Богъ нашъ, и нѣсть праведень паче Те-
бе. Господи.

Слезныя ми подаждь, Христе, капли,
скверну сердца моего очищающыя: яко
да благою совѣстію очищенъ, вѣрою при-
хожду и страхомъ, Владыко, ко прича-
щенію Божественныхъ даровъ Твоихъ.

Во оставленіе да будетъ ми прегрѣ-
шеній Пречистое Тѣло Твое и Божест-
венная Кровь, Духа же Святаго обще-
ніе, и въ жизнь вѣчную, Человѣколюб-
че, и страстей и скорбей отчужденіе.

Богородиченъ: Хлѣба животнаго тра-
пеза Пресвятая, свыше милости ради
сшедшаго, и мірови новый животъ даю-
щаго, и мене нынѣ сподоби недостойна-
го, со страхомъ вкусити сего, и живу
быти.

П ѣ с н ь 4.

И р м о с ь : Пришелъ еси отъ Дѣвы, не ходатай, ни Ангелъ, но Самъ Господи воплощся и спаслъ еси всего мя человѣка. Тѣмъ зову Ти: слава силъ Твоей, Господи.

Восхотѣлъ еси, насъ ради воплощся, Многомилостиве, закланъ быти яко овча, грѣхъ ради человѣческихъ: тѣмже молю Тя, и моя очисти согрѣшенія.

Исцѣли души моя язвы, Господи, и всего освяти: и сподоби Владыко, яко да причащуся тайныя Твоя Божественныя вечера, окаянный.

Богородиченъ: Умилостиви и мнѣ сущаго отъ утробы Твоя, Владычице, и соблюди мя нескверна раба Твоего, и непорочна, яко да приѣмъ умнаго бисера, освящуся.

П ѣ с н ь 5.

И р м о с ь : Свѣта подателю и вѣковъ Творче, Господи, во свѣтъ Твоихъ повелѣній настави насъ: развѣ бо Тебе, иного бога не знаемъ.

Якоже предрекль еси, Христе, да будетъ убо худому рабу Твоему, и во

мнѣ пребуди, якоже общался еси: се бо Тѣло Твое ямъ Божественное, и пію Кровь Твою.

Слове Божіи и Боже, угль Тѣла Твоего да будетъ мнѣ помраченному въ просвѣщеніе, и очищеніе оскверненной души моеи Кровь Твоя.

Богородиченъ: Маріе, Мати Божія, благоуханія честное селеніе, Твоими молитвами сосудъ мя избранный содѣлай, яко да освященій причащуся Сына Твоего.

П ѣ с н ь 6.

И р м о с ь : Въ безднѣ грѣховнѣи валяся, неизслѣдную милосердія Твоего призываю бездну: отъ тли, Боже, мя возведи.

Умъ, душу и сердце освяти, Спасе, и тѣло мое: и сподоби неосужденно, Владыко, къ страшнымъ Тайнамъ приступить.

Дабы устранился отъ страстей, и Твоея благодати имѣлъ бы приложеніе, живота же утвержденіе, причащеніемъ Святыхъ, Христе, Таинъ Твоихъ.

Богородиченъ: Божіе, Боже, Слово Святее, всего мя освяти нынѣ приходящаго къ Божественнымъ Твоимъ Тайнамъ, Святая Матере Твоея мольбами.

Кондакъ, гласъ 2-й.

Хлѣбъ, Христе, взяти не презри мя, Тѣло Твое, и Божественную Твою нынѣ Кровь, пречистыхъ, Владыко, и страшныхъ Твоихъ Таинъ причаститися окаяннаго, да не будетъ ми въ судъ, да будетъ же ми въ животъ вѣчный и безсмертный.

Пѣснь 7.

Ирмосъ: Тѣлу златому премудрыя дѣти не послужиша, и въ пламень сами поидоша, и боги ихъ обругаша, среди пламене возопиша, и сроси я Ангель: услышася уже устъ вашихъ молитва.

Источникъ благихъ, причащеніе, Христе, бессмертныхъ Твоихъ нынѣ Таинствъ да будетъ ми свѣтъ, и животъ, и безстрастіе, и къ преслѣванію же и умноженію добродѣтели Божественнѣйшія ходатайственно, едине Блаже, яко да славлю Тя.

Да избавлюся отъ страстей, и враговъ и нужды, и всякія скорби, трепетомъ и любовію со благоговѣніемъ, Человѣколюбче, приступаяй нынѣ къ Твоимъ безсмертнымъ и Божественнымъ Тайнамъ, и пѣти Тебѣ сподоби: благословенъ еси, Господи, Боже отецъ нашихъ.

Богородиченъ: Спаса Христа рождшая паче ума, Богоблагодатная, молю Тя нынѣ, рабъ Твой, Чистую нечистый: хотящаго мя нынѣ къ пречистымъ Тайнамъ приступити, очисти всего отъ скверны плоти и духа.

Пѣснь 8.

Ирмосъ: Въ пещь огненную ко отрокомъ Еврейскимъ снизшедшаго, и пламень въ росу предложшаго Бога, пойте дѣла яко Господа, и превозносите во вся вѣки.

Небесныхъ, и страшныхъ, и святыхъ Твоихъ, Христе, нынѣ Тайнъ, и Божественныхъ Твоя и тайныя вечера, общника быти и мене сподоби отчаяннаго, Боже Спасе мой.

Подъ Твое прибѣгъ благоутробіе, Блаже, со страхомъ зову Ти: во мнѣ пребуди Спасе, и азъ, якоже реклъ еси, въ Тебѣ: се бо дерзая на милость Твою, ямъ Тѣло Твое, и пію Кровь Твою.

Троиценъ: Тrepещу приѣмля огонь, да не опалюся яко воскъ, и яко трава: оле страшнаго таинства! оле благоутробія Божія! како Божественнаго Тѣла и Крове брєніе причащаюся, и нетлѣнєнъ сотворяюся.

П ѣ с н ь 9.

И р м о с ь : Безначальна Родителя Сынъ, Богъ и Господь, воплощся отъ Дѣвы, намъ явися, омраченная просвѣти, собрати расточенная: тѣмъ всепѣтую Богородицу величаемъ.

Христось есть, вкусите и видите: Господь насъ ради, по намъ бо древле бывый, единою Себе принесъ, яко приношеніе Отцу Своему, присно закалается, освящаяй причащающыяся.

Душею и тѣломъ да освящуся, Владыко, да просвѣщуся, да спасуся, да буду домъ Твой, причащеніемъ священныхъ Таинъ, живущаго Тя имѣя въ

себѣ со Отцемъ и Духомъ, Благодѣтелю Многомилостиве.

Якоже огонь да будетъ ми, и яко свѣтъ, Тѣло Твое и Кровь, Спасе мой, пречестная, опаляя грѣховное вещество, сжигая же страстей терніе, и всего мя просвѣщая, поклонятися Божеству Твоему.

Богородиченъ: Богъ воплотися отъ чистыхъ кровей Твоихъ: тѣмже всякій родъ поетъ Тя, Владычице, умная же множества славятъ, яко Тобою явѣ узрѣша всѣми Владычествующаго, осуществовавшагося человѣчествомъ.

И абіе: Достойно есть: Трисвятое. Пресвятая Троице: Отче нашъ: Тропарь дне, аще есть праздникъ Христова Рождества, или иной. Аще недѣля, тропарь воскресный по гласу. Аще же ни, сія, гласъ 6-й:

Помилуй насъ, Господи, помилуй насъ: всякаго бо отвѣта недоумѣюще, сію Ти молитву, яко Владыцѣ, грѣшнии приносимъ: помилуй насъ.

Слава: Господи, помилуй насъ, на

Тя бо уповахомъ: не прогнѣвайся на ны зѣло, ниже помяни беззаконій нашихъ: но призри и нынѣ яко благоутробенъ, и избави ны отъ врагъ нашихъ: Ты бо еси Богъ нашъ, и мы людіе Твои, вси дѣла руку Твоею, и имя Твое призываемъ.

И нынѣ: Милосердія двери отверзи намъ, благословенная Богородице, надѣющіися на Тя да не погибнемъ, но да избавимся Тобою отъ бѣдъ: Ты бо еси спасеніе рода христіанскаго.

Таже: Господи, помилуй, 40.

И поклоны, елико хоцешн.

И абіе настоящыя стихи:

Хотя ясти, человѣче, Тѣло Владычне, Страхомъ приступи, да не опалишися: огонь бо есть.

Божественную же пія кровь ко общенію, Первѣе примирися тя опечалившимъ, Таже дерзая, таинственное брашно яждь.

Ины стихи:

Прежде причастія страшныя жертвы,

Животворящаго Тѣла Владычня,
Симъ помолися образомъ со трепетомъ:

Молитва Великаго Василя, 1-я:

Владыко Господи Іисусе Христе, Боже нашъ, источниче жизни и безсмертія, всея твари видимыя и невидимыя Содѣтелю, безначальнаго Отца соприисущный Сыне и собезначальный: премногія ради благодсти, въ послѣднія дни въ плоть оболкійся и распныйся, и погребыйся за ны неблагодарныя и злонавыныя, и Твоею кровію обновивый растлѣвшее грѣхомъ естество наше: Самъ, Безсмертный Царю, пріими и мое грѣшнаго покаяніе, и приклони ухо Твое мнѣ, и услыши глаголы моя. Согрѣшихъ бо, Господи, согрѣшихъ на небо и предъ Тобою, и нѣсмь достоинъ воззрѣти на высоту славы Твоея: прогнѣвахъ бо Твою благодсть, Твоя заповѣди преступивъ, и не послушавъ Твоихъ повелѣній. Но Ты, Господи, незлобивъ сый, долготерпѣливъ же и много-

милостивъ, не предалъ еси мя погибнути со беззаконными моими, моего всячески ожидая обращенія. Ты бо реклъ еси, Человѣколюбче, пророкомъ Твоимъ: яко хотѣніемъ не хочу смерти грѣшника, но еже обратитися и живу быти ему. Не хочещи бо, Владыко, созданія Твоею руку погубити, ниже благоволиши о погибели человѣчестѣй, но хочещи всѣмъ спастися, и въ разумъ истины пріити. Тѣмже и азъ, аще и недостойнъ есмь небесе и земли, и сея прівременныя жизни, всего себе повинувъ грѣху, и сластемъ поработивъ, и Твой осквернивъ образъ: но твореніе и созданіе Твое бывъ, не отчаяваю своего спасенія окаянный, на Твое же безмѣрное благоутробіе дерзая прихожду. Прими убо и мене, Человѣколюбче Господи, якоже блудницу, яко разбойника, яко мытаря, и яко блуднаго: и возми мое тяжкое бремя грѣховъ, грѣхъ взямай міра, и немощи человѣческія исцѣляй, труждающыяся и обремененныя къ Се-

бѣ призывая и упокоевая: не пришед-
шій призвати праведныхъ, но грѣшныя
на покаяніе: и очисти мя отъ всякія
скверны плоти и духа, и научи мя со-
вершати святыню во страстѣ Твоемъ: яко
да чистымъ свидѣніемъ совѣсти моея,
святынь Твоихъ часть приѣмля, соеди-
нюся святому Тѣлу Твоему и Крови, и
имѣю Тебе во мнѣ живуща и пребы-
вающая, со Отцемъ, и Святымъ Твоимъ
Духомъ. Ей, Господи Іисусе Христе,
Боже мой! и да не въ судъ ми будетъ
причастіе пречистыхъ и животворящихъ
Таинъ Твоихъ, ниже да немощенъ буду
душею же и тѣломъ, отъ еже недостой-
нѣ тѣмъ причащатися: но даждь ми, да-
же до конечнаго моего издыханія, не-
осужденно воспріимати часть святынь
Твоихъ, въ Духа Святаго общеніе, въ на-
путіе живота вѣчнаго, и во благопріятенъ
отвѣтъ на страшнѣмъ судищи Тво-
емъ: яко да и азъ со всѣми избранными
Твоими общникъ буду нетлѣнныхъ Тво-
ихъ благъ, яже уготовалъ еси любя-

щымъ Тя, Господи: въ нихже препро-
славленъ еси во вѣки. Аминь.

Молитва иже во святыхъ отца нашего
Іоанна Златоустаго, 2-я.

Господи Боже мой, вѣмъ, яко нѣсмь
достойнъ, ниже доволенъ, да подъ кровь
внидеши храма души моя, занеже весь
пустъ и пался есть, и не имаша во мнѣ
мѣста достойна, еже главу подклонити:
но якоже съ высоты нась ради сми-
рилъ еси Себе, смирися и нынѣ смире-
нію моему: и якоже воспріалъ еси въ
вертепѣ и въ яслѣхъ безсловесныхъ воз-
лещи, сице воспріими и въ яслѣхъ
безсловесныя моя души, и во осквер-
ненное мое тѣло внити. И якоже не не-
удостоилъ еси внити, и свечеряти со
грѣшники въ дому Симона прокаженна-
го, тако изволи внити и въ домъ сми-
ренныя моя души, прокаженныя и грѣ-
шныя: и якоже не отринулъ еси подоб-
ную мнѣ блудницу, и грѣшную, при-
шедшую и прикоснувшуюся Тебѣ, сице

умилосердися и о мнѣ грѣшнѣмъ, приходящемъ и прикасающемся: и якоже не возгнушался еси скверныхъ ея устъ и нечистыхъ, цѣлующихъ Тя, ниже моихъ возгнушайся скверныхъ оныхъ устъ и нечистыхъ, ниже мерзкихъ моихъ и нечистыхъ устенъ, и сквернаго и нечистѣйшаго моего языка. Но да будетъ ми уголь пресвятаго Твоего Тѣла и честныя Твоя Крове, во освященіе, и просвѣщеніе и здравіе смиреннѣй моей души и тѣлу, во облегченіе тяжестей многихъ моихъ согрѣшеній, въ соблюденіе отъ всякаго діавольскаго дѣйства, во отгнаніе и возбраненіе злаго моего и лукаваго обычая, во умерщвленіе страстей, въ снабдѣніе заповѣдей Твоихъ, въ приложеніе Божественныя Твоя благодати, и Твоего царствія присвоеніе. Не бо яко презираяй прихожду къ Тебѣ, Христе Боже, но яко дерзая на неизреченную Твою благость, и да не на мнозѣ удаляяйся общенія Твоего, отъ мысленнаго волка звѣроуловленъ буду.

Тѣмже молюся Тебѣ: яко единъ сый Святъ, Владыко, освяти мою душу и тѣло, умъ и сердце, чревеса и утробы, и всего мя обнови, и вкорени страхъ Твой во удесѣхъ моихъ, и освященіе Твое неотъемлемо отъ мене сотвори: и буди ми помощникъ и заступникъ, окормляя въ мирѣ животъ мой, сподобляя мя и одесную Тебе предстоянія со святыми Твоими, молитвами и молениями Пречистыя Твоя Матери, невещественныхъ Твоихъ служителей и пречистыхъ силъ, и всѣхъ святыхъ, отъ вѣка Тебѣ благоугодившихъ. Аминь.

Молитва иная, Сумеона Метафраста, 3-я.

Едине чистый и нетлѣнный Господи, за неизреченную милость человѣколюбія, наше все воспріемый смѣшеніе, отъ чистыхъ и дѣвственныхъ кровей паче естества Рождшія Тя, Духа Божественнаго нашествіемъ, и благоволеніемъ Отца присносущнаго, Христе Исусе, премудросте Божія, и мире, и си-

ло: Твоимъ воспріятіемъ животворящая и спасительная страданія воспріемый, крестъ, гвоздія, копіе, смерть: умертви моя душетлѣнныя страсти тѣлесныя. Погребеніемъ Твоимъ адова плѣнивый царствія, погребѣи моя благими помыслы лукавая совѣтованія, и лукавствія духи разори. Тридневымъ Твоимъ и живоноснымъ воскресеніемъ падшаго праотца возставивый, возстави мя грѣхомъ поползшагося, образы мнѣ покаянія предлагая. Преславнымъ Твоимъ вознесеніемъ плотское обоживый воспріятіе, и сіе деснымъ Отца сѣдѣніемъ почтый, сподоби мя причастіемъ святыхъ Твоихъ Таинъ, десную часть спасаемыхъ получить. Снитіемъ Утѣшителя Твоего Духа сосуды честны священныя Твоя ученики содѣлавый, пріятелище и мене покажи Того пришествія. Хотяй паки пріити судити вселеннѣй правдою, благоволи и мнѣ усрѣсти Тя на облацѣхъ, Судію и Создателя моего, со всѣми святыми Твоими: да безконечно сла-

вословлю и воспѣваю Тя, со безначальнымъ Твоимъ Отцемъ, и Пресвятымъ и благимъ и животворящимъ Твоимъ Духомъ, нынѣ и присно, и во вѣки вѣковъ. Аминь.

Божественнаго Дамаскина, 4-я.

Владыко Господи Иисусе Христе, Боже нашъ, едина имѣяй власть человѣкомъ оставлять грѣхи, яко благо и Человѣколюбецъ презри моя вся въ вѣдѣніи и не въ вѣдѣніи прегрѣшенія: и сподоби мя неосужденно причаститься Божественныхъ, и преславныхъ, и пречистыхъ, и животворящихъ Твоихъ Таинъ, не въ тяжесть, ни въ муку, ни въ приложеніе грѣховъ: но во очищеніе, и освященіе, и обрученіе будущаго живота и царствія, въ стѣну и помощь, и въ возраженіе сопротивныхъ, во истребленіе многихъ моихъ согрѣшеній. Ты бо еси Богъ милости, и щедротъ, и человѣколюбія, и Тебѣ славу возсылаемъ, со Отцемъ, и Святымъ Духомъ, нынѣ и присно, и во вѣки вѣковъ. Аминь.

Великаго Василя, 5-я.

Вѣмъ, Господи, яко недостойнѣ причащаюся пречистаго Твоего Тѣла и честныя Твоя Крове, и повиненъ есмь, и судъ себѣ ямъ и пію, не разсуждая Тѣла и Крове Тебе Христа и Бога моего: но на щедроты Твоя дерзая прихожду къ Тебѣ рекшему: ядый Мою плоть, и пійай Мою кровь, во Мнѣ пребываетъ, и Азъ въ немъ. Умилосердися убо, Господи, и не обличи мя грѣшнаго, но сотвори со мною по милости Твоей: и да будутъ ми святая сія, во исцѣленіе, и очищеніе, и просвѣщеніе, и сохраненіе, и спасеніе, и во освященіе души и тѣла: во отгнаніе всякаго мечтанія, и лукаваго дѣянія, и дѣйства діавольскаго, мысленнѣ во удесѣхъ моихъ дѣйствуемаго, въ дерзновеніе и любовь яже къ Тебѣ: во исправленіе житія и утвержденіе, въ возвращеніе добродѣтели и совершенства: во исполненіе заповѣдей, въ Духа Святаго общеніе, въ напутіе живота вѣчнаго, во отвѣтъ благопріятенъ на страш-

нѣмъ судищи Твоемъ: не въ судъ, или во осужденіе.

Молитва св. Сүмеона Новаго Богослова, 6-я.

Отъ скверныхъ устенъ, отъ мерзкаго сердца, отъ нечистаго языка, отъ души осквернены, пріими моленіе, Христе мой, и не презри моихъ, ни словесъ, ниже образовъ, ниже безстудія. Дажь ми дерзновенно глаголати, яже хочу, Христе мой, паче же и научи мя, что ми подобаетъ творити и глаголати: согрѣшихъ паче блудницы, яже увѣдѣ гдѣ обитаеши, мѣро купивши, пріиде дерзостнѣ помазати Твои нозѣ, Бога моего, Владыки и Христа моего. Якоже ону не отринуть еси пришедшую отъ сердца, ниже мене возгнушайся, Слове: Твои же ми подаждь нозѣ, и держати и цѣловати, и струями слезными, яко многоцѣннымъ мѣромъ, сія дерзостно помазати. Омый мя слезами моими, очисти мнѣими, Слове. Остави и прегрѣшенія моя, и прощеніе ми подаждь. Всѣи золь мно-

жество, вѣси и струпы моя, и язвы зриши моя: но и вѣру вѣси, и произволеніе зриши, и воздыханіе слышиши. Не таится Тебе, Боже мой, Творче мой, Избавителю мой, ниже капля слезная, ниже капли часть нѣкая. Несодѣланное мое видѣстѣ очи Твои, въ книзѣ же Твоей и еще несодѣянная написана Тебѣ суть. Виждь смиреніе мое, виждь трудъ мой еликъ, и грѣхи вся остави ми, Боже всяческихъ: да чистымъ сердцемъ, притрепетною мыслію, и душею сокрушенною, нескверныхъ Твоихъ причащуся и пресвятыхъ таинъ, имиже оживляется и обожается всякъ ядый же и пій чистымъ сердцемъ: Ты бо реклъ еси, Владыко мой: всякъ ядый Мою плоть, и пій Мойю кровь, во Мнѣ убо сей пребываетъ, въ немже и Азъ есмь. Истинно слово всяко Владыки и Бога моего: божественныхъ бо причащаяйся и боготворящихъ благодатей, не убо есмь единъ, но съ Тобою, Христе мой, свѣтомъ трисолнечнымъ, просвѣщающимъ міръ. Да

убо не единъ пребуду кромѣ Тебе Живо-
давца, дыханія моего, живота моего,
радованія моего, спасенія міру. Сего ра-
ди къ Тебѣ приступихъ, якоже зриши,
со слезами, и душею сокрушенною, из-
бавленія моихъ прегрѣшеній прошу прі-
яти ми, и Твоихъ живодательныхъ и не-
порочныхъ таинствъ причаститися не-
осужденно, да пребудеши, якоже реклъ
еси, со мною треокаяннымъ, да не кро-
мѣ обрѣтъ мя Твоея благодати, преле-
стникъ восхититъ мя льстивнѣ, и пре-
льстивъ отведетъ боготворящихъ Твоихъ
словесъ. Сего ради къ Тебѣ припадаю,
и теплѣ вопію Ти: якоже блуднаго прі-
ялъ еси, и блудницу пришедшую: тако
пріими мя блуднаго и сквернаго, Щедре.
Душею сокрушенною, нынѣ бо къ Тебѣ
приходя, вѣмъ, Спасе, яко иной, якоже
азъ, не прегрѣши Тебѣ, ниже содѣя дѣя-
нія, яже азъ содѣяхъ. Но сіе паки вѣмъ,
яко не величество прегрѣшеній, ни грѣ-
ховъ множество превосходитъ Бога мое-
го многое долготерпѣніе, и человѣколю-

біе крайнее: но милостію сострастія теплѣ кающыяся, и чистиши, и свѣтлиши, и свѣта твориши причастники, общники Божества Твоего содѣловаяя независтно, и странное и Ангеломъ, и человѣческимъ мыслемъ, бесѣдуеши имъ многажды, якоже другомъ Твоимъ истиннымъ. Сія дерзността творять мя, сія вперяють мя, Христе мой. И дерзал Твоимъ богатымъ къ намъ благодѣянїемъ, радуясь вкупѣ и трепещя, огневи причащаюся, трава сый, и странно чудо, орошаемъ неопально, якоже убо купина древле неопальнѣ горящи. Нынѣ благодарною мыслію, благодарнымъ же сердцемъ, благодарными удесы моими, души и тѣла моего, поклоняюся и величаю, и славословлю Тя, Боже мой, яко благословенна суща, нынѣ же и во вѣки.

Молитва иная Златоустаго, 7-я.

Боже, ослаби, остави, прости ми согрѣшенія моя, елика Ти согрѣшихъ, аще словомъ, аще дѣломъ, аще помышлені-

емъ, волею или неволею, разумомъ или неразуміемъ, вся ми прости яко благъ и Человѣколюбецъ. И молитвами Пречистыя Твоея Матере, умныхъ Твоихъ служителей и святыхъ силъ, и всѣхъ святыхъ, отъ вѣка Тебѣ благоугодившихъ, неосужденно благоволи пріяти ми святое и пречистое Твое Тѣло и честную Кровь, во исцѣленіе души же и тѣла, и во очищеніе лукавыхъ моихъ помышлений. Яко Твое есть царство и сила и слава, со Отцемъ и Святымъ Духомъ, нынѣ и присно, и во вѣки вѣковъ. Аминь.

Т о г о ж д е, 8-я.

Нѣсмь доволенъ, Владыко Господи, да внидеши подъ кровь души моя: но понеже хочещи Ты, яко Человѣколюбецъ жити во мнѣ, дерзая приступаю: повѣлѣваеши, да отверзу двери, яже Ты единъ создалъ еси, и внидеши со чело-вѣколюбіемъ якоже еси, внидеши и просвѣщаеши помраченный мой помысль: вѣрую, яко сіе сотвориши: не

бо блудницу, со слезами пришедшую къ Тебѣ, отгналъ еси: ниже мытаря отвергль еси покаявшася: ниже разбойника, познавша царство Твое, отгналъ еси: ниже гонителя покаявшася оставилъ еси, еже бѣ: но отъ покаянія Тебѣ пришедшыя вся, въ лицѣ Твоихъ друзей вчинилъ еси, единъ сый благословенный всегда, нынѣ и въ безконечныя вѣки. Аминь.

Т о г о ж д е, 9-я.

Господи Іисусе Христе, Боже мой, ослаби, остави, очисти, и прости ми грѣшному, и непотребному, и недостойному рабу Твоему прегрѣшенія, и согрѣшенія, и грѣхопаденія моя, елика Ти отъ юности моя, даже до настоящаго дне и часа согрѣшихъ: аще въ разумѣ и въ неразуміи, аще въ словесѣхъ или дѣлѣхъ, или помышленіихъ и мыслехъ, и начинаніяхъ, и всѣхъ моихъ чувствахъ. И молитвами безсѣменно рождшія Тя, Пречистыя и Приснодѣвы

Маріи, Матере Твоея, единыя непостыдныя надежды и предстательства и спасенія моего, сподоби мя неосужденно причаститися пречистыхъ, безсмертныхъ, животворящихъ и страшныхъ Твоихъ Таинствъ, во оставленіе грѣховъ и въ жизнь вѣчную: во освященіе, и просвѣщеніе, крѣпость, исцѣленіе, и здравіе души же и тѣла, и въ потребление и всесовершенное погубленіе лукавыхъ моихъ помысловъ, и помышленій, и предпріятій, и нощныхъ мечтаній, темныхъ и лукавыхъ духовъ: яко Твое есть царство, и сила, и слава, и честь, и поклоненіе, со Отцемъ и Святымъ Твоимъ Духомъ, нынѣ и присно, и во вѣки вѣковъ. Аминь.

Молитва иная Іоанна Дамаскина, 10 я.

Предъ дверьми храма Твоего предстою, и лютыхъ помышленій не отступаю: но Ты, Христе Боже, мытаря оправдивый, и Хананею помиловавый, и разбойнику рая двери отверзый, отверзи

ми утробы челоувѣколюбія Твоего, и пріими мя приходяща и прикасающася Тебѣ, яко блудницу, и кровоточивую: ова убо края ризы Твоея коснувшись, удобь исцѣленіе пріять: ова же пречистѣй Твои нозѣ удержавши, разрѣшеніе грѣховъ понесе. Азъ же, окаянный, все Твое Тѣло дерзая воспріяти, да не опалень буду: но пріими мя, якоже оныя, и просвѣти моя душевныя чувства, поपालая моя грѣховныя вины, молитвами безсѣменно Рождшія Тя, и небесныхъ силъ; яко благословень еси во вѣки вѣковъ. Аминь.

Молитва иная Златоустаго:

Вѣрую, Господи, и исповѣдую, яко Ты еси воистинну Христось, Сынъ Бога живаго, пришедый въ міръ грѣшныя спасти, отъ нихже первый есмь азъ. Еще вѣрую, яко сіе есть самое пречистое Тѣло Твое, и сія самая есть честная Кровь Твоя. Молюся убо Тебѣ: помилуй мя, и прости ми прегрѣшенія

моя, вольная и невольная, яже словомъ,
яже дѣломъ, яже вѣдѣніемъ и невѣдѣ-
ніемъ, и сподоби мя неосужденно при-
частитися пречистыхъ Твоихъ Таинствъ,
во оставленіе грѣховъ, и въ жизнь вѣч-
ную. Аминь.

Приходяй же причаститися, глаголи въ себѣ
настоящія стихи Метафраста:

Се приступаю къ Божественному При-
чащенію.

Содѣтелю, да не опалиши мя приоб-
щеніемъ:

Огнь бо еси, недостойныя поपालая.

Но убо очисти мя отъ всякія скверны.

Таже паки глаголи:

Вечери Твоея тайныя днесъ, Сыне Бо-
жій, причастника мя приими: не бо вра-
гомъ Твоимъ тайну повѣмъ, ни лобза-
нія Ти дамъ, яко Іуда, но яко разбой-
никъ, исповѣдаю Тя: помяни мя, Го-
споди, во Царствіи Твоемъ.

Паки стихи сія:

Боготворящую Кровь ужаснися, человѣ-
че, зря:

Огнь бо есть, недостойныя поपालяй.
Божественное Тѣло и обожаетъ мя и
питаетъ.
Обожаетъ духъ, умъ же питаетъ странно.

Таже тропари:

Усладилъ мя еси любовію, Христе, и
измѣнилъ мя еси Божественнымъ Тво-
имъ раченіемъ: но попали огнемъ не-
вещественнымъ грѣхи моя, и насытити-
ся еже въ Тебѣ наслажденіи сподоби:
да ликуя возвеличаю, Блаже, два при-
шествія Твоя.

Во свѣтлостехъ святыхъ Твоихъ ка-
ко вниду недостойный? Аще бо дерзну
совнити въ чертогъ, одежда мя облича-
етъ, яко нѣсть брачна, и связанъ из-
верженъ буду отъ Ангеловъ. Очисти, Го-
споди, скверну души моя, и спаси мя,
яко Человѣколюбецъ.

Таже молитву:

Владыко Человѣколюбче, Господи Ии-
сусе Христе, Боже мой, да не въ судъ
ми будутъ святая сія, за еже недостой-

ну ми быти: но во очищеніе и освященіе души же и тѣла, и во обрученіе будущія жизни и царствія. Мнѣ же, еже прилѣплятися Богу, благо есть, полагати во Господѣ упованіе спасенія моего.

И паки:

Вечери Твоея тайныя днесь, Сыне Божій, причастника мя приими: не бо врагомъ Твоимъ тайну повѣмъ, ни лобзанія Ти дамъ, яко Іуда, но яко разбойникъ, исповѣдаю Тя: помяни мя, Господи, во Царствіи Твоемъ.

Послѣдованіе по св. причащеніи.

Слава Тебѣ, Боже. Слава Тебѣ, Боже.
Слава Тебѣ, Боже.

Таже благодарственныя сія молитвы глаголи:

Благодарю Тя, Господи Боже мой,
яко не отринулъ мя еси грѣшнаго, но
общника мя быти святынь Твоихъ спо-
добилъ еси. Благодарю Тя, яко мене не-
достойнаго причаститися пречистыхъ
Твоихъ и небесныхъ даровъ сподобилъ
еси. Но, Владыко Человѣколюбче, насъ
ради умерый же и воскресый, и даро-
вавый намъ страшная сія и животворя-
щая Таинства, во благодареніе и освя-
щеніе душъ и тѣлесъ нашихъ: даждь
быти симъ и мнѣ во исцѣленіе души

же и тѣла, во отгнаніе всякаго сопротив-
наго, въ просвѣщеніе очію сердца моего,
въ миръ душевныхъ моихъ силъ, въ
вѣру непостыдну, въ любовь нелице-
мѣрну, во исполненіе премудрости, въ
соблюденіе заповѣдей Твоихъ, въ при-
ложеніе Божественныя Твоя благодати,
и Твоего Царствія присвоеніе: да во свя-
тыни Твоей тѣми сохраняемъ, Твою бла-
годать поминаю всегда, и не ктому се-
бѣ живу, но Тебѣ нашему Владыцѣ и
благодѣтелю: и тако сего житія изшедъ
о надеждѣ живота вѣчнаго, въ присно-
сущный достигну покой, идѣже празд-
нующихъ гласъ непрестанный, и без-
конечная сладость, зрящихъ Твоего ли-
ца доброту неизреченную. Ты бо еси
истинное желаніе, и неизреченное весе-
ліе любящихъ Тя, Христе Боже нашъ,
и Тя поеть вся тварь во вѣки.

Великаго Васи́лія, 2-я.

Владыко Христе Боже, Царю вѣковъ,
и Содѣтелю всѣхъ, благодарю Тя о

всѣхъ, яже ми еси подалъ благихъ, и о причащеніи пречистыхъ и животворящихъ Твоихъ Таинствъ. Молю убо Тя, Блаже и Человѣколюбче: сохрани мя подъ кровомъ Твоимъ, и въ сѣни крилу Твоею: и даруй ми чистою совѣстію, даже до послѣдняго моего издыханія, достойно причащаться святынь Твоихъ, во оставленіе грѣховъ, и въ жизнь вѣчную. Ты бо еси хлѣбъ животный, источникъ святыни, Податель благихъ: и Тебѣ славу возсылаемъ, со Отцемъ и Святымъ Духомъ, нынѣ и присно, и во вѣки вѣковъ. Аминь.

Метафраста, по стихомъ, 3-я.

Давый пищу мнѣ плоть Твою волею, огонь сый и опалаяй недостойныя, да не опалиши мене, Содѣтелю мой: паче же пройди во уды моя, во вся составы, во утробу, въ сердце. Попали терніе всѣхъ моихъ прегрѣшеній. Душу очисти, освяти помышленія. Составы утверди съ костями вкупѣ. Чувствъ просвѣти простую пятерицу. Всего мя спригвозди

страху Твоему. Присно покрый, соблюди же, и сохрани мя отъ всякаго дѣла и слова душегубнаго. Очисти и омой, и украси мя: удобри, вразуми, и просвѣти мя. Покажи мя Твое селеніе единого Духа, и не ктому селеніе грѣха. Да яко Твоего дому, входомъ причащенія, яко огня мене бѣжитъ всякъ злодѣй, всяка страсть. Молитвенники Тебѣ приношу вся святые, чиноначалія же безплотныхъ, Предтечу Твоего, премудрыя Апостолы, къ симъ же Твою нескверную чистую Матерь, ихже молибы Благоутробне пріими, Христе мой, и сыномъ свѣта содѣлай Твоего служителя. Ты бо еси освященіе и единый пашихъ, Блаже, душъ и свѣтлость: и Тебѣ лѣпоподобно, яко Богу и Владыцѣ, славу вси возсылаемъ на всякъ день.

Молитва иная, 4-я.

Тѣло Твое Святое, Господи Іисусе Христе, Боже нашъ, да будетъ ми въ животъ вѣчный, и Кровь Твоя честная во

оставленіе грѣховъ: буди же ми благодареніе сіе въ радость, здравіе и веселіе: въ страшное же второе пришествіе Твое, сподоби мя грѣшнаго стати одесную славы Твоея, молитвами Пречистыя Твоея Матере, и всѣхъ святыхъ.

Молитва иная, ко Пресвятѣй Богородицѣ, 5-я.

Пресвятая Владычице Богородице, свѣте помраченныя моея души, надеждо, покрове, прибѣжище, утѣшеніе, радованіе мое, благодарю Тя, яко сподобила мя еси недостойнаго, причастника быти пречистаго Тѣла и честныя Крове Сына Твоего. Но рождшая истинный Свѣтъ, просвѣти моя умныя очи сердца: Яже источникъ безсмертія рождшая, оживотвори мя умерщвленнаго грѣхомъ: Яже милостиваго Бога любоблагоутробная Мати, помилуй мя, и даждь ми умиленіе, и сокрушеніе въ сердцѣ моемъ, и смиреніе въ мысляхъ моихъ, и воззваніе въ плѣненіихъ помышленій моихъ: и сподоби мя, до по-

слѣдняго издыханія, неосужденно приимати пречистыхъ Таинъ освященіе, во исцѣленіе души же и тѣла. И подаждь ми слезы покаянія и исповѣданія, во еже пѣти и славити Тя во вся дни живота моего, яко благословенна и препрославленна еси во вѣки. Аминь.

Таже: Нынѣ отпускаеши раба Твоего, Владыко, по глаголу Твоему, съ миромъ: яко видѣста очи мои спасеніе Твое, еже еси уготовалъ предъ лицемъ всѣхъ людей, свѣтъ во откровеніе языковъ и славу людей Твоихъ, Израиля.

Трисвятое. Пресвятая Троице: Отче нашъ:

Тропарь святому Іоанну Златоустому, гласъ 8-й.

Устъ твоихъ, якоже свѣтлость огня, возсіявши благодать, вселенную просвѣти: не сребролюбія мірови сокровища сниска, высоту намъ смиренномудрія показа, но твоими словесы наказуя, отче Іоанне Златоусте, моли Слова Христа Бога спастися душамъ нашимъ.

Кондакъ, гласъ 6-й.

Слава: Отъ небесъ пріялъ еси божественную благодать, и твоими устнами вся учиши покланятися въ Троицѣ единому Богу, Іоанне Златоусте всеблаженне, преподобне, достойно хвалимъ тя: еси бо наставникъ, яко божественная являя.

И нынѣ: Предстательство христіанъ непостыдное, ходатайство ко Творцу непреложное, не презри грѣшныхъ моленій гласы, но предвари, яко Благая, на помощь насъ, вѣрно зовущихъ Ти: ускори на молитву, и потщися на умоленіе, предстательствующи присно, Богородице, чтущихъ Тя.

Аще же будетъ святаго Василія литургія,
чти святому Василю тропарь, гласъ 1-й:

Во всю землю изыде вѣщаніе твое, яко приѣмшую слово твое, имже боголѣпно научилъ еси, естество сущихъ уяснилъ еси, человѣческія обычаи украсилъ еси, царское свѣщеніе, отче преподобне, моли Христа Бога, спастися душамъ нашимъ.

Кондакъ, гласъ 4-й.

Слава: Явился еси основаніе непоколебимое церкви, подавая всѣмъ некрадое господство челоуѣкомъ, запечатлѣя твоими велѣньми, небоявленне Василіе преподобне.

И нынѣ: Предстательство христіанъ:

Аще же будетъ литургія Преждеосвященныхъ,
чти святому Григорію тропарь, гласъ 4-й:

Иже отъ Бога свыше божественную благодать воспріемъ, славне Григоріе, и Того силою укрѣпляемъ, евангельски шествовати изволилъ еси, отонудуже у Христа возмездіе трудовъ пріять еси всеблаженне: Егоже моли, да спасетъ души наша.

Кондакъ, гласъ 3-й.

Слава: Подобоначальникъ показался еси Начальника пастыремъ Христа, инокъ чреды, отче Григоріе, ко оградѣ небеснѣй наставляя, и оттуду научилъ еси стадо Христово заповѣдемъ Его: ны-

нѣ же съ ними радуешися, и ликуеши
въ небесныхъ кровѣхъ.

И нынѣ: Предстательство христіанъ:
Господи помилуй, 12, Слава, и нынѣ: Честнѣй-
шую херувимъ: и отпусти.

По причащеніи же да хранитъ себе кійждо
въ трезвеніи и воздержаніи, и немноглагола-
ніи: дабы въ той день честно соблюлъ въ себѣ
Христа пріятого.

Акаѣистъ Святителю Николаю.

Кондакъ 1.

Возбранный чудотворче, и изрядный
угодниче Христовъ! міру всему исто-
чаяй многоцѣнное милости мѣро, и не-
исчерпаемое чудесъ море, восхваляю тя
любовію, святителю Николае: ты же,
яко имѣяй дерзновеніе ко Господу, отъ
всякихъ мя бѣдъ свободи, да зову ти:
Радуйся, Николае, великій чудотворче.

Икосъ 1.

Ангела образомъ, земнаго суща есте-
ствомъ, яви тебе всяя твари Создатель:
благородную бо доброту души твоя
провидѣвъ, преблаженне Николае, на-

учи всѣхъ вопити тебѣ сице: Радуйся, отъ утробы матернія очищенный: радуйся, даже до конца освященный. Радуйся, рождениемъ своимъ родителей удививый: радуйся, силу душевную абіе по рождествѣ явивый. Радуйся саде земли обѣтованія: радуйся, цвѣте божественнаго сажденія. Радуйся, лозо добродѣтельная винограда Христова: радуйся, древо чудоточное рая Іисусова. Радуйся, крине райскаго прозябенія: радуйся, мвро Христова благоуханія. Радуйся, яко тобою отгонится рыданіе: радуйся, яко тобою приносится радованіе. Радуйся, Николае, великій чудотворче.

Кондакъ 2.

Видяще твоихъ мврѣ изліяніе, богомудре, просвѣщаемся душами и тѣлеса, дивнаго тя мвроточца живоносна, Николае, разумѣюще: чудесы бо яко водами, благодатию Божіею изливающимися, напалеси вѣрно вопіющихъ Богу: Аллилуіа.

Икосъ 2.

Разумъ недоразумѣнный вразумляя о Святѣй Троицѣ, былъ еси въ Никеи со святыми отцы поборникъ исповѣданія православныя вѣры: равна бо Отцу Сына исповѣдалъ еси, соприсносущна и сопрестольна, Арія же безумнаго обличилъ еси. Сего ради вѣршии научишася воспѣвати тебѣ: Радуйся, великій благочестія столпе: радуйся, вѣрныхъ прибѣжища граде. Радуйся, твердое, православія укрѣпленіе: радуйся, честное Пресвятыя Троицы носило и похваленіе. Радуйся, Отцу равночестна Сына проповѣдавый: радуйся, Арія возбѣсившагося отъ собора святыхъ отгнавый. Радуйся, отче, отцевъ славная красото: радуйся, всѣхъ богомудрыхъ премудрая доброто. Радуйся, огненная словеса испущай: радуйся, добръ стадо свое наставляяй. Радуйся, яко тобою вѣра утверждается: радуйся, яко тобою ересь низлагается. Радуйся, Николае, великій чудотворче.

Кондакъ 3.

Силою, данною ти свыше, слезу всяку отъяль еси отъ лица лютѣ страждущихъ, богоносе отче Николае: алчущимъ бо явился еси кормитель, въ пучинѣ морстѣй сущимъ изрядный правитель, недугующимъ исцѣленіе, и всѣмъ всякъ помощникъ показался еси, вопіющимъ Богу: Аллилуіа.

Икосъ 3.

Имѣяше воистинну, отче Николае, съ небесе пѣснь тебѣ воспѣваема быти, а не отъ земли: како бо кто отъ человѣкъ возможетъ твоя святыни величія проповѣдати? Но мы, любовію твоею побѣждаеми, вопіемъ ти сице: Радуйся, образе агнцевъ и пастырей: радуйся, святое очистилище нравовъ. Радуйся, добродѣтелей великихъ вмѣстилище: радуйся, святыни чистое и честное жилище. Радуйся, свѣтильниче всесвѣтлый и вселюбимый: радуйся, свѣте златозарный и непорочный. Радуйся, достойный ангеломъ собесѣдниче: радуйся,

добрый человекѣмъ наставниче. Радуйся, правило вѣры благочестивыя: радуйся, образе кротости духовныя. Радуйся, яко тобою отъ страстей тѣлесныхъ избавляемся: радуйся, яко тобою сладостей духовныхъ исполняемся. Радуйся, Николае, великій чудотворче.

Кондакъ 4.

Буря недоумѣній смущаетъ ми умъ: како достойно есть пѣти чудеса твоя, блаженне Николае? никтоже бо можетъ я исчести, аще бы и многи языки имѣлъ и глаголати восхотѣлъ; но мы дивно Богу въ тебѣ прославляющемуся дерзаемъ воспѣвати: Аллилуіа.

Икосъ 4.

Слышаша, богомудре Николае, ближніи и дальніи величіе чудесъ твоихъ, яко по воздуху легкими благодатными крилами навѣялъ еси сущихъ въ бѣдахъ предваряти, скоро отъ тѣхъ избавляя всѣхъ вопіющихъ къ тебѣ таковая: Радуйся, избавленіе отъ печали: радуйся,

подаяніе благодати. Радуйся, нечаемыхъ золь прогонителю: радуйся, желаемыхъ благихъ насадителю. Радуйся, скорый утѣшителю въ бѣдѣ сушихъ: радуйся, страшный наказателю обидящихъ. Радуйся, чудесь пучино Богомъ изліянная: радуйся закона Христова скрижали Богомъ писанныя. Радуйся, крѣпкое падающихъ возведеніе: радуйся, право стоящихъ утвержденіе. Радуйся, яко тобою всякая лесь обнажается: радуйся, яко тобою всякая истина сбывается. Радуйся, Николае, великій чудотворче.

Кондакъ 5.

Боготечная звѣзда явился еси, наста-
вляя по морю плавающихъ лютей, имже
смерть предстояше вскорѣ иногда, аще
не бы ты предсталъ еси призывающимъ
тя въ помощь, чудотворче святой Ни-
колае: уже бо нестыдно бѣсомъ летаю-
щимъ, и погрузити корабли хотящимъ
запретивъ, отгналъ еси ихъ, вѣрныя же

научилъ еси спасающему тобою Богу
взывать: Аллилуіа.

Икосъ 5.

Видѣша отроковицы на бракъ сквер-
ный нищеты ради уготованныя, великое
твое къ нищимъ милосердіе, пребла-
женне отче Николае, сгда старцу роди-
телю ихъ ноцію узельцы три злата
таяся подалъ еси, самаго со дщерьми
избавляя отъ паденія грѣховнаго, того
ради слышиши отъ всѣхъ сице: Радуй-
ся, милости превеликія о людехъ пріате-
лище. Радуйся, пище и отрадо къ тебѣ
прибѣгающихъ: радуйся, хлѣбе пснѣ-
даемый алчущихъ. Радуйся, богатство
бѣднѣ живущихъ на земли, Богомъ
данное: радуйся, воздвиженіе скорое
убогихъ. Радуйся, быстрое нищихъ
услышаніе: радуйся, скорбящихъ прі-
ятное попеченіе. Радуйся, тріехъ дѣвъ
непорочный невѣстителю: радуйся, чи-
стоты усердный хранителю. Радуйся,
ненадежныхъ надѣянiе: радуйся, всего

міра наслажденіе. Радуйся, Николае, великій чудотворче.

Кондакъ 6.

Проповѣдуеть міръ весь тебе, пре-
блаженне Николае, скорого въ бѣдахъ
заступника: яко многажды во единомъ
часѣ, по земли путешествующимъ и по
морю плавающимъ, предваряя пособст-
вуеши, купно всѣхъ отъ злыхъ сохра-
няя, вопіющихъ къ Богу: Аллилуіа.

Икосъ 6.

Возсіялъ еси свѣтъ животный, изба-
вленіе нося воеводамъ, неправедную
смерть пріяти имущимъ, тебе, добрый
пастырю Николае, призывающимъ, егда
вскорѣ явлься во снѣ царези, устра-
шилъ еси его, сихъ же неврежденныхъ
отпустить повелѣлъ еси. Сего ради съ
ними купно и мы благодарственно вопі-
емъ ти: Радуйся, усердно призываю-
щимъ тя помогаяй: радуйся, отъ непра-
веднаго убіенія избавляяй. Радуйся, отъ
лестныхъ сохраняяй клеветы: радуйся, не-

праведныя разрушай совѣты. Радуйся, растерзай лжу яко паучину: радуйся, возношай славно истину. Радуйся, неповинныхъ отъ узъ разрѣшеніе: радуйся, и мертвецевъ оживленіе. Радуйся, проявителю правды: радуйся, помрачителю неправды. Радуйся, яко тобою неповинніи избавлени отъ меча: радуйся, яко тобою насладишася свѣта. Радуйся, Николае, великій чудотворче.

Кондакъ 7.

Хотя богохульное еретическое отгнати злосмрадіе, мѣро воистинну благовонное, таинственное явился еси, Николае: люди мѣрейскія пасый, весь міръ своимъ благодатнымъ мѣромъ исполнилъ еси, и отъ насъ убо богомерзкое грѣховное злосмрадіе отжени, да благопріятно Богу вопіемъ: Аллилуіа.

Икосъ 7,

Новаго тя Ноя, наставника ковчега спасительнаго разумѣмъ, отче святыи Николае: бурю всѣхъ лютыхъ разгоняю-

щаго направлениемъ своимъ, тишину же божественную приносящаго вопіющимъ таковая: Радуйся, обуреваемыхъ тихое пристанище: радуйся, утопающихъ извѣстное хранилище. Радуйся, плавающихъ посредѣ пучинъ добрый кормчій: радуйся, тревоженія морская уставляющій. Радуйся, превознесеніе сущихъ въ вихрехъ: радуйся согрѣяніе сущихъ во мразѣхъ. Радуйся, сіяніе, скорбный мракъ разгоняющее: радуйся, свѣтило, вся концы земли просвѣщающее. Радуйся, отъ бездны грѣховныя челоуѣки избавляяй: радуйся, въ бездну адскую сатану ввергай. Радуйся, яко тобою дерзновенно бездну милосердія Божія призываемъ: радуйся, яко тобою отъ потопа гнѣва избавльшеся, миръ съ Богомъ обрѣтаемъ. Радуйся, Николае, великій чудотворче.

Кондакъ 8.

Странное чудо является притекающимъ къ тебѣ, блаженне Николае,

священная твоя церковь: въ ней бо и малое моленіе приносяще, велихъ недуговъ приедемъ исцѣленіе, аще токмо по Бозѣ упованіе на тя возложимъ, вѣрно вопіюще: Аллилуіа.

Икосъ 8.

Весь еси всѣмъ воистинну помощникъ, богоносе Николае, и собралъ еси вкупѣ вся прибѣгающыя къ тебѣ, яко свободитель, питатель и врачъ скорый всѣмъ земнымъ, на похвалу всѣхъ воздвизая вопити къ тебѣ сице: Радуйся, всякихъ исцѣленій источниче: радуйся, лютъ страждущимъ помощниче. Радуйся, заре, сіяющая въ нощи грѣховнѣй блуждающимъ: радуйся, росе неботочная въ знои трудовъ сущимъ. Радуйся, подаваяй требующимъ благостроеніе: радуйся, уготовляяй просящимъ изобиліе. Радуйся, многажды прошеніе предваряяй: радуйся, старымъ сѣдинамъ силу обновляяй. Радуйся, многихъ заблуждшихъ отъ пути истиннаго обличите-

лю: радуйся, таинъ Божіихъ вѣрный
служителю. Радуйся, яко тобою зависть
попираемъ: радуйся, яко тобою благо-
правное житіе исправляемъ. Радуйся,
Николае, великій чудотворче.

Кондакъ 9.

Всякія утоли болѣзни, великій нашъ
заступниче Николае, растворяя благо-
датная врачеванія, улаждающая души
наша, сердца же веселящая всѣхъ
усердно къ помощи твоей притекаю-
щихъ, Богу же вопіющихъ: Аллилуіа.

Икосъ 9.

Вѣтія суетумудренныя нечестивыхъ, ви-
димъ тобою посрамленныя, богомудре
отче Николае: Арія бо хульника, раздѣ-
ляюща Божество, и Савеллія, смѣшаю-
ща Святую Троицу, препрѣлъ, насъ же
во Православіи укрѣпилъ еси. Сего ра-
ди вопіемъ ти сице: Радуйся, щите, за-
щищай благочестіе: радуйся, мечу по-
сѣкаяй злочестіе. Радуйся, учителю бо-
жественныхъ велѣній: радуйся, губите-

лю богопротивныхъ ученій. Радуйся, лѣ-
ствице Богомъ утвержденная, еюже вос-
ходимъ къ небеси: радуйся, покрове Бо-
гомъ зданный, имже покрываются мнози.
Радуйся, немудрыхъ умудривый твои-
ми словесы: радуйся, лѣnivыхъ подвиг-
нуvый твоими нравы. Радуйся, свѣтло-
сте заповѣдей Божіихъ неугасимая: ра-
дуйся, луче оправданій Господнихъ пре-
свѣтлая. Радуйся, яко ученіемъ твоимъ
сокрушаются еретическія главы: радуй-
ся, яко тобою вѣрніи сподобляются сла-
вы. Радуйся, Николае, великій чудо-
творче.

Кондакъ 10.

Спасти хотя душу, плоть твою духо-
ви покорилъ еси воистинну, отче нашъ
Николае: молчаньми бо прежде и бо-
реньми съ помыслы, дѣянію богомыслие
приложилъ еси: богомыслиемъ же ра-
зумъ совершенъ стяжалъ еси, имже
дерзновенно съ Богомъ и ангелы бесѣ-
довалъ еси, всегда вопія: Аллилуіа.

Икосъ 10.

Стѣна еси похваляющимъ, преблаженне, чудеса твоя и всѣмъ къ заступленію твоему прибѣгающимъ, тѣмже и насъ, въ добродѣтели убогихъ, отъ нищеты, напасти, недуговъ и нуждъ различныхъ свободжай, вопіющихъ ти съ любовію таковая: Радуйся, отъ убожества вѣчнаго изымаяи: радуйся, богатство нетлѣнное подавая. Радуйся, брашно негиблющее алчущимъ правды: радуйся, питіе неисчерпаемое жаждущимъ жизни. Радуйся, отъ мятежа и брани соблюдая: радуйся, отъ узъ и плѣненія свободжай. Радуйся, преславный въ бѣдахъ заступниче: радуйся, превеликій въ напастехъ защитниче. Радуйся, многихъ отъ погибели исхитивый, радуйся, безчисленныхъ невредженно сохранивый. Радуйся, яко тобою лютыя смерти грѣшницы избѣгають: радуйся, яко тобою жизнь вѣчную кающіися получаютъ. Радуйся, Николае, великій чудотворче.

Кондакъ 11.

Пѣніе Пресвятѣй Троицѣ наче иныхъ
принеслъ еси, преблаженне Николае,
умомъ, словомъ и дѣломъ: многимъ бо
испытаніемъ правовѣрная повелѣнія
уяснилъ еси, вѣрою, надеждою и любо-
вію наставляя насъ, въ Троицѣ Единому
Богу воспѣвати: Аллилуіа.

Икосъ 11.

Свѣтозарную лучу во мракѣ житія
сущимъ неугасимую, видимъ тя, Богомъ
избранне отче Николае: съ невенест-
венными бо ангельскими свѣты бесѣ-
дуеши о несозданномъ Троическомъ Свѣ-
тѣ, вѣрныя же души просвѣщаеши,
вопіющыя ти таковая: Радуйся, озаре-
ніе трисолнечнаго свѣта: радуйся, ден-
нице незаходимаго солнца. Радуйся,
свѣще, божественнымъ пламенемъ воз-
жженная: радуйся, яко угасилъ еси
бѣсовскій пламень нечестія. Радуйся,
свѣтлое правовѣрія проповѣданіе: ра-
дуйся, доброзрачное свѣта евангельска-

го сіяніе. Радуйся, молніе, ереси пожигающая: радуйся, грома, устрашающей соблазняющыя. Радуйся, истиннаго учителю разума: радуйся, таинственнаго изъяснителю ума. Радуйся, яко тобою попрося поклоненіе твари: радуйся, яко тобою научихомся поклонятися Творцу въ Троицѣ. Радуйся, Николае, великій чудотворче.

Кондакъ 12.

Благодать данную ти отъ Бога свѣдущи, радующеся твою память празднуемъ по долгу, преславный отче Николае, и къ чудному заступленію твоему вседушно притекаемъ. Преславныхъ же твоихъ дѣяній, яко песка морскаго и множества звѣзднаго, исчести не могуще, недоумѣніемъ объяти бывше, вопіемъ къ Богу: Аллилуіа.

Икосъ 12.

Поюще твоя чудеса восхваляемъ тя, всехвальне Николае; въ тебѣ бо Богъ,

въ Троицѣ прославляемый, дивно прославися. Но аще и попремному составленные отъ души псалмы и пѣсни приносимъ ти, чудотворче святой, ничтоже творимъ равно дарованію чудесъ твоихъ, имже удивляющеса, вопіемъ къ тебѣ таковая: Радуйся, Царя царствующихъ и Господа господствующихъ служителю: радуйся, служителей Его небесныхъ сожителю. Радуйся, царемъ вѣрнымъ поможеніе: радуйся, рода христіанскаго возвышеніе. Радуйся, побѣды тезоименитый: радуйся, вѣнценосче нарочитый. Радуйся, всѣхъ добродѣтелей зеркало: радуйся, всѣхъ притекающихъ къ тебѣ крѣпкое забрало. Радуйся, по Бозѣ и Богородицѣ, все наше упованіе: радуйся, тѣлесъ нашихъ здравіе, и душъ спасеніе. Радуйся, яко тобою отъ вѣчныя смерти свободяемся: радуйся, яко тобою безконечныя жизни сподобляемся. Радуйся, Николае, великій чудотворче.

Кондакъ 13.

О, пресвятый и пречудный отче Николае, утѣшеніе всѣхъ скорбящихъ, нынѣшнее наше пріими приношеніе, и отъ геенны избавитися намъ Господа умоли, богопріятнымъ твоимъ ходатайствомъ, да съ тобою воспѣваемъ: Аллилуіа.

Сей кондакъ глаголи трижды.

И паки Икосъ 1.

Ангела образомъ, земнаго суща ествомъ, яви тебе вся твари Создатель: благодіудную бо доброту души твоея провидѣвъ, преблаженне Николае, научи всѣхъ вопити тебѣ сице: Радуйся, отъ утробы матерній очиненный: радуйся, даже до конца освященный. Радуйся, рожденіемъ своимъ родителей удививый: радуйся, силу душевную абіе по рождествѣ явивый. Радуйся саде земли обѣтованія: радуйся, цвѣте божественнаго сажденія. Радуйся, лозо добродѣтельная винограда Христова: радуйся, древо чудоточное рая Іисусова.

Радуйся, крине райскаго прозябенія: радуйся, муро Христова благоуханія. Радуйся, яко тобою отгонится рыданіе: радуйся, яко тобою приносится радование. Радуйся, Николае, великій чудотворче.

Кондакъ 1.

Возбранный чудотворче, и изрядный угодниче Христовъ, міру всему источаяй многоцѣнное милости муро, и неисчерпаемое чудесь море, восхваляю тя любовію, святителю Николае: ты же, яко имѣяй дерзновение ко Господу, отъ всякихъ мя бѣдь свободы, да зову ти: Радуйся, Николае, великій чудотворче.

Молитва Святителю Христову Николаю.

О всеблагій Отче Николае, пастырю и учителю всѣхъ, вѣрою притекающихъ къ твоему заступленію, и теплою молитвою тебе призывающихъ, скоро потщися, и избави Христово стадо отъ волковъ губящихъ е: и всюку страну христіанскую огради и сохрани святы-

ми твоими молитвами отъ мірскаго мятежа, труса, нашествія иноплеменниковъ и междоусобныхъ брани, отъ глада, потопа, огня, меча и напрасныя смерти: и якоже помиловалъ еси тріехъ мужей въ темницѣхъ сѣдящихъ, и избавилъ еси ихъ царева гнѣва и посѣченія меча, тако помилуй и мене, умою, словомъ и дѣломъ во тмѣ грѣховъ суща, и избави мя гнѣва Божія и вѣчныя казни: яко да твоимъ ходатайствомъ и помощію, Своимъ же милосердіемъ и благодатію, Христосъ Богъ тихое и безгрѣшное житіе дастъ ми пожити въ вѣцѣхъ семъ, и избавитъ мя шуіаго стоянія, сподобитъ же деснаго со всѣми святыми. Аминь.

Молитвы на разные случаи.

ПРИЗЫВАНІЕ ПОМОЩИ ДУХА СВЯТАГО
НА ВСЯКОЕ ДОБРОЕ ДѢЛО.

Царю Небесный:

Тропарь, гласъ 2-й.

Творче и Создателю всяческихъ Боже,
дѣла рукъ нашихъ, ко славѣ Твоей на-
чинаемая, Твоимъ благословеніемъ спѣ-
шно исправи, и насъ отъ всякаго зла
избави, яко единъ всесилень и Человѣ-
колюбецъ.

Кондакъ, гласъ 6-й.

Скорый въ заступленіе и крѣпкій въ
помощь, предстани благодатію силы
Твоя нынѣ, и благословивъ укрѣпи, и
въ совершеніе намѣренія благаго дѣла
рабовъ Твоихъ произведи: вся бо, ели-
ка хочещи, яко сильный Богъ творити
можещи.

БЛАГОДАРЕНІЕ ЗА ВСЯКОЕ БЛАГОДѢЯНІЕ

Тропарь, гласъ 4-й.

Благодарни суще недостойніи раби Твои, Господи, о Твоихъ великихъ благодареніихъ на насъ бывшихъ, славяще Тя хвалимъ, благословимъ, благодаримъ, поемъ и величаемъ Твое благоутробіе, и рабски любовію вопіемъ Ти: благодарѣтелю Спасе нашъ, слава Тебѣ.

Кондакъ, гласъ 3-й.

Твоихъ благодареній и даровъ туне, яко раби непотребніи, сподобльшеся, Владыко, къ Тебѣ усердно притекающе, благодареніе по силѣ приносимъ, и Тебе яко благодарѣтеля и Творца славяще, вопіемъ: слава Тебѣ, Боже всецѣдрый.

Слава, и мнѣ:

Богородице, христіаномъ помощнице, Твое предстательство стяжавше раби Твои, благодарно Тебѣ вопіемъ: радуйся, Пречистая Богородице Дѣво, и отъ всѣхъ бѣдъ насъ Твоими молитвами всегда избави, едина вскорѣ предстательствующая.

Пѣснь хвалебная св. Амвросія, еп. Медиоланскаго.

Тебе Бога хвалимъ, Тебе Господа исповѣдуемъ, Тебе превѣчнаго Отца вся земля величаетъ. Тебѣ вси ангели, Тебѣ небеса и вся силы, Тебѣ херувими и серафими непрестанными гласы зываютъ: Святъ, Святъ, Святъ, Господь Богъ Саваоѡъ, полны суть небеса и земля величества славы Твоея. Тебе преславный апостольскій ликъ, Тебе пророческое хвалебное число, Тебе хвалить пресвѣтлое мученическое воинство, Тебе по всей вселеннѣй исповѣдуетъ Святая Церковь, Отца непостижимаго величества, покланяемаго Твоего истиннаго и Единороднаго Сына, и Святаго Утѣшителя Духа. Ты Царю славы Христе, Ты Отца присносущный Сынъ еси: Ты, ко избавленію пріемля чловѣка, не возгнушался еси Дѣвическаго чрева. Ты одолѣвъ смерти жало, отверзлъ еси вѣрующимъ Царство Небесное. Ты одесную Бога сѣдиши во славу Отчей, Судія пріити вѣришися. Тебе убо просимъ: по-

мози рабомъ Твоимъ, ихже честною кровію искупилъ еси. Сподоби со святыми Твоими въ вѣчной славъ Твоей царствовать. Спаси люди Твоя, Господи, и благослови достояніе Твое, исправи я и вознеси ихъ во вѣки: во вся дни благословимъ Тебе, и восхвалимъ имя Твое во вѣкъ и въ вѣкъ вѣка. Сподоби, Господи, въ день сей безъ грѣха сохранитися намъ. Помилуй насъ, Господи, помилуй насъ: буди милость Твоя, Господи, на насъ, якоже уповахомъ на Тя: на Тя, Господи, уповахомъ, да не постыдимся во вѣки. Аминь.

**О УМНОЖЕНІИ ЛЮБВИ И ИСКОРЕНЕНІИ
НЕНАВИСТИ И ВСЯКІЯ ЗЛОБЫ.**

Тропарь, гласъ 4-й.

Союзомъ любви апостолы Твоя связавый, Христе, и насъ Твоихъ вѣрныхъ рабовъ къ Себѣ тѣмъ крѣпко связавъ, творити заповѣди Твоя и другъ друга любить нелицемѣрно сотвори, молитвами Богородицы, единае Человѣколюбче.

Кондакъ, гласъ 5-й.

Пламенемъ любви распали къ Тебѣ сердца наша, Христе Боже, да тою разжигаеми, сердцемъ, мыслію же и душею, и всею крѣпостію нашею возлюбимъ Тя, и искренняго своего яко себе, и повелѣнія Твоя храняще славимъ Тя, всѣхъ благъ Дателя.

О НЕНАВИДЯЩИХЪ И ОБИДЯЩИХЪ НАСЪ.

Тропарь, гласъ 4-й.

О распеншихъ Тя моливыйся, любодушне Господи, и рабомъ Твоимъ о вразѣхъ молитися повелѣвый, ненавидящихъ и обидящихъ насъ прости, и отъ всякаго зла и лукавства ко братолюбному и добродѣтельному настави жителству, смиренно мольбу приносимъ: да въ согласномъ единомысліи славимъ Тя единаго Человѣколюбца.

Кондакъ, гласъ 5-й.

Якоже первомученикъ Твой Стефанъ о убивающихъ его моляше Тя, Господи, и мы припадающе молимъ, ненавидя-

щихъ всѣхъ и обидящихъ насъ прости,
во еже ни единому отъ нихъ насъ ради
погибнути, но всѣмъ спастися благода-
тію Твоею, Боже всещедрый.

**ВО ВРЕМЯ БѢДСТВІЯ
И ПРИ НАПАДЕНІИ ВРАГОВЪ.**

Тропарь, гласъ 4-й.

Скоро предвари, прежде даже не по-
работимся врагомъ хулящимъ Тя, и пре-
тящимъ намъ, Христе Боже нашъ: по-
губи Крестомъ Твоимъ борющыя насъ,
да уразумѣютъ, како можетъ православ-
ныхъ вѣра, молитвами Богородицы, еди-
не Человѣколюбче.

Кондакъ, гласъ 8-й.

Возбранный Воеводо и Господи, яда
побѣдителю! яко избавлься отъ вѣчныя
смерти, похвальная восписую Ти, созда-
ніе и рабъ Твой: но яко имѣяй милосер-
діе неизреченное, отъ всякихъ мя бѣдъ
свободи, зовуща: Иисусе Сыне Божій, по-
милуй мя.

Стихи изъ псалмовъ:

Господи, воздвигни силу Твою, и при-
иди во еже спасти ны.

Да воскреснетъ Богъ и расточатся
врази Его, и да бѣжатъ отъ лица Его
ненавидящїи Его. Яко исчезаетъ дымъ,
да исчезнутъ.

О ПУТЕШЕСТВУЮЩИХЪ.

Тропарь, гласъ 2-й.

Путь и истина сый, Христе, спутни-
ка Ангела Твоего рабомъ Твоимъ нынѣ,
якоже Товїи иногда, послѣ сохраняю-
ща, и невредимыхъ, ко славѣ Твоей,
отъ всякаго зла во всякомъ благополу-
чїи соблюдающа, молитвами Богороди-
цы, единае Человѣколюбче.

Кондакъ, гласъ 2-й.

Луцѣ и Клеопѣ во Еммаусѣ спутъ-
ществовавый, Спасе, сшествуй и нынѣ
рабомъ Твоимъ, путешествовати хотя-
щимъ, отъ всякаго избавляя ихъ злаго
обстоянїя: вси бо Ты, яко Человѣко-
любецъ, можещи хотяй.

Молитва.

Господи Исусе Христе Боже нашъ,
истинный и живой путь, состранство-

вати мнимому Твоему отцу Іосифу, и пречистѣй Ти Дѣвѣ Матери, во Египетѣ изволивый, и Луцѣ и Клеопѣ во Еммаусѣ спутышествовавый! И нынѣ смиренно молимъ Тя, Владыко Пресвятый, и рабомъ Твоимъ симъ Твоею благодатію спутышествуй. И якоже рабу Твоему Товіи, Ангела хранителя и наставника послѣ, сохраняюща и избавляюща ихъ отъ всякаго злаго обстоянія видимыхъ и невидимыхъ враговъ, и ко исполненію заповѣдей Твоихъ насталяюща, мирно же и благополучно и здраво препровождающа, и паки цѣло и безмятежно возвращающа: и даждь имъ все благое свое намѣреніе ко благоугожденію Твоему, благополучно во славу Твою исполнити. Твое бо есть, еже миловати и спасати насъ, и Тебѣ славу возсылаемъ со Безначальнымъ Твоимъ Отцемъ, и со Пресвятымъ, и благимъ, и животворящимъ Твоимъ Духомъ, нынѣ и присно, и во вѣки вѣковъ. Аминь.

О БОЛЯЩИХЪ.

Тропарь, гласъ 4-й.

Скорый въ заступленіи единъ сый, Христе, скорое свыше покажи посѣщеніе страждущему рабу Твоему, и избави отъ недуговъ и горькихъ болѣзней и воздвигни во еже пѣти Тя и славити непрестанно, молитвами Богородицы, единае Человѣколюбче.

Кондакъ, гласъ 2-й.

На одрѣ болѣзни лежащаго и смертною раною уязвленнаго, якоже иногда воздвиглъ еси, Спасе, Петрову тещу и разслабленнаго на одрѣ носимаго, сице и нынѣ, Милосерде, страждущаго посѣти и исцѣли: Ты бо единъ еси недуги и болѣзни рода нашего понесый, и вся могій, яко Многомилостивъ.

Молитва.

Владыко Вседержителю, Святый Царю, наказуй и не умерщвляй, утверждаяй низпадающыя, возводяй низверженныя, тѣлесныя человѣковъ скорби

исправляяй, молимся Тебѣ, Боже нашъ, раба Твоего (*имя рекъ*) немощствующа посѣти милостію Твоею, прости ему всякое согрѣшеніе вольное и невольное. Ей, Господи, врачевную Твою силу съ небесе низпосли, прикоснися тѣлеси, угаси огневицу, укроти страсть и всякую немощь таящуюся, буди врачъ раба Твоего (*имя рекъ*), воздвигни его отъ одра болѣзненнаго, и отъ ложа озлобленія цѣла и всесовершенна, даруй его Церкви Твоей благоугождающа и творяща волю Твою. Твое бо есть, еже миловати и спасати ны, Боже нашъ, и Тебѣ славу возсылаемъ, Отцу, и Сыну, и Святому Духу, нынѣ и присно, и во вѣки вѣковъ, аминь.

ОБЪ УМЕРШИХЪ.

Тропарь, гласъ 4-й.

Со духи праведныхъ скончавшихся душу раба Твоего, Спасе, упокой, сохраняя ю во блаженной жизни, яже у Тебе, Человѣколюбче.

Въ покоищи Твоемъ, Господи, идѣже вси святїи упокоеваются, упокой и душу раба Твоего, яко единъ еси Человѣколюбецъ.

Слава: Ты еси Богъ, сошедый во адъ, и узы окованныхъ разрѣшивый. Самъ и душу раба Твоего упокой.

И нынѣ: Едина чистая и непорочная Дѣво, Бога безъ сѣмене рождшая, моли, спастися души его.

Сѣдалень, гласъ 5-й.

Покой, Спасе нашъ, съ праведными раба Твоего, и сего всели во дворы Твоя, якоже есть писано, презирая, яко благъ, прегрѣшенїя его вольная и невольная и вся яже въ вѣдѣнїи и не въ вѣдѣнїи, Человѣколюбче.

Кондакъ, гласъ 8-й.

Со святыми упокой, Христе, душу раба Твоего, идѣже нѣсть болѣзнь, ни печаль, ни воздыханїе, по жизнь безконечная.

Икосъ:

Самъ единъ еси Безсмертный, сотворивый и создавый человѣка, земни убо отъ земли создахомся, и въ землю туюжде пойдѣмъ, якоже повелѣлъ еси, создавый мя, и рекій ми: яко земля еси, и въ землю отъидеши, аможе вси человѣцы пойдѣмъ, надгробное рыданіе творяще пѣснь: аллилуіа, аллилуіа, аллилуіа.

Псаломъ 90.

Живый въ помощи Вышняго, въ кровѣ Бога Небеснаго водворится, речетъ Господеву: Заступникъ мой еси и прибѣжище мое, Богъ мой, и уповаю на Него. Яко Той избавитъ тя отъ сѣти ловчи и отъ словесе мятежна: плещма Своима осѣнитъ тя, и подѣ крилѣ Его надѣнешися: оружіемъ обыдетъ тя истина Его. Не убоишися отъ страха ночнаго, отъ стрѣлы летящія во дни, отъ вещи во тмѣ преходящія, отъ сряща и

бѣса полуденнаго. Падеть отъ страны твоея тысяща, и тма одесную тебе, къ тебѣ же не приблизится: обаче очима твоима смотриши, и воздаяніе грѣшниковъ узриши. Яко Ты, Господи, упованіе мое: Вышняго положилъ еси прибѣжище твое. Не приидеть къ тебѣ зло, и рана не приблизится тѣлеси твоему: яко Ангеломъ Своимъ заповѣсть о тебѣ, сохранить тя во всѣхъ путехъ твоихъ. На рукахъ возмутъ тя, да не когда преткнеши о камень ногу твою: на аспида и василиска наступиши, и попереши льва и змія. Яко на Мя упова, и избавлю и: покрю и, яко позна имя Мое. Воззоветъ ко Мнѣ, и услышу его: съ нимъ есмь въ скорби, изму его, и прославлю его: долготою дній исполню его, и явлю ему спасеніе Мое.

С Л У Ж Б А

**О ВЪ ТЕМНИЦАХЪ И ВЪ ЗАТОЧЕНІИ
СУЩИХЪ (МНОГИХЪ ИЛИ О ЕДИНѢМЪ)**

На проскомидіи

Господи Іисусе Христе Боже нашъ,
святаго апостола твоего Петра отъ
узъ и темницы безъ всякаго вреда
свободивый, пріими, смиренно мо-
лимъ ти ся, жертву сію милостивно
во оставленіе грѣховъ рабовъ твоихъ
(или раба твоего) . . . въ темницу
всажденныхъ (или всажденнаго), и
молитвами ихъ (того), яко человеко-
любецъ всесильною твоею десницею
отъ всякаго злаго обстоянія избави
и на свободу изведи.

Въ нагаль же Божественныя Литургии,

О плавающихъ:

Приложи и сія:

О еже простити рабомъ своимъ (или рабу своему) . . . вся согрѣшенія ихъ (или его) и милостиву и благоувѣтливу быти имъ (или ему), Господу помолимся.

О еже вскорѣ услышати гласъ моленія нашего, и отъ узъ и темницы милостивно свободити ихъ (или его), Господу помолимся.

О еже, якоже иногда прилежную церкви своея о Петрѣ молитву, и нашу нынѣ милостивно услышати, и отъ узъ свободити рабовъ своихъ (или раба своего), Господу помолимся.

О еже по многимъ щедротамъ и милости своей отъ всякаго злаго обстоянія избавити, и свободити рабы своя (или раба своего), Господу помолимся.

О еже сотворити милость съ рабы своими (или съ рабомъ своимъ) и отъ всѣхъ бѣдъ и нуждъ, и отъ узилища, якоже Іосифа въ Египтѣ иногда, силою своею скоро свободити ихъ (или его), Господу помолимся.

По входѣ тропарь, гласъ 2-й

Манассію отъ узъ и горькаго заточенія, молитвъ ради свободивый всещедрый Боже, и рабы твоя (или раба твоего) нами нынѣ молящияся (или молящагося), отъ узъ и заточенія свободы, и отъ всякаго злаго обстоянія избави, яко единъ человѣколюбецъ.

Кондакъ, гласъ 5-й

Яко милосердія источникъ, и благи пучина, Христе Боже, не презри въ скорбехъ и бѣдахъ, тебе вѣрою призывающихъ, но яко щедръ помилуй, и отъ узъ скоро свободи, да поемъ ти: аллилуія.

Прокименъ, гласъ 7-й

Изведи из темницы душу мою,
исповѣдаться имени твоему.

Стихъ: Вонми молитвѣ моей, яко
смирися зѣло.

Дѣяній Святыхъ Апостолъ
чтеніе.

(Глава 12-я. Стихи 1-11)

Аллилуія, гласъ 4-й

Изъ глубины воззвахъ къ тебѣ,
Господи, Господи, услыши гласъ мой.

Стихъ: Да будутъ уши твои вним-
лющѣ гласу моленія моего.

Отъ Іоанна Святаго
Евангелія чтеніе.

(Глава 8-я. Стихи 31-36)

По Рцемъ вси: и прогая

На своемъ мѣстѣ приложи:

Петра отъ узъ и темницы изведый,

и невредна церкви твоей представи-
вый, Христе, и рабовъ твоихъ (или
раба твоего), нами тебѣ нынѣ моля-
щихся (или молящагося), яко мило-
сердѣ помилуй, и отъ узъ свободы,
молимъ ти ся, всемилостивый Спасе,
услыши и помилуй.

Избавляяй нища отъ сильна, и
убога, емуже нѣсть помощника, въ
бѣдѣ и заточеніи и узахъ сущыя
(или сущаго), яко щедръ милостиво
свободи, прилежно молимъ ти ся,
скоро услыши, и яко щедръ помилуй.

Іосифа въ темницѣ иногда въ
Египтѣ заключеннаго преславно сво-
бодивый, и нынѣ нами тебе призы-
вающыя (или призывающаго) отъ
узъ и горькія бѣды избави, молимъ
ти ся, избавителю милостивый, услы-
ши и скоро помилуй.

Причастіе:

Да внидетъ предъ Тя воздыханіе
окованныхъ: по величію мышцы
твоя, снабди сыны умерщвленныхъ.

КАНОНЪ МОЛЕБЕНЪ НА ИСХОДЪ ДУШИ

Гласъ 6. Пѣснь 1. Ирмосъ:

Яко по суху пѣшешествованъ Изрииль,
по безднѣ стопами, гонителя фараона
вида потопляема, Богу побѣдную пѣснь,
поймъ, вопіяше.

Припѣвъ: Пресвятая Богородице,
спаси насъ.

Каплямъ подобно дождевнымъ,
зліи и маліи дніе мои, лѣтнимъ об-
хожденіемъ оскудѣвающе, помалу
исчезають ужѣ, Владычице, спаси мя.

Твоимъ благоутробіемъ и многими
щедротами Твоими, Владычице, пре-
клоняема естественно, въ часть сей
ужасный, предстани ми помощница
непоборимая.

Содержитъ нынѣ душу мою страхъ
великъ, трепетъ неисповѣдимъ и бо-

лѣзненъ есть, внегда изыти ей отъ тѣлесе, Пречистая, юже утѣши.

Слава:

Грѣшнымъ и смиреннымъ извѣстное прибѣжище, о мнѣ извѣсти Твою милость, Чистая, и бѣсовскія избави руки: якоже бо пси мнози обступиша мя.

И нѣнѣ:

Се, время помощи, се, время Твоего заступленія, се, Владычице, время, о немже день и ночь припадахъ теплѣ и моляхся Тебѣ.

Пѣснь 3. Ирмосъ:

Нѣсть святъ, якоже Ты, Господи Боже мой, вознесый рогъ вѣрныхъ Твоихъ, Блаже, и утвердивый насъ на камени исповѣданія Твоего.

Издалека сего дне, Владычице, провидя, и того яко пришедша помышляяй присно, слезами теплыми моляхся не забыти мене.

Обыдоша мя мысленніи рыкающе скумны, и ищутъ восхѣтити и растерзати мя горцѣ, ихже зубы, Чистая, и челюсти сокруши, и спаси мя.

Угасшу убо отнюдѣ оргáну словесному, и связавшуся языку, и затворившуся гласу, въ сокрушеніи сердца молю Тя: Спасительнице моя, спаси мя.

Слава:

Приклони ухо Твое ко мнѣ, Хріста Бога моего Мати, отъ высоты многія славы Твоея, Благая, и услыши стенаніе конечное, и руку ми подаждь.

И нынѣ:

Не отврати отъ мене многія щедроты Твоя, не затвори утробу Твою человѣколюбную, Чистая: но предстани ми нынѣ и въ часъ судный помяни мя.

Иѣснь 4. Ирмосъ:

Христось моя сила, Богъ и Господь,
честная церковь Боголѣпно поеть, вызы-
вающи отъ смысла чиста, о Господѣ
празднующи.

Умовеніе согрѣшеніемъ, токъ
слезный нынѣ положи, Благая,
сердца моего сокрушеніе приѣмлю-
щи: о Тебѣ утверждающу упованіе,
Благая, егда како страшнаго мя
избавиши огненнаго мученія, яко
Сама благодати еси источникъ, Бо-
городительнице.

Непостыдное и непогрѣшительное
всѣмъ, иже въ нѹждахъ, прибѣжи-
ще, Владычице пренепорочная, Ты
ми буди заступница въ часъ испы-
танія.

Простерши пречистіи Твои и все-
честнѣи рѹцѣ, яко священніи голу-
бинѣ крилѣ, подѣ кровомъ и сѣнію
тѣхъ покрый мя, Владычице.

Слава:

Воздушнаго князя, насильника,
мучителя, страшныхъ путій стояте-

ля, и напраснаго сихъ словоиспытателя, сподоби мя прейти невозбранно отходяща отъ земли.

II мѣстѣ:

Се, мя, Владычице, страхъ усрѣте, егоже и бояхся: се, подвигъ великъ объять мя, въ немже буди ми помощница, надежде спасенія моего.

Нѣнь 5. Ирмосъ:

Божіимъ свѣтомъ Твоимъ, Блаже, утренюющихъ Ти дѹши любонію озари, молюся: Тя вѣдѣти, Слово Божій, истиннаго Бога, отъ мрака грѣховнаго взывающа.

Не забуди мя, Благая, ниже открати отъ мене Твоего отрока лице Твое: но услыши мя, яко скорблю, и вонми души моей, и сію избави.

Иже по плоти сродницы мои, и иже по духу братіе, и друзіе и обычнии знаеміи, плачите, воздохните, сѣтуйте: се бо, отъ васъ нынѣ разлучаюся.

Нынѣ избавляяй никако и помогаяй воистинну никтоже: Ты помози ми, Владычице, да не яко чловѣкъ безпомощенъ, въ рукахъ врагъ моихъ затворенъ буду.

Слава:

Вшедше, святїи мои Ангели, предстаните судїшу Христову, колѣнѣ свои мысленнїи преклоньше, плачевнѣ возопїйте Ему: помилуй, Творче всѣхъ, дѣло рукъ Твоихъ, Блаже, и не отрини его.

И нынѣ:

Поклоньшеся Владычицѣ и Пречистѣй Матери Бога моего помолитесь, яко да преклонїтъ колѣна съ вами, и преклонїтъ Его на милость: Мати бо сущи и питательница, услышана будетъ.

Пѣснь 6. Ірмосъ:

Житейское море воздвизаемое зря напастей бурею, къ тихому пристанищу

Твоему притекъ, вопію Ти: возведи отъ тли животъ мой, Многомилостиве.

Устнѣ мои молчатъ и языкъ не глаголетъ, но сердце вѣщаетъ: огонь бо сокрушеніе сіе снѣдая внутрь возгорается и гласы неизглаголанными Тебѣ, Дѣво, призываетъ.

Призри на мя свыше, Мати Божія, и милостивно вонми нынѣ на мое посѣщеніе снити, яко да видѣвъ Тя, отъ тѣлесе изыду радуясь.

Растерзаемы соузы, раздираемы законы естественнаго сгущенія и составленія всего тѣлеснаго, нѹжду нестерпимую и тѣсноту сотворяютъ ми.

Слава:

Святыхъ Ангелъ священнымъ и честнымъ рукамъ преложи мя, Владычище, яко да тѣхъ крылы покрывся, не вижу безчестнаго и смраднаго и мрачнаго бѣсовъ образа.

И пѣтъ:

Чертоже Божій всечестне, небес-
ному разумному чертогу сподоби
мя, мою угасшую и несіяющую свѣ-
щу вжегши святымъ елеємъ мило-
сти Твоя.

Кондакъ, гласъ 6:

Душѣ моя, душѣ моя, возстани,
что спиши? конецъ приближается,
и нѣжда ти молвити. Восприни убо,
да пощадитъ тя Христось Богъ, Иже
вездѣ сый и вся исполняй.

Икосъ :

Христово врачевство видя отвер-
сто и отъ сего Адаму истошающее
здравіе, пострадавъ уязвися діаволъ,
яко бѣды пріемля рыдаше, и своимъ
другомъ возопи: что сотворю Сыну
Маріину? убиваетъ мя Виолеемля-
нинъ, Иже вездѣ сый и вся испол-
няй.

Пѣснь 7. Ирмосъ:

Росодательну убо печь содѣла Ангель
преподобнымъ отрокомъ, Халдеи же опа-
ляющее велѣніе Божіе, мучителя увѣща
воплити: благословенъ еси, Боже отецъ
нашихъ.

Ночь смертная мя постиже него-
това, мрачна же и безлунна, препу-
щающи неприготовлена къ долгому
оному пути страшному: да спутеше-
ствуетъ ми Твоя милость, Владычи-
це.

Се, вси дніе мои исчезоша вои-
стинну въ суетѣ, якоже пишется,
и лѣта моя со тщаніемъ, сѣти же
смертныя воистинну и горькія пред-
вариша мою душу, яже мя обдер-
жать.

Множество грѣховъ моихъ да не
возможетъ побѣдiti Твоего многа-
го благоутробія, Владычице: но да
обыдетъ мя Твоя милость, и вся да
покрыетъ беззаконія моя.

Слава:

Отводящии мя отсюду находятъ,
содержаще мя всюду: душа же моя
отлагаетъ и страшится, многа испол-
нена мятѣжа, юже утѣши, Чистая,
явленіемъ Твоимъ.

И нынѣ:

Спечалующаго ни единого въ скор-
би моей, ниже утѣшающаго обрѣ-
тохъ, Владычице: ибо друзи мои и
знаемии вкупѣ оставиша мя нынѣ:
но, надежде моя, никакоже да не-
оставиши мя.

Пѣснь 8. Ірмосъ:

Изъ пламене преподобнымъ рѣсу исто-
чилъ еси, и праведнаго жертву водою
попалилъ еси: вся бо твориши, Христе,
токмо еже хотѣти: Тя превозносимъ во
вся вѣки.

Яко Бога Человѣколюбца Мати
человѣколюбивая, тихимъ и мило-
стивымъ вонми окомъ, егда отъ

тѣла душа моя отлучается, да Тя во
вся вѣки славлю, Святая Богородице.

Убѣгнути ми варваръ безплотныхъ
полки, и воздушныя бездны возник-
нути, и къ небеси взыти мя сподоби,
да Тя во вѣки славлю, Святая Бо-
городице.

Рождшая Господа Вседержителя,
горькихъ мытарствъ начальника мі-
родержца отжени далече отъ мене,
внегда скончатися хочу, да Тя во
вѣки славлю, Святая Богородице.

Слава:

Великой послѣдней гласящей тру-
бѣ въ страшное и грозное воскре-
шеніе суда, воскресающимъ всѣмъ,
помяни мя тогда, Святая Богородице.

И нынѣ:

Высокая Владыки Христа палато,
Твою благодать свыше пославши,
предвари мя нынѣ въ день озло-

бленія, да Тя славлю во вѣки вся,
Святая Богородице.

Пѣснь 9. Ирмосъ:

Бога человѣкомъ невозможно видѣти,
на Негоже не смѣють чини Ангельстїи
взирати: Тобою же, Всечистая, явися че-
ловѣкомъ Слово воплощенное, Егоже ве-
личающе съ небесными вои Тя убла-
жаемъ.

О, како узрю невидимаго ? како
ужасное бо претерплю видѣніе ?
како дерзну отверсти очи ? како
моего Владыку смѣю видѣти, Егоже
не престоаяхъ отъ юности огорчева
присно ?

Святая Отроковице, Богородитель-
нице, на мое смиреніе милосердно
призри, умиленное мое и послѣднее
моленіе сіе прїимши, и мучащаго
вѣчнающаго огня потщися избавити
мя.

Храмы святая осквернившая,
скверный и тѣлесный храмъ оста-
вивши, Тебѣ, Божій всечестный
храме, молитъ, Отроковице Дѣво

Мати, душа моя, тмы кромѣшніа
убѣжати и лютаго геенскаго жженія.

Слава:

Зря конецъ близу житія моего,
и помышляя безмѣстныхъ мыслей,
дѣяній же, Всечистая, душу мою
дѣлательницу, лютѣ уязвляюся стрѣ-
лами совѣсти: но преклоншися ми-
лостивно, буди ми предстательница.

И нынѣ:

Сынъ дастся намъ за милость,
Сынъ Божій, и Ангельскій Царь
превѣчный, отъ чистыхъ кровей
Твоихъ человѣкъ прошедъ: Егоже
умилостиви, Откровице, страстиѣй
моей души, исторгаемѣй лютѣ отъ
окаяннаго моего тѣлесе.

Таже, Достойно есть:

Молитва на исходъ души.

Владыко, Господи Вседержителю,
Отче Господа нашего Іисуса Христа,

Иже всѣмъ человѣкомъ хотяи спасти, и въ разумъ истины прийти, не хотяи смерти грѣшному, но обращенія и живота, молимся, и мили ся Ти дѣемъ: душу раба Твоего (*имя рекъ*) отъ всякія узы разрѣши и отъ всякія клятвы свободы, остави прегрѣшенія ему, яже отъ юности, вѣдомая и невѣдомая, въ дѣлѣ и словѣ, и чисто исповѣданая, или забвеніемъ или студомъ утаеная. Ты бо единъ еси разрѣшаяи связанныя и исправляяи сокрушенныя, надежда нечаемымъ, могій оставляти грѣхи всякому человѣку, на Тя упованіе имущему. Ей, человѣколюбивый Господи! повели, да отпуститъ ся отъ узъ плотскихъ и грѣховныхъ: и прими въ миръ душу раба Твоего сего (*имя рекъ*), и покой ю въ вѣчныхъ обителехъ, со святыми Твоими, благодатию Единороднаго Сына Твоего, Господа Бога и Спаса нашего Іисуса Христа, съ Нимже бла-

гословенъ еси, съ пресвятымъ и
благимъ и животворящимъ Твоимъ
Духомъ, нынѣ и присно и во вѣки
вѣковъ. Аминь.

Молитва по исходѣ души.

Помяни, Господи Боже нашъ, въ
вѣрѣ и надежди живота вѣчнаго,
преставльшагося раба Твоего, брата
нашего (*имя рекъ*), и яко благъ и
Человѣколюбецъ, отпущаяй грѣхи
и потребляяй неправды, ослаби,
остави и прости вся вольная его
согрѣшенія и невольная: избави его
вѣчныя муки и огня геенскаго и
даруй ему причастіе и наслажденіе
вѣчныхъ Твоихъ благихъ, уготован-
ныхъ любящимъ Тя: аще бо и со-
грѣши, но не отступи отъ Тебе, и
несумнѣнно во Отца и Сына и Свя-
таго Духа, Бога Тя въ Троицѣ
славимаго вѣрова, и единицу въ
Троицѣ, и Троицу во единствѣ пра-
вославно даже до послѣдняго сво-

его издыханія исповѣда. Тѣмже милостивъ тому буди, и вѣру, яже въ Тя, вмѣсто дѣлъ вмѣни, и со святыми Твоими яко щедръ упокой: нѣсть бо человѣка, иже поживетъ, и не согрѣшитъ. Но Ты единъ еси кромѣ всякаго грѣха, и правда Твоя правда во вѣки: и Ты еси единъ Богъ милостей и щедротъ и чело-вѣколюбія, и Тебѣ славу возсылаемъ, Отцу и Сыну и Святому Духу, нынѣ и присно и во вѣки вѣковъ. Аминь.



